


MISHINDU YISATU

YA BEENA KWITABUUJA

 Twinyikaayi mitu yetu. Ne mitu yetu minyika, ne myoyi yetu, ndi ndikonka ne mbanganyi badi baswe bwà bāvavulukè mu disambila, swaku wèlè ànu cyanza cyèbè muulu, wamba ne: “Mukalenge, wamvulukakù, Éyi Mukalenge.” Kùdi malombà àbūngi kaaba aka, mishwalà mitèeka pa cyambilu.

² Taatù wa mu Dyulu munanga, nyewù tudi badisangishe cyakàbìdì dilòlò edi mwinshì mwà musakà ewu, mŪkaadi mutwilàngānetwilàngāne neetù misangu ne misangu, ne muleejèlèje luse Lwèbè kutùdi; patùdi tuteeta mu yetu mishindù mipwekèle apa bwà kumvwija dinanga dyètù ne disàkìdila dyètù kŪdì, bwà byŪdì mutwēnzèle. Nēnku dilòlò edi nyewù tulwa cyakàbìdì, Mukalenge, bu cisambà cìdì mu lukèngelu, bwalu tudi Neebè dijinga dībà dyōnsò. Nēnku bu mutūcìdì pa buloba apa, tudi bamanyè ne aci ki cīikalè lubilà lwètù, bwalu tudi mu mvità. Nēnku tudi. . . Mvità mminunkè, ne Wèwè wākālaya ne kwamba mùvwà mwena lukunà mwà kwikala bu ntambwe udi ukungula. Mmulekèlèdiibwe munkaci mwà bantu, ne tudi mwà kumumòna myaba yōnsò, bu ntambwe udi ukungula munkaci mwà kudyà cidiye mwà kudyà, bwalu mmumanyè ne cikondo cyèndè ncipi. Kàdi tudi ne—tudi ne—ne Taatù udi ucyūka bānà Bèndè bakesè, ne kùdi Wèwè nkutùdi tunyeemena ne malombà ètù, dilòlò edi, Mukalenge. Tudi tulombà bwà Waāfilakù.

³ Ne mishwalà yidi myadija kaaba aka eyi, Taatù, yidi yūmvwija ne kùdi babèèdì mwaba kampānda mu ditūnga, badi munkaci mwà dikubiikila ne biikāle Neebè dijinga, ne bāKwitabuuja, bāleeja diitabuuja dyābò mwab’ewu mu kutūma kwà mishwalà eyi. Nzambì, enzàku bwà yōnsò wà kùdìbo òndopiibwè.

⁴ Twamònu bukolè Bwèbè bunène abu, Mukalenge, kwenji ànu katancì kakesè mu cibambalu mwāmwa, būpingajila nsongālūmè uvwa mujimīne awu civūlukilu cipwāngāne. Tudi tumòna bukolè Bwèbè bunène, ku cikondo ne ku cikondo, būumusha mabèèdì ne būsokolola mūnsokòntù wà mu mwoyi, ne būleeja bantu, ne būbātèeka buludì mu bulongāme. Tudi tuKwela twasàkìdila, Mukalenge Nzambì, bwalu aci cidi cipicila muntu kanà yōnsò ewu. Aci ncipite cyōnsò cidi nī nganyì nī nganyì wa kutùdi mufwānyīne kumanya, mùshindù mwinè wŪdì mwà kusokolola ciledi ciinè cyà bwalu, ne cidi cicyenzè, ne mùshindù wūdici. Awu ng’Wèwè, Taatù. Ne tudi bamanyè, ne:

“Dìyì dítu dīkenketa mwoyi, ne dítu Dījinguludi dyà meeji ne mapàngadika à mu mwoyi,” pa nàнку tudi tuKwela twasàkidila bwà cyòci eci.

⁵ Nènku mpindyewu, Mukalenge, tudi twitabuujà ne bantu mpindyewu, ne mitù yàbò miinyika, bàdi munkaci mwà kwelangana meeji pa biinè bintu ebi, ne Nyumà Mwímpè ngudi munkaci mwà kwakula naabò awu. Nènku enzàku bwà dyònsò dyà ku malòmba àbò dyàndamunyiibwè. Sùngilakù bàdi mwà kusùngiibwa, Mukalenge, dilòlòlò edi. Bàdi bajimìne abu, swàku bwà bàbwelè ne bàsungidiibwè.

⁶ Tudi ne kusàkidila kwàbúngì pa kumòna mùshiki munène, mwalàbàle wà bilàmbà bibolè ne màyi mwaba wàwa, bamanyè bimpè ne lukitá ndukàngùdiibwe; ne mpèkaatù wa muntu wa kale awu wàjiikìbù, bwà bààbúngì bàà kùdìbo. Nènku ndi nKusàkidila bwà cyòci aci, Taatù. Nènku swàku bwà bèndè mu bupyabùpyà bwà Mwoyi, matùkù àbò ónsò a mwoyi. Mu Dìna dyà Yesù Kìlistò, mmutùdi tulòmba nùku. Amen.

⁷ Mukalenge ànùbènèshè, ènzèku ne dilòmba dinùvwà naadi pa mwoyi wènù adi dyàndamunyiibwè.

⁸ Mpindyewu, ngeela meeji ne Billy ùvwa mwambè ne Mwanèètù Wheeler ùvwa ne mwànà mukèsè wa mu dibòko. Mmùvwàbi anyi? Anyi mvwa mutùpàkàne mwaba awu, wa kulàmbula, anyi cintu kampànda, anyi dilàmbula? [Mwanèètù Neville ùdi wàmba ne: “Ngeela meeji ne muvwa bânà bàà mu mabòkò bàsàtù anyi bànaayi.”—Muf.] Èyo. Nwènù baswèku bwa kulwa naabò kumpàla eku mpindyewu, tudi bafwànyine kwikala ne disànkà; bu bakùlù mwà kulwakù kumpàla eku, bwà bàtentekelè bânà bakesè aba byanza, bwà mudimu wà dibàlambula. Nènku netùteetè bwà kwikala ànu cikòsò. Nènku tudi baswè bwà bânà bakesè, bàdi baswè kulwa kùdi Mukalenge Yesù aba, bàdi baswè kulwa ne byàbò—byàbò bilèngà bikesè bìdi Nzambi mubàpèeshe abu. Tutu misangu yònsò ànu tuteeta bwà kubàpengela njila, bwalu katwèna bamanyè cidi màalabà mulamè to.

⁹ Maamù wanyì ùvwa ne ciibidilu cyà kungambila ne: “Kulààdikiji, bwà màalaba, cidi mwà kwenjiibwa leelù to.” Aci ncyà bushùwà, bwalu kwèna mumanyè cidi màalaba mulamè to, kàdi tudi bamanyè ne Udi mulamè màalaba. Ki cyà musinga ncyòci aci. Tudi bamanyè Udi mulamè màalaba.

¹⁰ Mwanèètù wa balùme Wheeler, Mukalenge Nzambi àkubènèshè. Ne ewu m’Mwanèètù wa bakàji Wheeler. Ncyà bushùwà ne ndi ne disànkà dyà kutwilanganakù neenù. Nènku ndi. . .ndyànyì dyèsè dinène, musangu wà kumpàla, ngeela meeji, bwà ku dyànyì dimanya, dyà kutwilanganakù neebè. Nènku ewu mmwanèèbè wa mu dibòko. Dyèndè nganyì? [Mwanèètù wa bakàji Wheeler ùdi wàmba ne: “Carlèna Rebecca.”—Muf.] Carlèna Rebecca. Èè, mwànà mukèsè wa bakàji

mulenga kaayi's wè, mulenga ne mwèndè msònsò. Mpindyewu, Carlena Rebecca Wheeler mwànà.

¹¹ Mwanèètù Wheeler ngumwe wa ku balami bèètù mu èkèleeziyà emu, nènku Nzambi mmubènèshe disangila dyàbò, bwà mwànà mukesè ewu. Ndi ngeela meeji ne nwênù, ndi mumanyè ne, nudi ne bânà bàà bakàjì bakwàbò, bu bàbìdì nànkù, kí mmwòmò anyi? [Mwanèètù Wheeler ùdi wàmba ne: “Basàtù.”—Muf.] Bânà bàà bakàjì bakwàbò basàtù. Mbainàbànà balenga, mmùndì ngumwua, pa nànkù ndi ndòmba bwà Nzambi àvwijèku Rebecca ànu mùdì bakwàbò abu. Nwamònu anyi? Nènku díbà adi aci necìkalè disànkishiibwa bwèndù bònsò, kí mmwòmò anyi? Ncyà bushùwà's, bwalu mbànà bàà kalolo kàà menemene.

¹² Ncyèna mumanyè ní witaba bwà mmwambùlèku anyi to, kàdi, yèyè kàyi muswè to, netùmutentèkelè ànu byanza. Udikù mwà kuswà bwà kuseemena kùndì eku anyi, Rebecca? Udi muswè bwà mèmè nkwambùlèku anyi? Abi's mbilenga be. Mwànà mukesè wa bakàjì mulenga kaayipu's wè!

Mpindyewu twìnyikàayi mitù yètù.

¹³ Taatù wa mu Dyulu wa ngàsà, patùdì biimàne mwaba ewu kumpàla kwà mulami ewu, dilòòlò edi apa; ne bulelèlè mmudimu mulenga wùdiye ùkwàta, bwalu mulami ùdi ne cyà kusanganyiibwa kàyi kadiwù nànsha, mulùme wa mukàjì umwe, ukòntonona díkù dyèndè bìmpè. Bwalu, yèyè kàyi mumanyè mwà kukòntonona díkù dyèndè to, mmunyi mùdiye mwà kukòntonona nzùbu wa Nzambi? Nènku tudi tuKusàkidila mùdì mwanèètù ewu mukùmbàje ngiikàdilù milòmba eyi, ne tudi tusangana munda mwèndè Nyumà wa Nzambi.

¹⁴ Nènku nyewù mpindyewu ùlwa ne mwanèndè wa bakàjì mukesè ewu mwaba ewu, bwà kulàmbudiibwayè. Wèwè ngudi mumutèèke mu mabòko àbò bwà kumukoleshabò. Nzambi, ne mùshindù mwinè wutùdì ne kusàkidila's, mutùdì mwà kwamba ne, dijinga dyàbò ndyà ne yèyè ìkalakù bu bânà bààbò bakwàbò bàà bakàjì abu. Enzàku, Taatù, bwà bìikalè nànkù. Nènku swàku bwà mwànà ewu ìkalè ne mwoyi ne—ne ìkalè mudimu munène Bwèbè Wèwè, Taatù. Nènku mpindyewu, mu Dìnà dyà Yesù Kilistò, tudi tuKupèèsha mwànà wa mu dibòko ewu bwà nsòmbelu wa mudimu. Muvwijèku ne mubidi tumatuma, ne dikàndà; swàku bwà àlaalè àboobokè, too ne pàalwà Yesù, bu byòbì mwà kwenzeka. Nènku díbà adi, Taatù, tudi twitabuuja ne neàkoleshiibwè mu mibelu yà Kilistò. Nènku tudi tuKupèèsha mwoyi wèndè, bwà nsòmbelu wa mudimu. Amen.

¹⁵ Nzambi àkubènèshè, Rebecca. Ne Nzambi ànùbènèshè, Mwanèètù wa balùme Wheeler ne Mwanèètù wa bakàjì Wheeler. Mukalenge ìkalè neenù.

¹⁶ Wetwàwu! Mpindyewu mwànà wa bakàjì mukwàbò mukesè nyèyè ewu ne mimwemwe yàbùngì kwìsù. Nènku dyèndè nganyi?

[Maamù ùdi wàmba ne: “Rhonda Renee Coats.”—Muf.] Rhonda Renee Coats, mmwômwé? Nudi bulongo ne Jesse ne bakwàbò abu, Jesse Coats anyi? [“To.”] Mvwa ànu ndyàmbedila... Mvwakù mumanyè bàmwè bàà ku ba-Coats mu cimenga emu. Mvwa mubàmanyè bìmpè menemene, ne mba—mbalundà bàanyi kùkaadi—kùkaadi ntàntà mule.

¹⁷ Rhonda, Rhonda Renee. Ndi ndikonka ní udikù mwà kuseemena kùndì eku, Rhonda? Nè—nênkwalùjè buludì kùdì mamwèbè, patùdì ànu ne twàkufidi kùdì Mukalenge Yesù. Mpindyewu, s’mulenga’s!

Mpindyewu twìnyikààyaaku mitù yètù.

¹⁸ Taatù wa mu Dyulu, pàtudì biimàne pàmwè dilòlò edi, mukùlù Webè ne mèmè, mu dipetangana ne mu cimùkù mu Èvànjeeliyò apa, maamù ewu nyewù ùKutwàdila Rhonda Renee mukesè ewu bwà dilàmbùdiibwa. Wèwè ngudi mumutèèke mu mabòkò èndè, bwà dimukùba, nènku cintu cyà kumpàla cidìyekù mwà kwenza nkumwaluja Kùdì. Bu mwàkambà Yòbò wa kale awu ne, Mukalenge ngudi ufila bintu ebi. Nènku tudi tulòmba, Nzambì, bwà Wàmulamakù mu dikùbiibwa too ne dìbà dyàkèngelàbi bwà Ùmwangàtè. Nènku, Nzambì, enzàku bwà ìkalè ne nsòmbelu wa mwena Kilistò mulelèlà ne ìkalè cileejilu kùdì bakwàbò, pàdiye wènda ùkola apu. Bèneshakù dikù dyèndè, ne swàku bwà dilambudiibwè Kùdì, bwà mudimu mupàte patapata, ne myoyi milelèlà. Nènku mpindyewu, Nzambì, nyewù tuKupèèsha Rhonda Renee Coats mukesè ewu, mu Dìnà dyà Yesù Kilistò, bwà nsòmbelu wa mudimu. Amen.

Wa bupolè be! Nzambì àkubènéshè, mwanèètù wa bakàjì.

¹⁹ Wetwàwu! [Mwanèètù wa bakàjì awu ùdi wàmba ne: “Robert Paul Schamel.”—Muf.] Robert Paul Shane? [“Schamel.”] Schamel.

²⁰ Èè, kàdi bu ne... Pèèbè’s ucidi ànu mwànà, ncyèna ngeela meeji ne udi mufwànyine kujuula makòkyanganyi pa bwalu abu to. Kùnsekiku nànkù to. Tàngilà kuneeku, pawikala ujinga cintu kampànda cyà kuseka. Robert Paul, dìnà bulenga kaayipu’s wè!

Twìnyikààyi mitù yètù.

²¹ Nzambì, pàdi nsongààkàjì ewu ùlwa kaaba aka apa; bwètù twètù, yèyè, mmufwànyine kwikala ànu mwànà. Kàdi ùdi ùfila mwanèndè mukesè ewu balùme ewu, Èyi Nzambì, bu nsòmbelu wa mudimu Kùdì. Mmamuma ne bipeta byà disangila dyàbò. Ndi ndòmba, Nzambì, pàdi mukùlù Webè ne mèmè batentèkèle mwànà mukesè ewu byanza, bwà nsòmbelu wèndè àlambudiibwè Kùdì. Enzàku, Mukalenge, piikalàbi ne màalabà ùdikù, swàku bwà yèyè kwambula Mukenji wùdi baledi bèndè—bèndè munkacì mwà kutèeleja ewu, Nzambì. Enzàku nànkù. Ne ndi ndòmba bwà Wabèneshakù mèkù àbò, ne mwànà ewu àkoleshiiwbèku mu mibelu yà Nzambì, ne wikalakù mu—muyiidi

Wèbè wa dinanga. Tudi tuKupèèshayè mu Dìna dyà Yesù Kìlistò. Amen.

²² Èè, yèyè—yèyè ùdi ànu mwànà wa balùme wa maalu mîmpè. Kwàjìkì. Eyowà's, mukalenge. Kwènàku mufwànyine kulòmba cintu citàmbe kwikala cyà kalolo to, mmwòmò anyi? Kakwènàku cintu nànsha cìmwè pa buloba apa cìdi cifwànyine citàmbe kwikala cyà kalolo to, ncyà bushùwà, cipite kakwàcikwètù aku. Ànu imwemwe pa mimwemwe! Ki mbyà kalolo anyi?

²³ Ki musangu wùmwèpelè wùtùku mukàjyanyi wàlakana mudimu wànyì, mpàndì ngambula bânà abu. Yèyè ùtu munangè kwikala kubàmbùla. Ntu muciswe pàanyì, kàdi ntu misangu yònsò ànu nciina ne nkwèpi kungààlwà kubàcibula. Bòbò bàtu, nudi bamanye's, balenga ne bākèngela ànu kubèja, kàdi, nudi bamanye's, mba—mbakolàkàne kupita cyònsò citùdiku bafwànyine kwikala aci.

²⁴ Mpindyewu, mvwa munwàmbìle ne mvwa mwà kupàtuka . . . Èè, ndi ne tusuna ànu makùmi àsàtù ne tùtaanu cyanàànà. Nebikèngelè bwà ndwijakajè, kí mmwòmò anyi? Twànjàayibi kumòna. Ncyè—ncyè—ncyèna ne meeji a—a kwangataa cintu kampànda bibì, anyì kwamba cintu kampànda bibì to, kàdi nènteetè ne mwànyì mwònsò, bwalu. . . Nudi bamanye's, paanyimà pàà twètù bamanè kwendela mu njila wa—wa cibeeba ntàntà mule, katwèna—katwèna ànu ne bukolè bwà mudimu bu kale wàwa to, nudi bamanye's. Kilomèètà misangu mikwàbò yìtu yilwa mikolè, ne masangisha àbìdi anyì àsàtù ku ditùkù, mòna's. . .

²⁵ Nènku cìdi cyènza citùpà cinène, mbikèènà—kumòna abi's. Kuyiisha kakùtu kuntàcisha mèmè to. Ekèlekèle, ndi mwà kwimana kaaba aka ditùkù dijimà, kabyèna bintàcishakù to, kàdi ndi . . . Kadi ànu bikèènà—kumòna abi, nènku pàdi bantu mu miyiiki yà bàbìdi eyi, ki cìdìbo ne cyà kwikala naaci. Nwamònu anyi? Ki cìdìbo balwìle kaaba aka ncyòci aci. Ncintu cìdi kaciyi mwà kwakajii bwa ànu ku ditentekelangana dyà byanza nkààyaadì to. Bìdi bikèngela kumanya muji, mbangilu waacì, cìdi cìcìlèlè, cìdi cìcyènzè, ne pashiishe cìdi cìkèngelà kwenza bwà kupàtukamù ncinyì. Ki cìdìbo balwìle kaaba aka ncyòci aci.

²⁶ Mpindyewu, disangisha didi dìbanga, dyàbwàbwa dilòlò. . . anyì, to, nùmfwilèku luse, mmu diisàtù dilòlò, ku Shreveport, mu Louisiane. Nènku yònsò wa kunùdi udi ne balundà muntwaku, mòna's, àbàmbìlè bwà balwe. Life Tabernacle, ngeela meeji, ki kudìci—kudìci cibangila, ànu byòbì byenze ne cipicile mu nzùbu wa dibalaasa, bòbò mwà kumwangata, cìdi cibàpèèsha ndambu mutambidile wa mwaba wà kusòmba. Kadi bàdi ne cisàsà cyà kuulu, ne cibambalu cyà cinène cyà panshì, ne pashiishe ne cibambalu cyà mwìnshì mwà cyòci aci. Pa nànkù, ncyèna mumanye menemene bùngì bùdìbo mwà kusòmbesha to, kàdi cìdi. . . Byòbì kabiyi bikumbàna,

pàmwāpa tudi mwà kupeta nzùbu wa dibalaasa dinsambu adi, diikala mwà. . . Ncyèna mumanye ne mbùngi kaayi bùdi mwà kupeta myaba yà kusòmba, nànsha nànkù. Ntu mwenzènze masangisha kuntwaku, kadi ncyèna mvùluka to. Ewu mpungilu wa—wa ku cidimu ku cidimu.

²⁷ Kukaadi bidimu bisatu bîmvwà nsanganyiibwa kuntwaku, ki twètù kubanga ditabuluja, mu Dìnà dyà Mukalenge, ne kaditukù dijikà to, kubangila ànu piine apu. Kacya ànu dyàtùngunuka ne kuya, kacya ànu dyàtùngunuka; ditùkù dyònsò, bantu babwela, basungidiibwa, babàtijiibwa, ne bàtùngunuka ne Mukalenge mùshindù awu, bambi ne bikwàbò byònsò biikale babwela. Nènku tudi ànu. . . Pàcidibi ànu bitùngùnuka nànkù, ne mèmè ànupù, ndi muswè kudikumbula misangu yònsò, nènku ngeelamù ànu ànyì mēyì makesè ne—tuya kumpàla.

²⁸ Mpindyewu, aci necìbangilè mu diisâtù, ne kujika mu dyalumingu. Didyà dyà mu dindà dyà Beena Kilistò baa Kantu-ku-byanza didi. . . Ncyèna. . . ngaapu mwoyi dìnà dyà cilaala-beenyi aci. . . Ngeela meeji ne cidi. . . cidibo babiikila ne. . . Bòbò, nebànwambilè panwàfika kuntwaku. Ndidyà dyà dindà dyà beena kantu-ku-byanza's.

²⁹ Tuvwa ne cikondo cyà dicyònkòmoka kuntwaku, bwènnù nwènu beena kantu ku byanza mwab'ewu, musangu washàadi ewu kuntwaku. Mukalenge wàkasungila Laabi kampànda—kampànda, mu cimenga amu. Nènku, kaa, ncyèna mumanye byònsò bidi byenzeke to. Civwa ncikondo cyà dicyònkòmoka mu Mukalenge, kuntwaku, munkacì mwà kuyiisha pa Cipungidi cyà Mashi. Pa nànkù tudi. . . Ki cidi beena Yuda bamanye ncyòci aci; mmashi. “Kakuyi dyela dyà mashi panshì to, kakwèna dilekelediibwa to,” nudi numòna's.

³⁰ Mpindyewu tuyaayi buludi ku Dìyì, nènku nèngènzè ne mwanyì mwònsò bwà kukumbaja dīyì dyànyì kunùdi.

³¹ Nènku mpindyewu, bu Mukalenge mwà kwanyisha mpindyewu, mu dyàlumingu paanyimà pàà Noël, panwikalà mu diikisha dyènu ne biikale nunyunguluka, kòkù kakuyi busenu ne bikwàbò to, mòna's, wèwè—wèwè pabwìpì apa ku mutumba eku, mòna's, ùlwakù. Nènku tudi ne kiipàcilà kaa kwenza disangisha kaaba aka mu dyàlumingu mu dindà, dyà—dyà—dyà dyàlumingu paanyimà pàà Noël. Mmu ditùkù kaayi dyà ngondo dībà adi? [Muntu kampànda ùdi wàmba ne: “Dyà makumi àbìdì ne citèèmà.”—Muf.] Dyà makumi àbìdì ne citèèmà, ditùkù dyà makumi àbìdì ne citèèmà, nènku adi ndyàlumingu dyà paanyimà pàà Noël, ditùkù dyà makumi àbìdì ne citèèmà. Mpindyewu, cintu kampànda cyòci cyenzeke citùdi, cintu kampànda, katwena, cyà katùyì mwà kwikala apa. . . Katwèna bamanyè matùkù àcilwalwà to, nudi bamanyè's. Kadi cintu cyòci cyenzeke, mòna's, nwènu bàdi basòmbele pambelu

pàà cimenga, bàdi bàlwà, bu mùdi bantu bàà mu Memphis mwàmwa . . .

³² Mvwa njingaku kuumvwa Mwanèètù Ungren wimba *Wèwè Udi Munene's Wè*. Ne mèmè ncyèna . . . Yèyè ùdi kaaba aka dilòòò edi anyi?

³³ Nènku, pa nàнку, ne ntu misangu yònsò ànu ne bintu búngì cyanààná, nciyi mwà kubyèna byònsò abi to, ncyèna mwà kubyèna byònsò to. Nzambi ànùbènèshè, nwènù cisàmbà.

³⁴ Mpindyewu tubuululààyaaku mu Mifùndu mpindyewu bwà kubala ànu—ànu ndambu wa Mifùndu. Bwalu, piikalà mèyi ànyi apangila, Edi kadyàkupangilaku nànsha. Nènku díbà adi Nzambi neànùbènèshè bwà dishààla dyènù, ànu bwà diteeleja dyà Díyi Dyèndè. “Diitabuuja dìdi difuma ku dyumvwa, dyumvwa dyà Díyi dyà Nzambi.” Ncyà bushùwà anyi? Mpindyewu mùmvwà ngeela meeji. . . Panùdi, munkaci mwà kubuulula mu Yone Munsantu nshapità mwi6 apa, kubangila ku mvensa wa 60, nènku kubala too ne wa 71, mubadilaku. Yone Munsantu 6.60.

³⁵ Mpindyewu mvwa munkaci mwà kudyàmbidila ne, pàmvwa munkaci mwà kutangila pambelu ku dididiishi kukadi katanci, nènku mutàngile muaaya díbà kabwela ne kumòna mùdi bufuki bwònsò bwikale ne mukenji. Nènku pàdi cikondo cyà mashìka cilwa, mukenji awu, dyàkàmwe, ku bufùki, ùdi ùpwekesha màyi à mucì mu miji. Ùdi ùjiika.

³⁶ Bu mwàkamba Yobo ne: “Kaa, bu Wèwè mwà kunsokokaku mu lukita, bu Wèwè mwà kundamakù mu mwaba musokome too ne piikalàku ciiji Cyèbè cicolè.” Nènku mpindyewu, ki cyòci aci ne: “Bu Wèwè mwà kunsokokaku!” Nwamònu’s, yèyè wakamòna bu—bufùki abu, mucì awu, mwoyi upweka mu miji; Mwanèètù Way. “Nènku ushààlamu too ne padì ciiji cipita, ne pashiishe kumbiikila ne kunkosela cikondo.” Nwamònu anyi?

³⁷ Bufùki’s bùdi ne mukenji. Kùdi mukenji wà bufùki; kakwèna mùshindù nànsha mukèsè wà kuwùciinguluka to. Mmukenji wa bufùki. Ne pashiishe kùdi mukenji wà nyumà; kakwèna, pàaku, mùshindù wa kuwùciinguluka to.

³⁸ Mvwa ngàakula ne babàka bàbìdi mu mapingaja emu, pa bwalu abu, kanwèna mwà kubutula kashidi cintu nànsha cimwè to. Bantu kabèèna mwà kubutula kashidi to. Bàdi mwà kusùnsula, kàdi kabèèna mwà kubutula to kashidi. Nènku munga muntu kwambayè ne: “Èè, kàdi anji amba tung bwà kwangata dibèji ne kudyòsha, aci cidì cidibùtula anyi?” To, mukalenge. Cidì civingutula ànu mishindà cyanààná, luuya lwà kapyà alu. Cidì cyàlukila buludì ku ma-gaz, ciwàci ku cibangidilu aci. Kwèna mwà kubutula kumana to. Nènku bu buloba ebu mwà kunèngà ndambù, ma-gaz àmwèàmwè awu, cyòci aci ne—ne mishindà yivwà mu dibèji adi ayi, bidì mwà

kwalukila kàbìdì ne kwikala dibeji cyàkàbìdì. Ncyà bushùwà. Kwèna mwà kubutula kumana to. Mmwòmò.

³⁹ Nzambì, díbà adi. Kwòkò kwikàle dibìikà dyà ku lufù dyà bintu byònsò, byàlukila cyàkàbìdì, ne kakùyi dibùtudiibwa to, kùdi dibìikà dyà ku lufù dyà mwakanè, èyowà, nènku tudi ne cyà kwalukila. Ki cyònsò cidìku pa bwalu abu aci. Kakwènakù mùshindù mukwàbò wà dyenza nànsha umwe to. Nànsha bakwòsha bakushiya butù, nànsha wèwè mufwè mu màyi, nànsha byenzèkele penyì, kabèèna mwà kubùtula kumana to.

⁴⁰ Vùlukààyì ànu ne katùpà ne katùpà kònsò kàà mubidi wèbè kavwa mwaba ewu, pavwa Nzambì mwambe ne buloba bwikaleku. KutèekaYè mubidi wèbè mwab'ewu ànu piine apu. Nènku kakwèna cintu nànsha cìmwè cidì mwà kuwùmusha to ànu Nzambì. Byònsò abi mbyàlukile cyàkàbìdì mu byanza Byèndè. Nwamònu anyi? Ne Yèyè udi Ewu, Ewu ùvwa, Mufùki awu, ùvwa n'Yèyè Wàkenza mulayi awu, pa nènku tudi batwishiiibwe ne kùdi Mwoyi wa Cyendèlèlèlè. Ne tudi ne ditwishiiibwa munda mwà mwoyi wètù mpindyewu, bwà ne mpindyewu tudi ne Mwoyi wà Cyendèlèlèlè, Mwoyi wa Cyendèlèlèlè wùdi kawùyi mwà kufwà to, munda mwètù mpindyewu. Èyo.

⁴¹ Yone Munsantu 6. Tubangilaayi mpindyewu ku nshapita mwi6 wa Yone Munsantu, tubangila ku mvensa wa 60.

Ki bwà cinyì bààbùngì bàà ku bayiidi bèndè, pàakumvwabo, pàakumvwabo eci, kwambabò ne: Edi ndìyi dikolè be; udi mwà kuditèèleja nganyi?

Dìbà adi Yesù ùvwa mumanye...yèyè mwine ne bayiidi bèndè bàvwa banungana bwà cyòci aci, ki kubàmbilayè ne: Eci cidì cinulendwisha anyi?

Ambaayi túng...bu nwènù mwà kumòna Mwànà wa muntu ùbànda kùwàye kumpàla aku?

Cidì—cidì nyu...nyumà ke udi ufila mwoyi; nènku mubidi kawèna ne dikwàcisha ku cintu nànsha cìmwè to: mèyi àndì nkwambila, adi nyumà (awu's n'Yèyè), ne àdi moyi. (CyàkambaYe ncinyi? "Mémè ndi Bulelèlè, Mwoyi.")...àdi nyumà,...àdi mwoyi.

Kàdi kudi bàmwè bàà kunùdi bàdi kabàyi bìitabuujà to. Bwalu Yesù ùvwa mumanyè kwambwila ànu ku cibangidilu aku ne mbanganayi bàvwa kabàyi bamwitabuuje, ne nganyi uvwa mufwànyine kumutungila.

Ki yèyè kwamba ne: Ki bwà cinyì mémè ndi nkwambila nwènù aba ne, muntu nànsha umwe kèna mwà kulwa kùndì to, ànu bimupèèbwe kùdi Taatu wanyi.

Nènku *kubangila ànu piine apu bààbùngì bàà ku bayiidi bèndè kwalukilabo, ne kabàciwwa kàbìdì bènda nendè to.* (“Díyì dikolè,” nwamònu’s, kabàwwa mwà kudyàngata to.)

Pashìshe ki Yesù kwambilaye bàà dikumi ne bàbìdì ne: Nudi pèènù baswè kuya anyi?

Dìbà adi Simona Peetèlo kumwandamunaye ne: Mukalenge, nkwa nganyi wètù kutwàyà? bwalu wêwè ngudi ne mēyì à mwoyi wà cyendèlèlè.

Nènku tudi twitabuuja aci ne tudi batwìshìibwe ne wêwè ngudi Kìlistò awu, Mwànà wa Nzambì udi ne mwoyi. (Ekèlekèlè!)

Yesù kumwandamuna ne: Ncyèna munusungule nwènù dikumi ne bàbìdì aba anyi, kadi umwe wa kunùdì ndémon?

Ùrwa wàkula bwà Yudààsà Mpongoloki mwànà wa Simona: bwalu yéyè ki uvwa ne cyà kumutungila awu, mwìkàlè umwe wa ku dikumi ne bàbìdì abu.

⁴² Mpindyewu, byòbì bikèngela bwà mèmè kwinyika cyena-bwalu eci dilòòlò edì, ne kuteeta ne mwànyì mwònsò bwà kwenza nàнку mu cyàbìbìdì cyà dìbà, Ndi muswè kwakula pa: *Mishindù Yisàtù Yà Beena Kwitabuuja.*

⁴³ Nènku ntu ncyàmba pa ciibidilu. Ki mèmè kudyàmbidila ne: “Èè, nengìtabuuje ànu ne nēnyìshèkupù, mu mapingaja emu.” Mèmè kudyàmbidila nàнку.

⁴⁴ Dyàmbedi mbeena kwitabuuja, beena kwitabuuja bàà budìngìbudìngì, ne beena bupidyà. Mpindyewu, aci’s ncyè—cye—cyena-bwalu’s. Kàdì, mbulelèlè ànu bu mutùdì basòmbe kaaba aka dilòòlò edì emu, musumbà awu utu misangu yònsò udisangisha pàmwè. Mwaba wònsò ùdì bantu bakungwila awu, tudi tusangana musumbà ewu, ne tutu misangu yònsò tuyìpeta, ne pàmwàpa netwikale misangu yònsò ànu naayi too ne ku Dilwa dyà Mukalenge. Nènku ndi muswe bwà twètù, dilòòlò edì, bwà kudìfwànyìkija twètù biine, bu mùndì ngààkula bwà misumbà yisàtù eyi, ne kumòna ne tudi mu musumbà kaayi.

⁴⁵ Mpindyewu vùlukàayi ne, ndi ngààkula kaaba aka pàmwàpa ne. . . Èkèleeziya ewu, udi mupate cyàkàbìdì dilòòlò edì, eku ne eku, ku bimanu ne mu tujila, kàdì ndi kàbìdì ngààkula ne buloba bujima. Nwamònu anyi? Mu bitùpà byònsò bishìilèshìilàngàne byà buloba, mikàbà yà mēyì eyi yìdì yinyunguluka, midimu yà bwambi yà mikàbà yà mēyì.

⁴⁶ Mpindyewu ndi muswè kwakula pa mishindù yisàtù mishìilàngàne yà beena kwitabuuja mpindyewu. Mpindyewu vùlukàayi ne, *beena kwitabuuja*, cyena-bwalu cyànyì *mbeena kwitabuuja*. Umwe wa kùdìbo mmwena kwitabuuja mulelèlè,

ne udi ulonda mmwena kwitabuuja wa budingibudingi, ne udi ulonda mmwena bupidyà. Nwamònu anyi?

⁴⁷ Mpindyewu, musùmbà wa kumpàla utùdi tujinga kwakulapu, ngwà mwena kwitabuja. Bwalu, ndi ngeela meeji ne bivwa bikèngela bwà kwikalaye wa kumpàla, bwalu yèyè ki udi witabuuja cyà bushùwà, mpindyewu, ùdi witabuuja mùvwà bayiidi bìtabuuje kaaba aka. Netwikale mwà kukwata mudimu ne dibala dyà Mufundu ewu bu cileejilu. Mpindyewu, dyàmbedi mbeena kwitabuuja, beena kwitabuuja bashuwashùwàale. “Ne diitabuuja didi difuma ku dyumvwa, dyumvwa dyà Díyi dyà Nzambi,” Díyi dyà Nzambi, didi diikale Kilistò. Nwamònu’s, beena kwitabuuja!

⁴⁸ Mpindyewu, nuvwà batabalela cishìmbì díyi cyàshìyibù kùdi mwena kwitabuuja ewu anyi? Mpindyewu, mwena kwitabuuja kèna ne cyà kwikala muntu wa meeji matwè mu mùshindù wà bàà pa buloba wà kwikala mwena meeji matwè awu to. Kabyèna bikèngela bwà kwikalaye muntu mulonge tùlaasà mu mùshindù ùdi bantu aba bateeta bwà—bwà kwamba ne bìdi bikèngela bwà wèwè kwikala nàнку to; kàdi kabyèna bikukènge nàнку to. Nudi. . . Muntu udi mushiye cishìmbì díyi ewu, Bible Yèyè mwine mmwambe ne yèyè ùvwa “mupangi” ne “kayi mulonge kàlaasà to.” Peetèlo, kàvwa menemene ubadiibwa bu muntu wa meeji to.

⁴⁹ Mu Yeshààyi 35, mbàmbe ne: “Nekwikale cibeeba, ne njila, ne nebàmubiikile ne: ‘Njila wa cijila.’ Mukooyike kàkopicilamù to.”

⁵⁰ Mvwa nyiikilangana ne umwe wa ku balami mu mapingaja emu, bu mutùvwà tuyukila bwà dyela dyà bilamba pa màyi, ne cyà cipyacipyà eci. Mèmè kwamba ne: “Kùdi bilamba byàbùngì byela pa mishiki yà màyi, ne pa bisènsè leelù ewu.” Ki mèmè kwamba ne: “Kàdi kudi cilamba cimwèpelè cinène cìdi cyùmuka pa buloba apa ciya ku Butumbi, cìdi cìbìikidiibwa ne: ‘Cibeeba cyà Mfùmù.’ Mukooyike kààkopicilamù to.” Ncyà bushùwà. Nci—cibeeba cìdi ciibaka kùdi Kilistò Mukalenge wètù, cilamba cìdi cyenjìlbwè kuumukila pa buloba ebu too ne ku Buloba bukwàbò, ne mukooyike kèna upicilamu to.

⁵¹ Peetèlo, muntu udi kàyi mulonge kàlaasà ewu, wa. . . mwimane pabwìpi, pààkamònàye Díyi dishindika mu ndòndò dyà ditùkù, divwà Nzambi mulaye mu ditùkù adi ne nekwikale Kampànda wàjuuka bu—bu Mupròfetà munkacì mwàbò. Ne Simona uvwa ne lutàtu bwà kuciitabuuja, bwalu kuvwa kufwànyine kwikala ditentula bùngì cyanàànà dyà Cyòci aci. Kadi pààkamònàye Díyi dishuwashùwàale, divungulula dyà cikondo aci, ne kuMumvwaye Umumanya bitooke too, ùvwa—ùvwa mutwishìibwe bulelèlè ne Yèyè ùvwa Nganyi. Nèngu yèyè ngwákamba ne: “Mukalenge, nkùdi nganyi kutùdi bafwànyine kuya?” pààkamukonkabo.

52 Pavwa mi—misumbà yà bantu munkaci mwà kutapuluka, pankaci pàà beena kwitabuuja, ne beena bupidyà, ne beena kwitabuuja bàà budingbudingi, busatu bwàbò bwònsò bàvwa biimane ànu mwaba awu mu cisumbu cyà bantu cimwèpelè aci; beena kwitabuuja, beena kwitabuuja bàà budingbudingi, ne beena bupidyà, bàsanganyibwa ànu mu nshapità ewu mwaba ewu mene. Nènku bwalu Yesù ùkaavwa mwakule Mèyì mùshindù ùvwaYe mwakule awu, àkatàpulula disangisha Dyèndè. Kadi cidi ne cyà kwenjiibwa's.

53 Ûvwa muntu munène pàvwàYe wondopa babèèdi, kadi pààkafikabi ku Dilongesha ne cipròfetà, ki cyàkatapulula bi—bisota ne blé. Nwamònu anyi? Bisota byòbi bitu ànu bijingila blé cyanànà. Ki m'blé nànsha. Kabèèna mwà kukwàta naabi mudimu to. Munda mwàbi mmutupù. Kakwèna Mwoyi munda mwàbi nànsha. Ncizubu, ne kacyèna mwà kushàala ne blé to. Kacyàkupyàna pàmwè ne blé nànsha. Ne pa nànkù bikaadi ne. . . Ànu lutete ke lwena bwalu butùdi twamba, mwoyi wà lutete lwà blé.

54 Mpindyewu mònaayi, Peetèlo ùvwa mutwishùbwe ne Yèyè awu ki uvwa Maasiyà awu. Mpindyewu, civwa bakwàbò bònsò bambe kacivwa ne civwaci cishintulula to. Civwa bakwidi bambe kacivwa ne civwaci cishintulula nànsha. Simona Peetèlo kavwa ucyùka civwa èkèleeziyà wàmba to. Ûvwa mutwishùbe, yèyè mwine.

55 Yesù wàkamwambila, mu mwaba kampànda wàkakonkaye ne: “Bantu bàdi bàmba ne Mèmè ndi nganyi?”

56 “Ne bàmwè mbambe ne Wèwè udi ‘mupròfetà,’ ne bàmwè mbamba ne Wèwè udi ‘umwe wa ku bapròfetà bàà kale mujuuke,’ ne—ne Wèwè udi ‘Mòsà,’ anyi ‘Eliyà,’ anyi muntu kampànda.”

Yèyè kwamba ne: “Mèmè ndi nnùkonka *nwènù*. Nudi nwela meeji kaayi?”

57 Ki Peetèlo ne: “Wèwè udi Kilstò, Mwànà wa Nzambi udi ne mwoyi.”

58 Yèyè kwamba ne: “Udi mubènèshùbwe, wèwè mwànà wa Yona; Simona, mwànà wa Yona; bwalu munyinyi ne mashi ki mbikubulwilekù eci nànsha. Kùtukù mucilongèle mu mukàndà kampànda, anyi mu twitabàayi kampànda, anyi mu kateshismu kampànda nànsha. Wèwè. . . Taatù Wanyì, udi mu Dyulu awu, ngudi mukubuulwileci.” Ki mwena kwitabuuja mushuwashùwàle nyèyè awu; dibuulula dyà nyumà dyà Dìyì. Nwamònu anyi? Nènku ku. . . “Wèwè udi Simona, kadi pa lwwebwe elu, pa dibuulula dyèbè dyà ne Mèmè ndi Nganyi, nèNgilibakilèpu Ekèleeziyà Wanyì, ne biibi byà iferno kabyèna mwà kuMutàmba bukòlè to.” Nwamònu anyi?

Kabyèna bikemesha to pààkambà Simona ne: “Nkudi nganyi kutùdi bafwanyine kuya?”

Yesù kukudimuka e kwamba ne: “Nudi pèènù baswè kuya anyi?”

⁵⁹ Ki bôbò kwamba ne: “Mukalenge, nkwa nganyi kutùdi bafwànyine, kutùdi bafwànyine kuya ki kwépi? Bwalu, Wèwè nkààyebe ngudi ne Mèyì à Mwoyi. Udi ànu Wèwè nkààyebe.”

⁶⁰ Bwalu, Yèyè kavwa ànu ne Mèyì à Mwoyi to, Yèyè ùvwa Dìyì dyà Mwoyi. Nwamònu’s, Yèyè ùvwa Dìyì dyà Mwoyi, ne Simona wàkajingulula cyôci eci mu ndòndò. Nènku pàakacijingululaye, ki cyàkamulamà pàvwaye mwimànyina, bwalu cyàkabuuludiibwa kudiye ne Yèyè nguvwa Dìyì didi ne mwoyi adi.

⁶¹ Mpindyewu, awu ke mwena kwitabuuja mushuwashùwàle, pàdi Nyumà Mwimpè; ki nkampànda mutwishisha kùdi kampànda mukwàbò to, kakùyì kùdi cingà cintu nànsha. Kadi pàdi Nyumà Mwimpè mukubuulwile Dìyì Dyòdi diine, ne wèwè umòna Dìyì ditòkeshiibwe tòdò, dishindika; dîbà adi Nyumà wa Nzambi ulwalwa ne ubwela mu cikondo aci, bwà Dìyì dyà cikondo aci, ne uDìmwènesha.

⁶² Mmunyi mùvwà muntu mwà kubenga kwitabuuja Luther bu yèyè mucimanyè? Luther uvwa mulongolodi wa maalù. Nyumà wa muntu wàkapàtuka kwaka bwà dilongolola. Wesley, mùshindù ùmwèumwè awu. Byàkakèngela bwà kuciitabuujabò. Nwamònu’s, aci civwa—aci civwa mukenji bwà cikondo cyà èkèleeziyà. Ki civwa cyenzeke menemene ncyôci aci. Ki civwà ne cyà kwenzeka ncyôci aci. Bivwa bikèngela bwà wèwè kuciitabuuja.

⁶³ Nènku’s ki twètù aba, bafika ku Cikondo cyà Laòdikiyà. Ne tudi bayiile, mu Cikondo cyà Laòdikiyà ne, Kilstò ùvwa mwediibwe pambelu pàà èkèleeziyà Wèndè; ne mwikale mene ukookola ku ciibi, uteeta bwà kwalukilamù. Nànku patùdi tumòna cyôci aci cyenzeke, tudi bamanye ne mmu cikondo kaayi mutùdi ne mwoyi.

⁶⁴ Nènku, dîbà adi, tukàadi ku dyoya dyà maalù malonda à buloba ebu. Mukàndà ukaadi mpindyewu munkaci mwà kujika. Mulongo wà ndekeelu newùfundii bwemu dîngà ditùkù, ne wòwò newùkangiibwè, dîbà adi cikondo kacayàkwikalaku kàbìdì to.

⁶⁵ Nènku kudi dinaya dinène didi dyenda dilongolodiibwa. Ne Banjèlo mbiimàne kuulu kwà maulu, bàbandila. S’nudi bamanye cìdi dinaya’s. Banayi bàkaadi badilongòlole. S’nudi mwà kubàmòna mudibo benza maalù.

⁶⁶ Nudi mwà kumòna muntu mubi awu ùnàya’s. Nudi mwà kumòna muntu mubi wa mu dinaya adi awu, mùshindù udiye ubwela mu cyalu ne budimù bwèndè, bwà kuseeswisha.

⁶⁷ Kadi nudi kàbìdì mwà kumòna Èkèleeziyà mwambwiibwe mwikale uDilongolola. S’ncyalu cilenga be. Nudi mwà kumòna Bwikadi bwà Nzambi bwikale bushindika ne bwenza dinaya

dinène didi didyànjila kwamba mu Bible emu edi, bwà kudipátuladi patòòke. Cikondo kaayi cyà kwikala ne mwoyi, cikondo citàmbe kwikala cyà butùmbi's wè! Bantu bà bikondo byònsò batu bajingejinge cikondo eci. Bapròfeta bàà kale bààkajinga bikolè bwà kumòna díbà edi, kadi kabàvwa bapeté dyèse edi to.

⁶⁸ Mpindyewu, awu ki mwena kwitabuuja. Bwalu, yèyè wàkacimòna. Wàkaciitabuuja. “Tudi batwishùbwe menemene ne Wèwè udi Kilistò, Maasiyà awu, Díyì dyà Nzambi bwà ditùkù edi, ne tudi twitabuuja nànkù.” Nwamònu's, awu ùvwa mwena kwitabuuja mulelèlà.

⁶⁹ Twanjààyibi kwangata ànu ndambu mukwàbò wa beena kwitabuuja, lukasalukasa, kumpàla kwà twètù kuya ku muntu udi ulonda. Twangatààyibi mupròfeta, Noa. Pàvwàye, mwikàle misangu mikwàbò cidime, pàmwàpa uvwa mu miine matùkù awu, cidime. Kadi pàvwà baseki ne beena-ntèndeleeleu bàà mu ditùkù adi. . . Èkèleeziyà ùvwa mufike mu ngiikàdilù mubi menemene, ne Nzambi kwakula ne Noa, ne kwambila Noa ne ùvwa ne cyà kwibaka bwàtù. Noa kàakakòkanganakù ne Nzambi pa cyòci aci nànsha. WàkaCiitabuuja, ne Cìvwa n'Díyì dyà Nzambi, ne wàkaya kakwàta mudimu ne lukasa lwònsò mwikale ulongolola bintu tàyàdi.

⁷⁰ Ke mwena kwitabuuja mulelèlà nyèyè awu. Kukokyanganyi pa bwalu abu to. Paùdi mutwishùbwe mu ndòndò, kwàjiki. Ànu mudi muntu kanà yònsò ewu, diitabuuja kanà dyònsò edi, mùshindù wònsò. “Diitabuuja didi difuma ku dyumvwa.” Bu wèwè mwà kwimana apa, nànsha ngàngàbukà mwambe ne ncinyi cidi cikutàcisha! Nànsha mùdibi ne, muntu awu mmukupe dijandula dyà disaamà, ne pàmwàpa mmumanye ànu menemene cidiye wamba aci, bilondèshila mùdi byamwù byèndè byà mudimu ne dimanya dyèndè mwà kumwanyishila bwà kumanyaye amu, kadi wamba ne cidi cikushàadile cidi ànu ndufù. Kadi, wèwè usambila, ne mwimane kwàka mu matùkù àcilwalwà mwikàle mwà kumòna mulùme anyi mukàjì musangale mwimane kuntu kwàka. Èyowà, s'kwàjiki. Nènku s'nkumana kujika. Neùbwelè buludi mu cyòci aci bushùwà menemene, bwalu udi ùciitabuuja. Nzambi ngudi mucyàmbè. Wèwè udi mumanye ne bidi nànkù.

⁷¹ Byenze bu mukàjì mutekète wakòsolu kansère kalòpòk'ewu, nwamònu's. Kakuvwa mpatà nànsha mikese mu meeji èndè to, bwà ne aci cìvwa ne cyà kwenzeka. Kansère kàvwa kafwè, ne kulamukaku, ki kòkù kàyààya kakà's. Nwamònu anyi? Kwàjiki. Udi uciitabuuja.

⁷² Byenze bu taatù watwàdi mwanèndè mukese wa balùme, kukaadi katanci, muntwemu awu. Ne ùdi mwab'ewu mu citanda emu mwaba kampànda mpindyewu. Mwànà mukese wa balùme ewu uvwa mudikuma cibula, ne mujimije civùlukilu cyèndè.

Kàvwa mwà kuvùluka cintu nànsha cimwè to. Ànu mu katanci kakesè cyanaànà, paanyimà pàà disambila, mvèmè kumukonka dìnà dyèndè. E kungambilaye, ne bidimu byèndè, nènku ki yèyè awu tumatuma mwèndè ne kale ànu mùdì nsongàalùmè kanà yònsò ewu. Nwamònu anyi? Bàdi biitabuuje. Nènku pàdi Nzambi wamba cintu kanà cyònsò, cidi ne cyà kwikala mùshindù awu.

Ne Noa wakiitabuuja Nzambi, ne Noa wàkabadiibwa bu mwena kwitabuuja.

⁷³ Danyèlè, pàvwà èkèleeziyà mu bupika mu Baabulòònà, Danyèlè ùvwa mwitabùùje Nzambi. Nànsha mwine mùvwabo bambe ne: “Netwèle mukenji amu. Bòbò kabààkusambilaku nzambi mukwàbò to ànu lupìngù lùdì pambelu pààpa lwàlwa,” lwà muntu munsantu ewu, anyi nì ncinyi cidìlu lufwànyine kwikala aci. Danyèlè kààkateyaku ntèmà ku biine abi to. Yèyè ukaavwa muumvwe Nzambi, bwalu yèyè ùvwa mupròfeta, ne Dìyì dyàkalwa kùdiye. Nènku pàvwà ntempèlò mubanjiibwe, bàkamba ne: “Muntu kanà yònsò yèyè mu lutàtu mu ditùnga kanà dyònsò, ne mutàngilè mu nùnkù lwà ku mwaba wa cijila ewu, ne musambilè, dībà adi watèeleja mu Dyulu.” Nènku Danyèlè ùvwa mwitabuuje Nzambi. Ùvwa mwena kwitabuuja mushùwashùwàle, nènku nànsha nyama yà ntambwe kayìvwakù mwà kumudyà to. Ne aci ncyà bushùwà, nwamònu’s, ùvwa mwena kwitabuuja. Ùvwa ne cintu kampànda cilelèlè ne cishùwashùwàle. Ùvwa mwena kwitabuuja.

Daviidì, mwena kwitabuuja mukwàbò, mwànà wa balùme mukese mudyombòdiibwe.

⁷⁴ Danyèlè kààkalamakananganaku ne èkèleeziyà wa cyena leelù awu to, anyi Noa kààkalamakananganaku ne èkèleeziyà wa cyena leelù awu to. Nànsha kakesè. Bàvwa beena kwitabuuja mu civwà Nzambi mwambe ne m’Bulelèlè aci. Bàà pa buloba bàà cyena leelù nànsha bàmbe cinyi, bààkiitabuuja bòbò civwà Nzambi mwambe ne m’Bulelèlè. Ki beena kwitabuuja bashùwashùwàlela mbòbò abu.

⁷⁵ Byà mwomùmwe ànu ne mwàkenza Peetèlo, ne bàpostolò, bààkiitabuuja ne Yèyè uvwa ne Dìyì dyà Mwoyi ne ùvwa Dìyì dyà Mwoyi. Mémè ndi ngiitabuuja cintu cimwècimwè aci leelù ewu. Ne cikwàbò cintu cyònsò cidi ciikàle cibengangana ne Cyòci aci ncyà cyanaànà, kí ncyòci to, ndufù. *Edi* nkààyadi ki Dìyì dyà Mwoyi, ne Kilistò n’Dìyì.

⁷⁶ Mpindyewu, Davidì, muntu mukùnzùbile. Cyàkumpàla, pàmwàpa bàvwa bàmuyòbola kudi bânà bààbò, bwalu kavva kantu kàà katùpà. Kàvwa ne bunène bukùmbàne bwà kwambula cingoma nànsha. Kavva mwà kuya ku mvità to, ne ùvwa mutàmbe kwikala kanyìikanyì wa muncyoncyo. Kadi, nànsha nànkù, kupatukaye kuntwaku, bu mwena kwitabuuja.

⁷⁷ Nènku pàvwaye musòmbe paanyimà pàà cipèlèlè apu (mwikale ùkùba ma—makùmi makesè àà mikòòkò yìvwà

tatwendè mumupèeshe bwà kutangila ayi, ne ndundu wa nyuunyi, mu citùpà cyà buloba müdi nyama yà ntambwe ne ours ne mibwàbwà, ne bikwàbò), Davidi wàkabanga kutangila mu mpàta wa lutende lubishi lwà mu ditalàji alu, ne kumanyaye civwà kushikama kwà mu ditalàji kuumvwija bwà mùkòòkò, ne kulààla mu luya lwà dībā; ùvwa mumanye civwà màyi mimpè, matalalè à kunwà ùmvwija, bu mwàkambàye ne: “Bu mudi ngulungu ni nyoota ujinga kasulu kàà màyi, musùùkà wànyì ùdi ne nyoota ukujinga Wèwè, Èyi Nzambi.” Nwamònu anyi? Ùvwa mwele mbila, musambile.

⁷⁸ Nènku dīngà ditùkù bwalu bwà cimpicipi kjuukabò, nyama wa ntambwe kukwàtaye ùmwè wà ku mìkòòkò yèndè, e kuya lubilu. Kwelaye meeji ne: “Nzambi udi mungenze mèmè ùdi ku mutù kwà nyama wa ntambwe!” Nwamònu anyi? Ki kwangataye ndundu wa nyuunyi ne kubyànkulayè nyama wa ntambwe awu panshi, ne kaalusàkàlàbwà kakesè mu ndundu wa nyuunyi amu. Mpindyewu, ni kukaadikù muntu mumòne nyama wa ntambwe, umwe wa ku nyama ya ntambwe ya mu Àfrikè mwàmwa ayi, nyama yà ntambwe yà nshingu minène yà myòsa yidibo naayi mu Palestine ne mu Asiya, mmufwànyine kumanya civwà umwe wa ku yòyi ayi mwikale. Pààbi, cingoma cinène cyà calibre citàta bwà kumutuuta panshi, kadi yèyè wàkamutuuta panshi ne lusàkàlàbwà. Nènku pààkamulonda nyama wa ntambwe mu nyima, wàkamubakwila ku mwedi kadi kumushebeyayè. Ki bwà cinyi ùvwa mumanye civwàye wamba; ùkaavwa ne dilabula. Ùkaavwa mwele Nzambi ku diteeta, pa bìdi bitangila Dìyi Dyèndè.

⁷⁹ Ne yèyè—yèyè kàvwa uciina Goliyàtà to, bwalu, kàvwa mutengula to. Kàvwa mwena kwitabuua to, nànsha kakesè; kadi pààkapatuka Goliyàtà e kumwela mulawu mu dīnà dyà tunzambi twèndè.

⁸⁰ Ki Goliyàtà, munène misangu mivule kumupita; muntu munène menemene wa katanku, ne minu bule bwà centimètres makumi asatu ne itaanu ne citùpà. Mpindyewu, minu mmifwànyine kwikala bule nànkù awu, nwamònu’s, centimètres makumi asatu ne yitaanu ne citùpà, mulwanganyi wa mvità. Ne mīngà misangu muvwàle nkooci wa cyàmù pambidi pèndè, Pàngâpa ùvwa ne bujitu bwà kilos lukama ne makumi asatu ne yisambòmbò, anyi misambùke, nwamònu’s, yìwàye mwambùle. Cifulu cyà mvità, ne cinène . . . pàngâpa cyà cyàmù cyà mupimbu wà centimètres yinaayi. Muntu munène wa kafyondo mùshindù awu, mwikale wèndà ne—ne mulangala wa bule bwà mètres asàmbòmbò. Ùvwa ne difumà dyà mètres asàmbòmbò mu cyanza cyèndè. Mpindyewu mmunyi mùvwà muntu mufwànyineku mwà . . . Muntu wa bwena awu ùvwa ànu mwà kwimana e kubàkula bantu dikumi ne bàbidi, e kubàkupa mùshindù awu, pàvwàbo bènda bàlwa apu. Ndikàndameena kaayi adi’s wè!

⁸¹ Nènku ki yêyè awu, mwimane mwaba awu, udibandisha yêyè mwine, wàkula ne dyambu. Pààbi...mbyenze ànu bu ne mbakubambidikile panshi, nudi numòna's, yêyè kwamba ne: "Lekela...Kanwèdì mashi panshi to." Yêyè ne: "Muntu alwe—alweku bwà kulwangana naanyi, nènku pashiishe mèmè mucimùne, dībà adi nwènù bònsò nenùnkwaicile mudimu; ne pashiishe bu—bu—bu nwènù mwà kucimuna, dībà adi's netùnukwàcilè nwènù mudimu." Nwamònu's, pàdì dyabulu wela meeji ne mmukubambidikile panshi, nwamònu's, ke dība didiye uswa kukwenzela mukaaka wèndè awu. Kadi kutwilanganaye ne muntu uvwa kayi ukengediibwa to. Wàkatuutakeena ne muntu uvwa mutambe kwikala wa kimpimpinyàmà mu ditunga, kaamuntu kakesè, kàà tukaaya tukobame, kalùmyànà kakùnzùbile.

⁸² Yêyè kwamba ne: "Nudi baswè kungambila ne nwènù, ci—cilwilu cyà Nzambi udi ne mwoyi, nushaala biimane mwaba awu kadi kulekela mwena Peleshèete udi kayi mutengula wàwa wela cilwilu cyà Nzambi udi ne mwoyi kadyòmbò anyi?" Mòna's, yêyè's uvwa mutàcishiibwe kùdì cyòcì aci! Bwà cinyi? Bwà cinyi? Úvwa mwena kwitabuuja. Bakwàbò bàvwa beena kwitabuuja bàà budingibudingi. Nwamònu anyi? Nwamònu's, úvwa mwena kwitabuuja mushùwashùwàlè. Yêyè kwamba ne: "Panwikalà nuciina, nyààya kalwangana nendè." Nwamònu anyi? Kadyòmbò kaayi aka bwà kalumyànà kakesè nànkù! Ne pa nànkù yêyè úvwa mweèna kwitabuuja, ne wakenza ànu menemene civwaye mumanye ne Nzambi neènzè. Yêyè ùdì . . .

⁸³ Mwena Peleshèete uvwa kayi mutengula awu pààkamwelaye mulawu mu dīnà dyà tunzambi twèndè, mwàkambaye ne: "Ndi kabwà anyi; bwà kànà kakesè menemene kempatukile mùshindù awu anyi? Mòna's," yêyè ne, "nènkambulwile ànu ku lusongo lwà difùmà dyànyì eku, ne nenkukùdike kuulu kwà mucì kwàka bwà nyuunyi yidya mubidi wèbè awu." Kaa, ekelekele! Kaa, awu's úvwa muntu mubi be!

⁸⁴ Davidì kwambaye ne: "Wèwè udi utwilangana naanyi ne mwele wa mvità ne difùmà, ne byà mvità. Udi utwilangana naanyi mu dīnà dyà mwena Peleshèete. Kadi, mèmè ndi ntwilangana neebè wèwè ncìyì mwelè wà mvità anyi difùmà, byà mvità to, kàdì ndi ntwilangana neebè mu Dīnà dyà Mukalenge Nzambi wa Izàlèèlà."

⁸⁵ S'ki bwalu mbwòbù abu. S'ki mwena kwitabuuja awu. Ki lumbu lwèndè ndólo alu. Ki ngabu wèndè nyêyè awu. Ki ngabu wèndè nyêyè awu. Amen! Ki cìvwa ne cyà kwikala ngabu wa Èkèleeziyà ncyòcì aci. Mwena kwitabuuja kanà yònsò ewu, Awu's ke wèndè ngabu. Cidì cyenzeka nànsha ciikàle cinganyi, cidì bàà pa buloba bàmba, cintu cikwàbò kanà cyònsò, ngabu wènù m'Mukalenge Nzambi wa Izàlèèlà. Ki cyòcì aci. "Dīnà dyà Yesù Kilistò didi lumbu lukolè, baakàne bàdì banyemenamu

ne bàshààla bakubiibwe.” Ki wetù ngabu nyèyè awu, n’Yesù Kilistò.

⁸⁶ Mònaayi, nènku pààkenzekabi, tudi bamanye cyàkenzekà. Davidi, kayi ne mwaba wà kwasayè nànsha ànu kaaba kakesè aku pààkapwekeshaye cyèndè—cyèndè—cyèndè cibwikilu mumpàla mwèndè amu. Kaaba kamwèpelè kàà kwasa kavwa ànu mwaba ewu mumpàla mwèndè emu. Nènku kumpàla kwà yèyè kumòna mwà kufika mu ntàntà kampànda ne mu—muntu wa mpolondo awu, Nzambi wàkaludikila cimanyinu cyà cishipangana aci, ne wàkashipa muntu wa mpolondo awu. Nwamònu anyi? Nzambi ngwàkacyenza. Mpindyewu, tudi tumòna ne yèyè ùvwa mwena kwitabuuja.

⁸⁷ Mpindyewu, mukwàbò mwena kwitabuuja ùvwa ng’Abraham, ne ùvwa wa ku . . . Mwena Kasàdà wa mu cimenga cyà Ula. Nènku yèyè wàkabiikidiibwa bwà kwenza cintu kampànda cìvwa . . . ne kwitabuuja cintu kampànda cìvwa ànu menemene, mu mubidi emu kaciyi mwà kwenzeka to. “Kadi yèyè kààkatenkakanaku ku mulayi wa Nzambi ku bupidyà to,” mùdi Loomo 4 wàmba, “kàdi ùvwa ne dikàndà, ùfila butùmbi kùdi Nzambi.”

⁸⁸ Pàvwà Abraham ne bidimu makumi mwandamutekète ne bitaanu, ne mukàjèndè ne bidimu makumi asambòmbò ne bitaanu, ne bàvwa basòmbè pàmwè kubangila pàcìvwàbo bansonga. Ùvwa mwanààbò wa bakàji wa mukwàtatwèndè; nsongààlùme mutekète ne nsongààkàji mutekète. Ne piine apu, bàkaavwa basòmbèle kaaba kàmwè, kabayi ne bânà to nànsha kakesè. Ki Nzambi kwambila Abraham ne: “Tapuluka ne beena bùpidyà.” Nzambi utu misangu yònsò ànu ubiikila ku, ditapuluka. “Tapuluka ne beena bùpidyà ne enda Naanyi, ne Ndi mukuvwije taatù wa matùngà àbùngì. Nkaadi mumanè kucyèenza.”

⁸⁹ Ne Abraham wàkaciitabuuja. S’ki mwena kwitabuuja awu. “Ne Ùcyènzè bishi’s, Mukalenge?” yèyè kààkeelaku lukonko to. Nzambi ùvwa mwambe ne Yèyè neàcyènzè, ki aci kukosaci bwalu.

⁹⁰ Pààkapita ngondo wa kumpàla, ne Sarah ùcìvwa . . . Yèyè ukaavwa mumane kupita cikondo cyà kuya ku mashi. “Kùdikù cintu kampànda cishìilàngàne anyi?”

“Nànsha cìmwè.”

⁹¹ Kadi Abraham yèyè ùvwa ànu mutungunuke ne kuciitabuuja. Bidimu makumi àbìdì ne bitaanu pashìishe, kakùvwa ànu dishìilangana to, kàdi Abraham yèyè ucìvwa ànu mutùngùnukè ne kuciitabuuja. Awu’s ki mwena kwitabuuja. Awu kî mmwena kwitabuuja wa budingìbudingì to. Awu mmwena kwitabuuja. Bidimu makumi àbìdì ne bitaanu pashìishe, Abraham ùvwa ne dikàndà kupità mùvwàye dyàmbedi amu. “Wakiitabuuja Nzambi, ne bàakamubadilaci

bu bwakàne.” Bwalu yêyè wà-...Ke mwena kwitabuuja mushùwashùwàle nyêyè awu.

⁹² Mpindyewu, paanyimà pàà katanci nennùshùile nukenkete bwà numòne lwènù luseke lunùdi nusanganyiibwa.

⁹³ Mpindyewu Abraham wàkenza cinyi? “Kààkatenkakanaku ku mulayi wa Nzambi nànsha,” bìdi kabiyi mwà kwenzeka abi.

⁹⁴ Ncinyi civwa muntu wa bidimu makumi mwandamutekète ne bitaanu, mwikàle ne mukàji wa bidimu makumi asambòmbò ne bitaanu, mufwanyine kwenza, bu bòbò mwà kuya kùdi ngàngàbukà kampànda ne kwamba ne: “Tudi baswe bwà kudilongolola, bwà lupitaadi. Netùpetè mwànà”? Ki pashùshe, paanyimà pàà bidimu makumi àbìdì ne bitaanu, kwambaye ne: “Ngàngàbukà, ùcidi ànu kacya watulamina mwaba mu lupitaadi anyi?” Nwamònu anyi? Nwamònu anyi?

⁹⁵ Cidi cikwenzeja maalù a lukutukutu. Mapangadika èbè ngàà pabwàwù, kùdi bàà pa buloba. Kadi mmwena kwitabuuja, nànsha cyòci cimweka cyà pabwàci bishi. Bible mmwambe, ne: “Úvwa mutwishiiibwe ànu menemene ne Nzambi uvwa ne bukolè bwà kwenza cyàkambaYe ne Neènzè.”

⁹⁶ Aci ncidi ne cyà kwikala cyenzi cyà bulobo cyà mwena kwitabuuja yònsò mu mapingaja emu. Nzambi mmukumbane bwà kushààla mukwàte ku Dìyi dyònsò dyàkambàYe ne neÈnzè adi. Cidi mangumba àmba nànsha ciikàle cinyi, mèyì à ne: “Matùkù à bishimà’s àkaadi mamane kupita, ne byònsò ebi ndubuku, ne byònsò ebi’s nkutempa kwà mbùkù. Bìdi...” Ki mbintangila mémè to bidìbo bàmba abi. Mémè ndi ànu ntùngùnuka ne kwitabuuja. Cingoma aci cyòci ciikàle ciludikila pa kiipacila, s’necikume kiipacila aku. Nènu ndi ngiitabuuja ne mwena kwitabuuja yêyè mwikale muludikila pa Dìyi dyà Nzambi, dyòdi nedikume cintu cimwècimwè aci. Pùikalabi ne Dìyi dyà Nzambi ndicilayeku kacya, dyòdi nedicyènzè cyàkàbìdi. Mémè ndi mutwishiiibwe menemene bwà cyòci aci. Bwà ne, patùdi tumòna ne tudi mu cikondo eci cidici ne cyà kwikala apa, cidi ne cyà kwikala apa. Bintu ebi bìdi ne cyà kwenzeka.

⁹⁷ Ki bwà cinyi ndi ngiitabuuja bushùwà ne pàdi Mukàji-musela awu mubiikidiibwe pambelu ne musungudiibwe, ne mutèèkiibwe mu Mukàndà wà Mwoyi, nekùlwe cyonà cifumina mu Dyulu cyàbwejà dibatiiza dyà dyà Nyumà Mwîmpè munda mwà Mukàji-musela awu mu mùshindù ne nedìMuumushà pa buloba, mu ngàsà wa Dyambwibwa. Nzambi ngudi mucilayè. Nànsha maalù a mamanya bùngì kaayi, ne nànsha bayi bàà mu mabùlunga bùngì kaayi bàdìbo bafùndishe, ne bikwàbò byònsò, ne bùngì bwà miliyo yàà kilòmèetà yidìbo mwà kumòna; ncyèna ncyùka abi to. Kùdi Dyulu, ne kùdi Yesù Kilistò mulelèlè Mómù amu wàlwa mu mmwenekelu wa mubidi bwà kwakidila Èkèleeziyà Wendè kùdiye Yèyè mwine. Nànsha mùdi bwalu bumweka bwà kale bishi, bùcidi ànu Bulelèlè. Nzambi

ngudi mwambe nänku. Ki—ki cidi beena kwitabuuja biitabuuja ncyôci aci.

⁹⁸ Nzambi wakamba ne: “Mémè ndi Mukalenge udi wondopa mâsaamâ èbè ônsò. Mémè ndi Nzambi ne mémè ncyêna nshintuluka to.” Amen! Nënku Nzambi udi Dîyi. Nënku piikalâ Nzambi kayi ushintuluka, Dîyi nedishintulule munyi? Nwamönu anyi? “Mémè ndi Nzambi, ne ncyêna nshintuluka to.” Mifündü nyidi yamba nänku. Nzambi ngudi mucyâmbè, Yêyè mwine. Ne piikalâYe kayi mwà kushintuluka to, dîbâ adi Yêyè ùdi Dîyi. “Ku cibangidilu kwâkadi Dîyi, ne Dîyi dyâkadi ne Nzambi, ne Dîyi dyâkadi Nzambi.” Dîyi didi kadiyi dishintuluka adi! “Ne Dîyi dyâkavwijiibwa mubidi, ne dyâkasòmbela munkaci mwètù.” Amen! Èyowâ’s, mukalenge.

⁹⁹ Nzambi wâkajuula mibidi, mu bikondo byônsò bishââla; Môsâ, ne Yêhezèkèlè, ne Yelèmiyâ, ne Yeshââyî, ne bàâ Eliyâ, pâvwâ bikondo byènda bilwa, kùvwâ Dîyi Dyèndè dilwila bwâ cikondo aku. Kadi Dîyi mu kaabujima dyâkamwènèshiiibwa mu Muntu ewu Yesù Kilstò. Bwalu, Yêyè ùvwâ Nzambi mu—Nzambi mu kaabujima kââ Bunzambi mu mubidi. Ki Yêyè awu muvwijiibwe mubidi. Mémè ndi ngiitabuuja aci, Dîyi dyônsò.

Yobo, mukwâbò mwena kwitabuuja.

¹⁰⁰ Misangu mikwâbò, beena kwitabuuja bâdi bèediibwa ku diteeta. Ki mmisangu mikwâbò to; musangu wônsò! “Bwalu mwânâ wa balùme yônsò udi ulwa kùdi Nzambi ùdi ne cyâ kunyookiibwa, kuteeciibwa, kulongeshiiibwa bu mwânâ.” Vûlukââyî, mateeta, njila ya lupwishi, dîbâ dyâ luuya lukolè lwâ dikèngèshiiibwa, kâdi lulamatu lwâ mwoyi wèñü lùdi lùtuuta cintu aci too ne pâdici cikumbana bwâ kubwejiibwa mu mushèètè wâ kufwimba nawu. Bânâ bàâ Nzambi mbapungiiibwe mu mùshindü mujalâme menemene pa Dîyi Dyèndè, bwalu bâdi bilejilu bidì ne mwoyi, ne Dîyi dyâ Nzambi diikâdile ne mwoyi munda mwâbò. Nwamönu anyi? Diteeta didi dilwa bwâ kukunyukusha, bwâ kukwinyija mu ndòndò menemene, bwâ kumòna kaaba kawimanyinâ. Bâvwâ bateeta, bapima mwânâ wa balùme yônsò udi ulwa kùdi Nzambi.

¹⁰¹ Yobo wâkâpicila mu mateeta ne mateeta. Bânâ bèndè bangâciibwe; bikwâbò byônsò byangâciibwe. Bidimba byâ èkèleeziyâ byâkalwa, kumufundabo mùvwaye ngènzâmpèkââtù wa mu musokoko, ne kuteetabo kwamba bintu byônsò byâ kumulwisha naabi, kadi nânsha nänku kavwa ânu muswè kuteeleja kantu nânsha kamwè kââ ku byôbi abi to. Ûvwâ mumanye ne ukaavwa mukûmbâje mishingâ yâ Nzambi. Ûvwâ mumanye ne kabyèna ne dikwâcisha bwâ Sâtaanâ kumuteyaye to. Ûvwâ mumanye ne ndyabùlù. Nënku pâcidi ânu Sâtaanâ mwâ kumwitabuujiija ne disaamâ dyèndè divwa n’Nzambi wendè wenza nänku, ùvwâ mukòokeshe Yobo. Kadi Yobo mmwenze ânu ulenga dibuulula adi, dyâ ne kacivwa Nzambi to! Ûvwâ

ùpicila ànu mu mateeta èndè cyanààna bwà kumuvwija cintu kampànda. Kacivwa Nzambì ùcyènza to. Ùvwa n’Sàtaanà ùvwa ùcyènza awu.

¹⁰² Ne cintu cimwècimwè aci leelù ewu. Yèyè neàtèète bwà kukwambila ne mateeta aa ne bikwàbò n’Nzambì wèbè uteeta bwà kukupèèsha dinyooka. Kabyèna nàнку to. To, mukalenge. Sàtaanà ngudi munkaci mwà kwenza cintu aci, ne Nzambì mumwitable, bwà kukutuuyisha cilunji; bwà kukufikisha ku dimòna ní udi—udi muswikiibwe ku buloba ebu, ku madyàbàkeena a pa buloba, anyi èbè mabanji ní àdi mu Dyulu. “Bwalu mwaba wònsò ùdi mabanji èbè, ke mwaba ùdi pèèbè awu.” Ncyà bushùwà. Mwoyi wèbè ùdi mwaba ùdi mabanji èbè.

¹⁰³ Yobo, muteciibwe, nànsha nàнку wàkamba ne: “Ndi mumanye ne Mupikudi wanyi ùdi ne mwoyi; ku matùkù à ndekeelu Yèyè neìmanè pa buloba. Nànsha paanyimà pàà misàndà yà mu dikòbà dyànyì mimane kubutula mubidi wànyì. . .”

¹⁰⁴ Nukààvwakù bamòne anyi? Misàndà yà mu dikòbà yikaavwa munda mwèndè. Misàndà yà mu dikòbà dyèbè yìdi munda mwèbè. Udi munda mwà mushèètà mukànga ùdi kawùyi ne lupeepèle munda mwàwù, anyi mungà mùshindù, kadi misàndà yà mu dikòbà yikaadimu. Yìdi ànu munda mwèbè amu, ne yikaadi pabwìpi ne kubiiikidiibwa ku mudimu pa dìbà kanà dyònsò. Vùlukàayi Kaayisà, yèyè wàkadìibwa kudi misàndà ànu mu mùsèèsù menemene amu. Misàndà yà mu dikòbà yàkamudyà butubutu, ànu mu mùsèèsù amu, misàndà yà mu dikòbà dyèndè yèyè mwine. Yìdi ànu mwine munda amu, kwònsò eku.

¹⁰⁵ “Nànsha paanyimà pàà misàndà yà mu dikòbà dyànyì mimane kubutula mubidi ewu, nànsha nàнку mu musunya wànyì nèmmonè Nzambì.” Amen! Kwèna mwà kuwùbùtula kumana to. Nànsha misàndà yà mu dikòbà mimane kuwùdya butubutu, newùlwe cyàkàbìdì. “Yèyè ùngààdimwènà mèmè mwine. Mèsù àànyì neàtangile, ne kàyi àà mukwàbò to.” Yèyè wàkacyàmbà, Yobo. Bwà cinyi? Ùvwa mwena kwitabuuja. Mu mateeta ùvwa mwena kwitabuuja. Mu dikengeshiibwa, ùvwa mwena kwitabuuja. Ùvwa mwena kwitabuuja mushùwashùwàle.

¹⁰⁶ Yòzefù, mukwàbò mwena kwitabuuja, kavwa mwà kupanga kwikala cìvwàye aci to. Ùvwa mupròfetà. Nzambì wàkamwenza mupròfetà. Kàvwa muswè kwikala mushiilàngane ne bânà bààbò to, kadi ùvwa mushiilàngane. Nzambì wàkamuvwija cìdiye aci. Muntu mukwàbò nànsha umwe kavwàkù mwà kwangata kaaba kèndè to.

¹⁰⁷ Muntu nànsha umwe kèna mwà kwangata kaaba kèèbè to, nànsha kòkò kakesè bishi. Wèwè udi wamba ne: “Mèmè ndi ànu mukàjì wa nzùbù cyanààna.” Muntu nànsha umwe kèna mwà kwangata kaaba kèèbè to. Nzambì, mu cibucilu Cyèndè

cinène, mmutèèke nàнку, Mubidi wa Kilistò, mu bulongàme, mu mùshindù wà ne kakwèna muntu nànsha umwe udi mwà kwangata kaaba kèèbè to. Mùshindù mwine wùndi mwà kujinga kwangata mwaba wà Billy Graham, yònsò wa ku twètù bambi, kàdi katwèna mwà kucyènza to; kadi, vùlukaàyi ànu ne, Billy kèna mwà kwangatakù kèètù kaaba to. Nwamònu's, twètù bònsò tudi ne kaaba kampànda, bàmwè bàà kutùdi mbatangadiki, bàmwè bapròfetà, bàmwè balongeshi, bàmwè bampaasàtà, cyònsò citùdi aci; bàmwè bakàji bàà nzùbù, bàmwè balongolodi bàà mashinyi, bàmwè baabidimà, cyònsò cìdiku aci, Nzambi mmukutèèke pa kaaba kèèbè. Nwamònu anyi?

¹⁰⁸ Yòzefù ùvwa mupròfetà. Kavwa mwà kupanga kucyènza to bwalu ùvwa mwà kuumvwija bilòòtà. Kavwa mwà kupanga kucyènza to bwalu ùvwa umòna bikèènà-kumòna. Tangilàayi nùmonè mùvwaye ne lulamatu. Nànsha byòbi mwà kukosa bwobùmwè bwèndè ne bàna bààbò bishi, ùvwa ne lulamatu, bwalu ùvwa mwitabuujè bilòòtà abi. Wàkiitabuujà ne, cilòòtà cìvwaye mulòòte aci, cyà ne bàvwa ne cyà kumwinamina, myepu ayi yìvwa ne cyà kumwinamina. Byàkenzeka bwalu wàkabiitabuujà. Ùvwa mwena kwitabuujà mushùwàshùwàle. Mmunyi. . .

¹⁰⁹ Ndi ne tusunsa tutaanu; ne mabeji dikumi, monaayi mpindyewu, mònaayi, à Mifùndù mifùnda mwaba ewu. Mukàji. . .

¹¹⁰ Natanaela, yèyè ùvwa mwena kwitabuujà. Ncyà bushùwà anyi? Natanaela, pààkamònàye cyàkenzekà aci; ne cyàkamwenzekela yèyè, cyà Yesù ùmwambila ne yèyè ùvwa nganyi, ne kwambayè ne yèyè ùvwa mwe—mwena “Izàlèèlà menemene,” ne kakuvwa “budimù” munda mwèndè nànsha, ne kumwambilaye mwaba ùvwaye usanganyibwa ditùkù dishààle, “ùsambila mwìnshì mwà mucì.” Yèyè wàkamumòna pàvwà—pààkamubiikilà Filipino apu. Ùvwa mwena kwitabuujà.

¹¹¹ Kudi bààbùngì biimane mwaba awu, bàmba ne: “Ewu nnyumà wa dyabulu. Dyabulu ngudi wenza dyondopa dyà kùdi Nzambi.” Dyabulu wa kale awu katu mwanji kufwà too ne leelù ewu to. Batu biitabuujà ne dyabulu udi wenza dyondopa dyà kùdi Nzambi.

¹¹² Yesù wàkamba ne: “Piikalà Sàtaanà mwà kwipata Sàtaanà, dîbà adi bukalenge bwèndè mbupandùlùke, ne bukalenge kabwèna mwà kutùngunuka to.” Nwamònu anyi? Sàtaanà wàkamba, mu. . . Kèna mwà kucyènza to. Pa nàнку, Sàtaanà kèna mwà kwipata Sàtaanà to.

¹¹³ Pa nàнку Natanaela ùvwa mwena kwitabuujà. Nèngu pààkamònàye Dìyi divwijiibwe mubidi, dishindika ne yèyè ùvwa mwena kwitabuujà, wàkamba ne: “Wèwè udi. . . Laabi, Wèwè udi Kilistò awu. Wèwè udi Mfùmù wa Izàlèèlà.” Yèyè kuciitabuujà.

114 Mukàji wa ku ciinà cyà mâyi awu mmwenze ànu ucimòna, pèndè e kuciitabuuja. Mmwenà kwitabuuja.

Pavwa mpofo Baatimààyò . . . Pààkalwà mukàji . . .

115 Bantu bônso bàvwa bèèla mbilà, batùngùnùke. Bàmwè bàà ku bóbò bàmba ne: “Kudi cijimà . . . Ndi ngumvwa bàmba ne Wèwè udi ujuula bafwè. Kudi nkità mipàte patapata naabu munwemu emu; lwàku ubàbiishe. Tumonè mùdi ubàbiisha.” Nwamònu’s, dyabulu umwèumwè wákamba ne: “Wèwè ní udi Mwànà wa Nzambi, tuminabi mabwe aa dìyi bwà àndàmukè mampà.” Yèyè umwèumwè awu ngwakamuswika mukùsù ku mèsù, kuMutuuta mu mutù, e kwamba . . . basambulujilangana mulangala, umwe kùdi mukwàbò, bàmba ne: “Mpindyewu, bu Wèwè mwà kutwàmbila ne wàKutuutù awu nganyi, netùKwitàbùùjè.” Basalaayi abu, nwamònu’s, bàvwa bàMuseka. Bivwa bimweka bu ne maàlu avwa mamuupukile, pambidi Pèndè.

116 Kadi vùlukààyì ànu ne, Nzambi ùtu misangu yònsò ànu mu cyalu. Nwamònu anyi? Yèyè udi ànu mwab’awu mudilongolole, díbà kanà dyònsò.

117 Mpindyewu Yesù wákamba ne: “Ndi mwà kwakula ne Taatù Wanyi ne dyàkamwe Yèyè ùvwa mwà kuNtumina bisumbù dikumi ne bìbìdi byà Banjèlo.” Kaa, Mwanjèlo umwèpelè mmufwànyine kwenza cinyi? Nwamònu anyi? Kadi, nudi numòna’s, kàdi Yèyè’s ùvwa mwà kutùma bisumbù dikumi ne bìbìdi ànu ku dìyi Dyèndè ditùma. Kadi Yèyè ùvwa ne mudimu wà kwenza. Ùvwa ne cintu kampànda cyà dyenza. Bivwa bikèngela bwà Yèyè kupicila mu cyòci aci.

118 Udi ne cintu kampànda cyà dyenza. Nzambi ùdi ne cintu kampànda cyà wèwè kwenza. Udi mwà kwikala ne ndambu wa màsaamà à myoyi ne ntàtu, udi mwà kupeta dyediibwa dyà mâyi ku makàsà, kàdi tudi tulomba bwà kubyèpela anyi? To. “Mukalenge, ùmpicishilekumu, nànsha wòwù à bishi. Nànsha wòwù à bishi, kwitabikù bwà mèmè kuèpuka to. Wòwò mandongolwela mèmè, mpeeshèku ànu ngàsà wa kupicilamù. Kwàjiki.”

119 Mpindyewu monaayi, mpofo Baatimààyò, ùvwa mumanye, ne bàakamwambila ne: “Ewu m’Mupròfetà wa mu Ngalèlà. Yèyè udi Mwànà wa Davidì. Twètù tudi tuciitabuuja.” Bàmwè bàà ku beena kwitabuuja bavwa ne cyà kwikala bamwambile nànkù. “Twètù beena kwitabuuja tudi bamanye ne Yèyè udi . . . Mwànà wa Davidì awu.”

120 Nènku yèyè uvwa mumanye ne, pìikalabi ne Yèyè uvwa nànkù, Yèyè ùvwa Dìyi adi. Nènku pìikalabi ne yèyè uvwa mumanye ne Yèyè uvwa Dìyi adi, ùvwa mumanye ne Yèyè ùvwa mwà kujingulula meeji a mu mwoyi, ki kwelaye lubila ne: “Wèwè Mwànà wa Davidì, ikalaku naanyi luse.” Beena bupidyà bàvwa beela mikunda bwà *cikampànda*, ne *cikansanga*, bidimba

byà èkèleeziyà. Aci kacyàkiimanyikakù mpofo Baatimààyò to nànsha kakesè. Yèyè ne: “Éyi Yesù, Wèwè Mwànà wa Davìdì, ikalaku naanyì luse!”

121 Pàmwápa Yèyè kavwa mwà kuumvuwaku to. Kadi Yèyè uvwa mumanye ne ùvwa wela mbila, kadi Yèyè kwimana ne kukènzàkana. Ki mwena kwitabuuja awu. Yèyè kwamba ne: “Diitabuuja dyèbè dyàkusùngìdi.” Amen.

122 Yèyè kwambila mukàjì uvwa ne mashi alwa munda awu, cintu cimwècimwè aci ne: “Diitabuuja dyèbè.”

123 Bwalu, wàkamba munda mwà mwoyi wèndè ne: “Mémè ànu mwà kulenga civwàlù Cyèndè, nèngǔmvwè bîmpè.”

“Diitabuuja dyèbè dyàkusùngìdi.” Nwamnu’s, yèyè ùvwa mwena kwitabuuja.

124 Ncintu cimwècimwè aci cyàkasùngilà William Dauch, udi musòmbe mwaba awu, ditùkù adi, mwikàle ne disaamà dyà dishiikila dyà mwoyi, ne disaamà dya mwoyi mwimane, muntu wa bidimu makumì citèemà ne cimwè. “Diitabuuja dyèbè dyàkusùngìdi.” Bwà cinyi? Yèyè mmwena kwitabuuja.

125 Révérend Tom Kidd ewu, nànsha mùkadìye mubwele mu wèndè. . . wamba kubwela, ngèlè meeji, ndambu mu bidimu bitwè ku makumì citèemà mpindyewu, byà bununu, biipacilakù. Nènku pàkaavwaye ne bidimu makumì mwandamutekète ne citèemà, kuyabo nendè ku lupitaadi ne kansèrè kàà mu mpàci wa mènnyi. Ngàngàbukà kwamba ne: “Kènàku ne mpùnga to.”

126 Kadi patwàkabwela mu dindà amu, twètù e kumòna nkambwa awu ne cilàmbà cyà luuyà pa makaaya èndè, musòmbe mwaba awu, munkaci mwà kutuuta kaadikombo kakesè panshì, mwenze bu kacyi mu yèyè to. Kwambilaye mukàjì mukulakaji uvwa musòmbe mwaba awu, kumubiikilaye ne kakwèndè mukàjì; mumumanye, umwe wa ku bidimba byèndè wa bidimu ne bidimu. Yèyè ne: “Udi umweka mutòòke bu nèjè,” mupatuke mu ngeelèlù wèndè wa meeji.

127 Nànsha nànkù, Bukolè bwà Nzambì pàakatuuatobo cibambalu aci, s’nyèyè ewu ne mwoyi dilòlò edi. Kukaadi bidimu binaayi. Muntu wa bidimu biipacila ku makumì mwandamukulu, s’ke yèyè ewu musòmbe dilòlò edi, ne mubidi tumatuma mwikale bîmpè, mwondopa ku kansèrè. Nwamònu’s, kayi mwena kwitabuuja wa budingìbudingì to; mwena kwitabuuja! Ki cyòci aci, itabùùja! Yèyè utu ukwacila Nzambì ku Diyì Dyèndè.

128 Ànu byà mwomùmwè menemene ne mpofo Baatimààyò’s. Mpofo, kadi nànsha nànkù ùvwa mumanye ne, bu yèyè mwà kukoka ntèmà yà Yesù Kilistò, ùvwa mwà kupeta civwàye ùkeba aci.

129 Mukàji awu ùvwa mumanye ne, bu yêyè mwà kulenga civwàlù Cyèndè, ùvwa mwà kupeta civwàye ukeba aci—ùvwa mwà kupeta civwàye ukeba aci.

130 Tom ùvwa mumanye. Ùvwa ne diitabuuja, bu mémè mwà kumusambidila, ùvwa mwà kupeta civwàye ukeba aci.

131 Ki ndiitabuuja dimwèdimwè adi anyi dyàkambà Marta ne: “Nànsha mpindyewu mene, Mukalenge, cyònsò cyùdi Wèwè ulòmba Nzambì aci, Nzambì neàKwenzeleci; mwanèètù wa balùme mmulààle kuntu kwàka, mufwè, matùkù anaayi mu lukita; kadi Wèwè lòmba ànu Nzambì cyanàànà, ne Nzambì neaKwenzelaci?”

Yèyè ne: “Mwanèènù wa balùme neàbiike ku lufù.”

132 Ki yêyè kwamba ne: “Èyowà’s, Mukalenge, mu matùkù a ndekeelu, ku dibìikà dyà ku lufù, yèyè neàbiike. Ùvwa mwànà wa balùme mwìmpè.”

Yèyè kwamba ne: “Kadi Mémè’s ki dibìikà dyà ku lufù adi ne Mwoyi!”

“Èyowà’s, Mukalenge, ndi ngiitabuuja aci, mémè pàànyì.”

“Nudi bamujiike penyi?” Ki cyòci aci. Kwajiki. Èyowà’s, mukalenge.

133 Mukalenge-mukàji wa ku Sud awu ùvwa mulwè mu lukòngò lwà beena bupidyà alu, ncyà bushùwà, ne kwimanaye mwaba awu ne kwitabuuja civwàye ùmòna ne ncyà kùdì Nzambì. Bible mmwambe ne: “Yèyè neàbiikè ku lufù mu ditùkù dyà ndekeelu, ne lukòngò alu, ne nealùpìishè, bwalu yèyè wàkafumina ku ntengu yà buloba bwà kuteèleja lungenyi lwà Solomo.”

134 Mòsà ùvwa mwena kwitabuuja. Nànsha mwàkateetaye mu mùshindù wà mamanya à mu mutù amu, wàkateeta kulonda njila yònsò uvwaye mwà kulonda awu, kàdi kàvwa mufwànyine kukùmbàna to. Wàkateeta bwà kupatula Izalèèlà, mumanye ne yèyè ùvwa mubiikidiibwe bwà kucyènza. E kuteetaye njila wa makumi. E kuteetaye njila wa búsàlaayi. E kuteetaye njila wa dilonga dyà tùlaasà. Wàkateeta njila yònsò, kàdi kabìvwa bifwànyine kukùmbàna to. Kadi pashìshe kulondaye njila wa Nzambì.

135 Cyàkenzekà ncinyi? Kùvwa Kapyà mu kaacipuka mwàmwa, dīngà ditùkù, kàvwa kakàyi kùumuka to. Mwaba awu ki Dìyì kwakula nendè, dyàmba ne: “NDI.” Kabìyi ne: “Mvwa,” anyi ne: “Nèngìikalè to.” “NDI.” Ne Yèyè ùcidi ànu “NDI.” Yèyè ùdi Dìyì, Dìyì dyà Cyèndèlèèlè, dyà kashidi.

136 Mòsà kààkeelakù mpatà to. Ntàtu yàkamulwisha, bufùki bwònsò kumulwishabò, bintu byònsò bimulwisha yèyè. Kàdi, ne dikombo dikònyàngale mu cyanza cyèndè, kupwekaye e kuya kakwàta ditùnga dijimà, kudishipaye diinyija mu Mbù Mufwè

mwàmwa, ne kufikishaye Izàlèlèlè ku buloḃa bulaya. Bwà cinyi? Ùvwa mwitabùùje Nzambì. Cyà bushùwà. Ùvwa ne. . .

137 Ki mwena kwitabuuja nyèyè awu. Tudi bafwànyine kushààla. . . Mpindyewu ndi munènge citùpà cyànyi cyà dibà pa beena kwitabuuja.

138 Ndi ne misùmbà mikwàbò yibìdi. Netùlwijakaje pa yòyi, bwalu kayèna ne mushinga to, nànsha bishi. To.

139 Pashìishe, ciibìdi, kulwaku mpindyewu mwena bùpidyà. Twánjìbi kwakula bwà mwena bùpidyà mpidyewu. Mwena bùpidyà udi wenza cinyi?

140 Tudi tumòna ne mwena kwitabuuja (cinyi?) ùdi witaba Dìyi; cisà cyònsò, lukòngò lwònsò, kuumukila ànu ku Noa, too ne ku ndekeelu. Tudi bafwànyine kwenza ngondo yisambòmbò yà ditabuluja ànu pa cyòci aci mwaba awu mene, tutwàla bantu abu. Bàdi biitabuuja. Mwena kwitabuuja kèna ùkonkoloja to. Mwena kwitabuuja ùdi ùCìitabuuja, kayi ùtangila Cìdici cyùmfwika anyi cidi mùngà muntu kanà yònsò ewu mwà kwamba pa Cyòci to, nànsha Cyòci cimweka kaciyi mwà kwenzeka bishi.

141 Mwena kwitabuuja ùdi ùCìitabuuja, ùdi witabuuja (cinyi?) Dìyi. Kì ntwitabààyì to; Dìyi! Kì ndingumba to; Dìyi! Kì ncidi muntu kampànda mukwàbò wàmba to; cidi Dìyi dyàmba aci! Mpindyewu, vùlukààyì ne, awu ki mwena kwitabuuja awu. Mwena kwitabuuja kèna ùkonkoloja to. Mwena kwitabuuja kèna wàmba ne: “Bìdi mwà kwikala nànkununyi? Bòbò mwà kuCingumvwijaku’s!” Awu mmwena bùpidyà. Uh-huh. Mmwena kwitabuuja, yèyè, nànsha Ciikàle cinyi: “Piikalabi ne Cidi n’Dìyi, Dyòdi didi Dìyi! Aci ncilelèlè.” Ki mwena kwitabuuja nyèyè awu.

142 Mpindyewu mwena bùpidyà. Mpindyewu tudi tumòna cidi. . . Netwàngatè beena bùpidyà. Tudi tujandula ne bààkatungunuka ànu bìmpè pàvwàbò bàbàtuuta byanza paanyimà ne bàbàbìkila ne bayiidi. Pàvwa ànu (bavwa) bintu byònsò byènda bilenga, bàvwa ànu bìmpè. Kàdi pàvwa Mupròfetà ewu uvwàbò biitabùùje ne mmupròfetà, ne bamanye ne ùvwa mupròfetà awu, uvwa mwà kwondopa babèedi, ne bikwàbò, cyàkènzàYe ncinyi? Pààkalwà Bulelèlè bwà cyà bushùwà ne ditandisha, bibèngàngàne ne civwàbò biitabuuja, kabàvwa mwà kwangata Dìyi to.

143 Bàvwa mwà kwangata bishimà, ne bàvwa bàbyenza. Bààkapàtuka ne bààkiipatà badémòns, bààkayiisha Dìyi, kadi baciikale ànu beena bùpidyà. Maatààyì 10, Yèyè kubatuma, bàbìdi bàbìdi, makumi mwandamutekète abu, ne bààkiipatà badémòns, mu mùshindù wà ne Yesù wàkasànkà, ne kwambaye ne: “Ndi mumòne Sàtaanà ukuluka bu mupenya ùfùmina mu Dyulu.” Nwamònu’s, bàkiipata badémòns; Yudaasà mwikale ànu naabò. Ki beena bùpidyà bàlwalwà aba.

144 Kàdi Yesù mmwenze ànu ubanga kwamba ne Yèyè uvwa cintu kampànda, cyà ne Yèyè uvwa “dibiikà dyà ku lufù,” Úvwa “Mwoyi.” “Ncinyi cinùdi bafwànyine kwamba bu nwnènù mwà kumònà Mwànà wa muntu ùbanda kuvwàYe mufùmìne?”

145 “Mpindyewu, Muntu ewu uteeta kwamba ne Yèyè mmufumine mu Dyulu, aci’s ncikolè menemene bwètù twètù. Katwèna mwà kuCìitabuujà to.”

146 Yèyè kwamba ne: “Ncinyi ciine aci? Mubidi unùdi nwamba awu, kawèna ne dikwacisha nànsha dikesè to. Nyumà ngudi ufuùlùlùla.”

147 S’ki bwalu mbwòbù abu. Nyumà ùdi ufuùlùlùla Dìyi. N’Nyumà, kî ntwitabàayi to. Nyumà, wa Nyumà Mwìmpè, ùdi ufuùlùlùla Dìyi kùdi, ne dilwa ne mwoyi, ne ki bwalu mbwòbù abu, nudi numòna’s. Ku diitabuujà udi ucimòna. Udi mumanye ne bìdi nànkù bwalu Dìyi ndidi dyambe nànkù, ne Nyumà ùdi ufuùlùlùla Dìyi kùdi. S’ki bwalu mbwòbù abu.

148 Mpindyewu Yèyè wàkamba ne: “Ncinyi cìikalà . . .” Nènku patùdi ànu benze cyòci eci, tudi tujandula ne, beena bupidyà, paùdi wamba cintu kampànda cìdibo kabàyi bapetangana naaci to, bàdi bakushiya baya. “Ncyèna mwà mwà kuya to!” Kaa, cyàtambi kudyunda be, pa buloba leelù ewu. Ubanga ànu kwamba cintu kampànda . . .

149 Bàdi bàkùngwilamu. Ndi mumòne mu masangisha mbaswè kudisangisha, bisùmbù binène, kadi kwimana kuulu, kubanga kwamba cintu kampànda. Mpindyewu, pàcidi anu . . . Bavwa basòmbè ànu mwaba awu, babandila ànu cyanààna, bindile ànu cyanààna. Pashìshe paùdi ànu wamba ne: “Mpindyewu, Yesù Kilistò wàkaDìmanyisha Yèyè mwine bu Maasiya, bwalu Yèyè uvwa Mupròfetà,” nzàba awu wùlù zabazaba, upongolokela ne panshi. Muntu kampànda . . . nènku ke bóbò bayaaya bààba. Ncinyi ciine aci? Beena bupidyà!

150 Mpindyewu wèwè udi wamba ne: “Udi munkaci mwà kucikwàtakaja.” To. Mèmè ndi ngamba ànu menemene cìdi Bible wamba mwaba ewu.

151 Bavwa beena bupidyà, ne bààkapàtuka. Nànsha mùvwàbo bayiidi amu, kadi bìvwa—bìvwa bibengangane ne civwà . . . Bóbò kwamba ne: “Eci, nganyi udi mufwànyine kwitabuujà cintu bu Cyòci aci?” Nwamònu anyi? Bavwa Bafaalèsà ne Basadoka bàvwà bapàtùke, bààkalamakana ne bààkabwela Nendè.

152 Bwalu, nwamònu’s, pàdi—pàdi citàmbe-mfukilu cileejìbwe patòoke, cìdi cilela mìshindù yisàtu mìshìllàngàne. Cyàkenzeka mu Ejiipitu. Cyàkalela mwena bupidyà, mwena kwitabuujà, ne mwena kwitabuujà wa budìngìbudìngì. Cyàkalela bitùpà byònsò bisàtu. Ncifùnda ànu mwaba ewu, too ne mutwàtùngunukà naaci mu dilòòlò dijimà emu, twenda tucyùmvwija, mùshindù ùdici. Myaba yònsò, udi ucisàngana, udi umòna ànu basatu abu. Misangu yònsò mùshindù awu, nwamònu’s, udi ubàsàngana.

153 Mpindyewu tàngilààyì, makumi mwandamutekète aa, bààkapátuka bwalu Cyôci aci kacivwa cipetangana ne civwabo bôbò biitabùùje ne ncilelèlà to.

154 Twètù katwèna ne meeji àdiku ne mushinga to. Ncidiye mwambà Yèyè! Wèwè udi upidya webè ngeelelu wa meeji sungansunga. Wamba ànu cidìYe wàmba aci. Aci's ki ditonda dyà bushùwà. *Ditonda* mbwena kwamba ne “kwamba cintu cìmwècìmwè aci.” Bu mèmè mwà kutonda ne cintu kampànda cyenzeke, ndi ngàmba cintu cìmwècìmwè cyàkenzekà aci. Ki cidì ditonda dilelèlà ncyôci aci. “Ne Yèyè m’Mwakwidi Munène wa ditonda dyètù.” Nwamònu anyi? Wàmba cintu cìmwècìmwè cidì Nzambi mwambe, nwamònu's, aci ncidi cìcìvwija cilelèlà, bwalu wèwè udi ànu munkaci mwà kwambulula Dìyì dyà Nzambi.

155 Mpindyewu mònaayi, makumi mwandamutekète awu kupatukawù. Bààkenza cinyi? Nènku bôbò—bôbò bàkapatuka ànu bwalu ka—kabàkapetangana to. Lwàbò—lwàbò—lwàbò lungènyi, dyàbò—dyàbò dilamakana dyà ku èkèleeziyà òvwàbo naadi, òvwa—òvwa dítàmba kubàbwele. Aci civwa bwalu bukòlè be bwa bôbò kwela meeji, ne Muntu udi mwimane mwaba ewu, ne ki. . . Bantu bakwàbò bônsò bavwa biitabuuja ne Aci civwa dilediibwa dyà mu masandi. “Kavwa ne bukenji bwà kuDibiikila ne n’Nzambi to. Pèndè's òvwa ànu muntu wetù ewu.” Bàkamba ne: “Katwèna tuKwasa mabwe bwà cyenzi cìmpè cyùdi mwenze to, kadi tudi—tudi tuKwasa mabwe mbwalu Wèwè, mwikàle Muntu, udi uDìvwija Nzambi.”

156 Ne Dìyì ndyambe ne Yèyè òvwa Nzambi. “Dìna Dyèndè nedibiikidiibwe ne ‘Mubedyanganyi,’ ‘Mfùmù wa Ditalala,’ ‘Nzambi wa Bukolè,’ ‘Taatù wa Kashidi.’” Mmifùndù yàbò mene yivwàbo bàbala ayi!

157 Nènku ditùkù mene òvwàbo bìmba Musambu awu, Musambu wa 22, “Nzambi Wanyi, Nzambi Wanyi, WàNdekèdi bwà cinyi? Mifùbà Yànyi yònsò yikaadi miNtàngile.” “Mufùbà nànsha òmwè kawàkucibudiibwa nànsha.” Musambu mwine òvwàbo bàmbulula mu ntèmpelu awu, ki Mulàmbù awu mulembeleja wela lubilà lukolè mèyi mene àkamba Davidi bidimu nkàmà mwandamukulu kumpàla, ne bàvwa batàmbe kufofoma kabàyikù mwà kucimòna to.

158 Nènku, leelù ewu, Nzambi mwine wàkaakula bwà cikondo eci awu ùdi mu cyalu wenza ànu menemene cyàkambaYe ne Neénzè aci, kadi bôbò mbatàmbe kufofoma bwà kucimòna. Ki beena bupidyà mbôbò abu. Bàdi bàpátuka bàmba ne: “Kaa, mèmè ncyèna mwà kwitabuuja cintu bu Aci to. Ncitu mwanji kuumvwa byà Nànku awu to kacya bàndela!” Cyùkaadi muumvwe kacýèna ne cidìci cishintulula to. Bible mmwàmbe ne neCìikaleku, ne n’Dìyì Dyèndè.

159 Kacya kabàvwaku banji kuumvwa bamba bwà Cyôci aci to, bôbò pààbò, kàdi Cìvwa mwaba awu ànu mùshindù ùmwèùmwe awu. Nwamònu anyi? Ncyà bushùwù. Bavwa beena bupidyà.

160 Ànu mùvwà Evà amu, ùvwa mutèndeledi wa dikema, mu bushùwà bwà bwalu, pa nàнку, kadi yèyè—yèyè kàvwa mwitabùùje Dìyì dilelèlè to. Nènku bivwa bikèngela bwà kudyènzelayè ntèndeleele, ki kwenzaye ndambu wa mabeji a mfigi, nwamònu's, kadi kabivwa mwà kukumbanaku to. *Ntèndeleele* mbwena kwamba ne “cibwikilu.”

161 Kaayina wakenza cintu cìmwècìmwè aci. Kaayina kàvwa mwà kwitabuuja ne Aci cìvwa cyà bushùwà to. Wàkamba ne: “Nzambì ngwa cijila, Nzambì mmukezuke, ne Nzambì mmulenga kumòna. Pa nàнку nèmpetè ndambu wa bilòngò, nènku nèngàngatè bi—bilòngò nènku nèngenze cyoshelu cilenga, cyà cinène, nènku nê—nèndeje kaneemu kàanyi katàmbe kùdiYe. Mèmè nèngìmanè kumpàlà kwàci, nènku nèngìnamè kumpàlà Kwèndè ne kukukwila Nzambì awu. Nènku nènteeke bilòngò pa cyoshelu, bwalu, nudi bamanye's, tatwányi ne mamwányi bàakadyà ndambu wa bimuma byà pommes, cimuma kampànda, mu budimi bwà Edènà, ki cintu cyàkampàtulà ncyôci aci. Ne pa nàнку, aci's, nengàlukile, bwalu nèncyenze cilenga menemene. Nzambì kèna ànu mwà kubenga kàtèdralè kàanyi kanène aka to. Mona's, mèmè's nèngìikalè pàanyi mutambe bunène wa mu kàtèdralè! Nènkàlongòlòlè bikolè mu mùshindù wà kakoka ntema ya Nzambì.” Sàtaanà ngudi musòmbèle mu bulenga bwà kwìsù. Ki cyôci aci menemene cìdi Mifundu yamba.

162 Ki bwà cinyi, misangu mikwàbò, mukàji mulenga kwìsù ncishì cyà kwela ku ndòbo bwà Sàtaanà. Bu yèyè ànu mwà kumutwà byanza, ùdi mwà kubweja bantu balùme bapite búngi mu iferno kutàmba mudiye mwà kwenza ne nzùbu yònsò ya binwinyi byà maala mu ditunga emu. Ncyà bushùwà. Nwamònu anyi? Anyi, wa mfwishà, muntu mulùme kampànda munèna wa mfwishà udi kayi mufwànyine—kayi mufwànyine kwimana mu lulamatu lwèndè lwà bwànàbulùme, nwamònu's, kàbìdi, yèyè udi mwà kukùpa bakàji abu kudi dyabulu, ne kubàtùma mu iferno. Èyowà's, mukalenge.

163 Monaayi, Sàtaanà utu ùsòmbela mu bulenga bwà kwìsù. Cyàkateetaye kwenza ku cibangidilu ncinyi? Kwenza bukalenga bulenga kutàmba mùvwa bwà Mikaele amu; kutentemukaye mutàngile ku Nord, e kwangatayè byàbisatu bibidi byà Banjèlo pamwè nèndè.

164 Nudi numòna ne ùvwa mmwànà wa nganyì—wa nganyì awu dìbà adi, uvwa ne ngiikadilu awu munda mwèndè? Mwànà wa balùme wa Sàtaanà's. Ncyà bushùwà menemene, ki mùvwàbi. Mpindyewu yèyè wàkiibaka cyoshelu, ne wàkatwà binù ne wàkakukwila. Wàkopicila mu byònsò bivwà (Kaayina) Abèlè mwenze abi.

165 Kadi Abèlè wàkamanya ne kacivwa aci to. Yèyè... Mashi ki àkabàpatulà. Ùvwa mumanye ne civwa ncyòci aci. Civwa dyangatangana dyà mulùme ne mukàji, mashi. Nàнку ke kwangatayè kànà kà nyama, e kukàlambulayè pa lubwebwe, e kukòsàyè muminu wàkò.

166 Monaayi Kaayina, yèyè... Nzambi wàkamwambila, Wàkamba ne: “Bwà cinyi kuyiku ukuukwila bu mwanènù, nàнку’s newènzè bímpè. S’newènzè bímpè wèwè mwenze nàнку awu.” Kadi, to, yèyè’s uvwa mumanye byàbùngì pa bwalu abu. Nwamònu’s, wàkabenga Dîyi dyà ku muji, dishindika adi. Piikala aci ní kî ncidi bânà bèndè leelù ewu’s! Nwamònu anyi?

167 Mpindyewu tàngilàayi ne: “Nzambi ùkaavwa mufile bujaadiki,” mudi Bible mwambe. Ebèlu nshapità mwi4, anyi nshapità wa 11: “Nzambi mwikàle ùfila bujaadiki bwà dipà Dyèndè, bwà ne yèyè ùvwa mwakane.” Nzambi wàkashindika mulàmbù wèndè. Nzambi wàkafila cijaadiki cyà ne cyòci aci ncivwa Ye mwitabe; civwa n’Dîyi Dyèndè, ndongamu Wendè.

168 Ki kwambilaye Kaayina, wàmba ne: “Enza cintu cimwècimwè aci, ne wikalè ne mwoyi.” Kadi nudi nwela meeji ne mmufwànyine kucyènza anyi, mmufwànyine kulekela mmwenenu wèndè anyi? To, mukalenge. Yèyè ùvwa mwena bupidyà, kadi kupatukaye ànu kuya. Ncyà bushùwà. Kaayina wakenza cintu cimwècimwè aci. Nimelòodè wakenza cintu cimwècimwè aci. Beena bupidyà! Kàkiitabuuja to.

Beleshààsà, cintu cimwècimwè aci, nànsha nàнку, anyi. . .

169 Nebukadanèèsà, nànsha mene mùvwàye ne Danyèlè bu nzambi wèndè amu, mumwinyike ne Beleshààsà, civwà dînà dyà nzambi wèndè, wàkamòna Danyèlè wènza byenzedi binène byà Nzambi. Ne dîbà adi yèyè ùvwa mumanye ne— ne Beleshààsà awu ùvwa mwitabùùje, anyi ne Danyèlè ùvwa nzambi, ki kumwenzelayè cimfwànyi, e kucibandishayè pambelu apu ne kwenzeyayè muntu yònsò bwà kucikukwilayè, ne bikwàbò. Nwamònu’s, bukalenge bwà bàà Bisàmbà byà bèndè bwàkabwela ne dyanzeja ku bukolè bwà dikuukwila dyà cimfwànyi cyà muntu munsantu, nènku bukalenge bwà bàà Bisàmbà byà bèndè budi bùjika ne dyanzeja ku bukolè dyà cimfwànyi cyà muntu munsantu, nwamònu’s, mùshindù ùmwèumwè awu.

170 Ne kùvwa mufùndù ku cimanu, wà myakulu myenyi, ku cibangidilu cyà bukalenge bwà bàà Bisàmbà byà bèndè, ùvwa muntu nànsha umwe kayi mwà kubala to pa kuumusha mupròfetà awu. Ne kudi mufùndù ku cimanu leelù ewu, ncyà bushùwà, “Ikabòde,” bwà ne butùmbi bwà Nzambi mbumane kuumuka ku bintu abi. Ne mufùndù ukaadi ku cimanu ne udi mwà kubadiibwa kudi meeji à nyumà àdi itabuuja bintu byà nyumà, àdi malediibwe kudi Nyumà wa Nzambi.

171 Mukùlákaji ewu Beleshààsà ùdi ùpàtuka ùkangata mpànzà yà Mukalenge, bwà kunwinamù mvinyò. Bwa cinyi? Ùvwa mwena bupidyà. Ùvwa wela meeji ne mmwena kwitabuuja, kadi ùvwa mwena bupidyà. Nwamònu's, ki cyòci aci, wàkabènga kwitabuuja Dìyi.

172 Aakàbà, yêyè uvwa mwena bupidyà, nànsha mùvwàye—mùvwàye wènza maalù bu ne kàvwa mwena bupidyà amu. To, to, yêyè ùvwa munkaci mwà beena kwitabuuja, kadi ùvwa mwena bupidyà. Wàkenza cinyi? Wàkasèla mukuukwidi wa mpingù, ne wàkaditwala, dikuukwila dyà mpingù adi, buludi mu Izalèlèlè. Ùvwa mwena bupidyà. Aci kaayi tudi bamanye.

173 Bàdi bavila Dìyi dyà Nzambi ne kí ndilelèlè dyònsò to. Mwena bupidyà awu, nwamònu's, mpindyewu vùlukàayi ne, yêyè mmwena lubombo. Nènku yêyè—yêyè ùdi wènza malu mùshindù awu, ùdi wàmba ne ùdi ùCìitabuuja, kadi ùdi ùCivila. Wàkamba ne: “Èè, byàbùngì byà ku Cyòci aci mbimpè.” Kadi piikala byònsò abi kabiyi bijaalame to, dìbà adi aci cidi cimuvwija mwena bupidyà. Bikèngela witabuuje kantu ne kantu kwònsò, ne byònsò bidì byambiibwe Mwómò amu abi. Bidì bikèngela biikale bilelèlè. Cyòci kaciyi cilelèlè to, wèwè mwambe mpindyewu ne: “Mémè ncyèna ngiitabuuja Aci to,” èè, dìbà adi udi mwena bupidyà.

174 Kuvwa muntu kampànda wàkangambila, musangu kampànda, mwambi kampànda—kampànda kwambaye ne: “Ncyèna ncyùka to, Mukalenge Branham, bantu nànsha bóbò bùngì bishi biine baùdiku mufwànyine kupatula ne—ne mwambè ne mbondopiibwe abu, mémè ncyèna mufwànyineku kuciitabuuja to.”

175 Mémè kwamba ne: “Ncyà bushùwà ne, kwèna mwà kuciitabuuja to. Wèwè udi mwena bupidyà. Kacivwa bwèbè wèwè to. Cidi ànu bwà beena kwitabuuja.”

176 Bikèngela ùCìitabùùjè. Nwamònu anyi? Kadi bóbò kabeena bàCìitabuuja to. Nènku panùdi numòna muntu mu cyòci aci, Pòlò (muprofeta) ùvwa mubinge pàakakulàye, wamba ne nebiikalè “bapapè mitù, badibàndishi, banangi bàà bisànkasànka kutàmba kwikala banangi bàà Nzambi; biikale ne cimwènèkelu cyà difwànà dyà Nzambi, kadi biikale bavila Bukolè bwàdì, Bukolè bwà Dìyi; bàà nàнку awu abu uumuka kùdibo.” Monaayi, bóbò bàdi bavila Dìyi mu kaabujima, kadi mu mmwenekelu yònsò mbatèndeledi. Mbeena bupidyà mu Dìyi dilelèlè, nànsha mùDidi dishindikiibwe.

177 Mu cikondo ne cikondo cyònsò, Nzambi wàkashindika Dìyi dyà bantu bangàmbi abu, Noa, ànu nàнку too ne ku Mòsà, ne bapròfeta bònsò, ne bakwàbò. Nzambi wàkaakwila ku citàmbe-mfùkilu ne kushindika Dìyi, kadi nànsha nàнку bantu abu bàkapatuka ànu pambèlù pààDi.

178 Kadi ki bayiidi mbôbò aba biimane mwaba awu, bàà makumi mwandamutekète abu, biikale batàngila Yesù wènza bintu byàkenzàYe abi, ne bamanye Mifùndù, ne Yéyè ubàmbila ne ki cikondo cìvwà cikèngela bwà cyôci eci kwenzekaci. Ne pashiishe pàakambàYe cintu kampànda ne: “Mwànà wa muntu! Nudi bafwànyine kwamba cinyi?” PàakabangàYe kubambila bwà dicibula dyà dyâmpà, ne bikwàbò, ne kutùngùnùkaYe ne kubàmbila bwà bintu binène, byà nyumà.

Ki bôbò kwamba ne: “Kaa, Edi’s ndíyi dikolè be!”

179 Yéyè kwamba ne: “Cinwamba pashiishe ncinyi piikalabi ne, Mwànà wa muntu, pànwàmumòna ùbànda mu Dyulu mudiYe mufùmìne amu?” Mwàkambàye ne: “Mmubidi anyi, peeshi n’Nyumà, udi ufùlùlùlula?” Nwamònu anyi?

180 Ki pashiishe kuyabo, bamba ne: “Kaa, Aci, to, mèmè ncyèna mwà kwitabuuja Aci to.” Nwamònu anyi? Bààkapatuka buludi, bàshìya Dìyi. Bôbò kabààkushààlaku too ne ku dimòna cìdi cyenzeka to. Ki—ki mwena bupidyà nyéyè awu.

181 Bôbò, cìdibo benza dìbà adi ncinyi? Tudi tujandula ne bôbò, ne bantu aba, beena kwitabuuja aba, beena kwitabuuja bàà ku dìnà abu, kadi mu mmwènekeli yà ntèndeleeleu, kadi bàdi bàpanga kumòna Bulelela bwà Dìyi dyà Nzambi bumanyishìbwe bwalu Dìdi dibèngangana ne cìdìbo biitabuuja. Nwamònu anyi?

182 Cyúdi witabuuja kacyèna ne cìdìci cishintulula to, nànsha wèwè mwikale ne lulamatu lwà bishi, nànsha wèwè mwikale mutèndeleeleedi wa bishi, anyi, aci kacyèna ne cintu nànsha cìmwè cyà dyenza naaci to. Meeji matòòke, mòna’s, aci kacyèna ne dipetangana nànsha dikesè ne cyôci aci to. Mèmè nkaadiku mumòne bantu bàà meeji matòòke bikolè! Mèmè nkaadiku mumòne bampàngaanu bòòsha bânà bààbò balela, bàbadiisha kudi ngandù, baamaamù ne bânà bààbò bàà mu mabòko. Aci’s nciitàmbe ne cìdi mwena Kilistò mufwànyine kwenza. Nwamònu anyi? Ne meeji matòòke ònsò bàdi biitabuuja, ne meeji matòòke ònsò, kadi bàvwa bapiile ne meeji ònsò matòòke.

183 Bantu bàdi bamba ne: “Èè, èkèleeziyà ewu’s ùtu kacya wìmana!” Aci, wèwè udi mupiile ne meeji ònsò matòòke, piikalàci cibèngangana ne Dìyi. “Èè, mpindyewu tàngilà, mèmè ncyèna ngiitabuuja cintu bu nàнку to!” Pàabi, Bible’s mmwambe ne Bivwa nàнку, nànsha nàнку! Nwamònu anyi? “Ncyèna ngiitabuuja ne bìdi bìkèngela bwà twètù kwenza Eci to.” Nànsha wèwè wela meeji ne kabyèna bikèngela bwà wèwè kwenza aci to. Nzambi ngudi mwàmbe ne cìdi ne cyà kwenjiibwa.

184 “Bimanyinu ebi nebìbàfile.” Too ne penyi? “Too ne pa buloba bujima.” Nganyi? “Kùdi cìfukìibwa cyònsò.” Nwamònu’s, neciikaleku! Mpindyewu, neciikale, neciikale ne cyà kwikalaku!

185 Nènku Mukenji wa dîbà edì utùdì tusankila mpindyewu ewu ewu, Bwikadi bwà Nzambi, ditùkù dyà ndekeelu, dîbà dyà dilòlò didì Makênkè ateema, ne bintu bìdì bikàngùdìibwè, ne Dìyì dishìndikìibwe ne dijaadikìibwe ne m’Bulelèlè; eku byambiibwe mu cipròfetà, eku byènzeka, ne ku maalu à mamanya ne byònsò, bijaadikìibwe ne Cìdì: “Yèsù Kilistò umwèumwè awu makèlèlè, too ne kashidi.” Nènku, muntu ùmuka wèla Aci nyimà, yèyè—yèyè mmwena bupidyà. Kakwèna ditekemena bwèndè yèyè to. Ukaadi mukòkèshiiibwe kudi bukòlè bwà Sàtaanà, pa nànkù kakwenaku ditekemena bwèndè yèyè to. Yèyè ukaadi mumane kusambuka ditekemena.

186 Ncinyi aci mpindyewu? Mwena kwitabuuja; mpindyewu mwena bupidyà; mpindyewu musùmbà mwísaatu, utùdì twakula bwalu bwàwù, ngwà mwena kwitabuuja wa budìngìbudìngì. Ki nsongàlùmè awu, mwena kwitabuuja wa budìngìbudìngì! Mpindyewu, vùlukààyì ne, mwòmò amu mùvwa mwimane bwònsò basatu. Mpindyewu, tudi tujandula mpindyewu ne, bàdì benza menemene ànu mudi tatwàbù wenza amu, Yudààsà.

Kuvwa Peetèlo ne bàpostòlò bakwàbò, beena kwitabuuja.

Kuvwa makumi mwandamutekète abu, beena bupidyà.

187 Nènku kùvwa Yudààsà, kacya ànu wàbàlamata, ùvwa mwena kwitabuuja wa budìngìbudìngì. Cìdìbò benza ncinyi? Ewu mmùshindù ùdì kacya ànu wàshàala mulamate too ne pàdìbò bapeta cintu kampànda, cilema mu Cyòcì amu. Bàdì misangu yònsò bakeba katàmbà kàà kwapuka naakù, kumòna mudibi byenzeka, kumòna ní kùdì mwà kwikala diyelè kampànda, nní budimù kampànda. Mbindile bwà kusùmbishiibwabo ne kasukì. Mbindile cyòcì aci.

188 Mwena bupidyà, kèna nànsha windila pabwìpì menemene to. Ùdì uCìpiisha, kàdì kukwata njila kuya.

189 Mwena kwitabuuja yèyè, nànsha kwenzeke cinyi, yèyè ùdì ùCìitabuuja, nànsha byà munyi, bwalu Cìdì n’Dìyì.

Ki misùmbà yènù yisatu nyòyì ayi.

190 Mwena bupidyà wa kale awu neàpàtuke kuya, ànu pa cintu cyà kumpàla cìdì cyambiibwe, cìdìyi kàyi muciswe aci. Mwanèètù, ki piikalaye mwà kuleeja mwèndè mudiye ànu piine apu mene. Yèyè’s mmwena bupidyà. Pòlò mmwambe ne: “Bààkapàtùka munkaci mwètù, bwalu kabàvwa bàà kutùdì to, ànu kwine cibangidilu aku’s. Bààkabànga nèètù.” “Kaa, nuvwa nunyeema lubilu bimpè; cyanùpùmbishi ncinyi?” Nwacimònu anyi? “Bààkapàtùka, bwalu kabàvwa bàà kutùdì to.” Pàdìbò bamòna Dìyì dyènda diya ditungunuke bipwàngàne menemene, mòna’s, bàvwa bajinga kupeta budimù kampànda bùvwàbò mwà kwenza. Nwamònu anyi?

191 Kadi beena kwitabuuja balelèlè kabèèna bàkonkolola kantu nànsha kàmwè to. Ncifundìibwe mu Dìyì, ne bòbò bàdì

baCiitabuuja, nènku bàdi ànu bàtùngùnuka. Kwàjìkì. Misangu yònsò, bààkafùnda ne. Byòbì kabìyì bifùnda to, mòna's, shaala wèwè ànu kule naabi, nànsha ní ncinyi cyenzeke. Bìkèngela ciikale Cifùnda. Nwamònu anyi? Ne bóbò bàdi bamòna Dìyì difùnda adi ne baDiitabuuja. Nènku bàdi bàmòna Nzambì ùkwàta mudimu mu Dìyì Dyèndè, bàmòna díbà, Mukenji, cikondo, ne bàdi benda naaDi.

¹⁹² Ànu mûngãmbi mu dindà emu, mùshindù ùvwà mukùlumpè Pilaatu mwà kwikala mubùngùluke pànshì, bufùku abu, ne dilubakana dyà kondo kèndè kàà mwoyi, ùteeta bwà kudikezula. Kì yèyè kwamba, ekelekele, díbà adi kakùyi mpatà to ùvwa mwele mbila butùkù bujimà, wamba ne: “Ndi—ndi—ndi—mwòwe byanza byànyì, bufùkù bujimà, kadi nyewu nciyi ànu mwà kuumvwa to. Nwamònu's, kì mbikezuke to. Ncyèna mwà kuya bwà katwilangana Nèndè to; ndi ne Mashì pa byanza byànyì.” Kaa, ekelekele! Wamònu's, kwikadi mupìile ku cyòci aci to. Nwamònu anyi?

¹⁹³ Àdi pa byanza byèbè. Kudi mùshindù ànu umwèpelè wùdi mwà kuUmusha; ngwa, kuItabuuja, ncyà bushùwà, kushààla citùpà cyàWù. Kì cìvwaWù meeelèlè pànshì aci.

¹⁹⁴ Mpindyewu, mwena kwitabuuja wa budìngìbudìngì ùdi ànu kacya wàlamata ne wenza maalù ànu bu muntu wa difwànà dyà Nzambì ne mwèndè mwònsò mudiye naamu, kadi munda mwà mwoyi wèndè ùdi munkaci mwà kuteeta bwà kupeta cìdì—cìdì, nwènù, mùshindù unùdi nucyènzà. Kaa, ditùnga's ndyùle ntèntè ne musùmbà awu, wà beena lubombo! Èyowà. Awu's n'Yudààsà. Aci's mmwòmò menemene. Kacya ànu wàlamata, mushaale citùpà cyà musùmbà awu; ùvwa mulami wa cibucilu, nwamònu's. Ùdi ùjembelela, ùdi ànu ne cyanza cyèndè cyolola bwà mfranga. Udi mwà kumòna aci, cintu cimwèpele aci, yèyè utu misangu yònsò wènda wìpatangana ne mfranga, ne mwikale ne cyanza cyolola bwà cyòci eci. Ne yèyè mmwena kwitabuuja wa budìngìbudìngì. Ùdi wenza maalù bu mwena kwitabuuja, kadi munda mwà mwoyi wèndè . . .

¹⁹⁵ Nudi bavùluke ne, uvwayè ùdìnga kàvwa Yesù to. Paanyimà pàà makumi mwandamutekète abu bamane kuumuka, ne beena kwitabuuja bamane kwangata dyàbò dipàngadika; kì Yèyè kukudimuka kudi beena kwitabuuja, kwambaYe ne: “Kucìdì ànu cintu kampànda mu nwènù amu,” bwalu wàkamba ne: “Ndi munùsungule dikumi ne bàbìdì, kadi umwe wa kunùdì ndémon.” Yesù ùvwa mumanye, kwambwila ànu ku cibangidilu aku, bwalu Yèyè ùvwa Dìyì. Ùvwa mumanye maalù masokòme à mu mwoyi.

¹⁹⁶ Mushindu mwine ùvwàbì bikolè's! Yindilàayi kakesè. Elàayi meeji mu ndòndò, mu ndòndò menemene, buludi! Mùshindù mwine ùvwàbì ne cyà kwikala biMukolèlè's, wenda ànu mwaba awu, ne muntu mwikale uMubiikila ne: “Mwanèètù,” ne mumanye díbà dyònsò ne yèyè awu ùvwa museeswishanganyi

uvwa mwà kuteeta kuMutonkola awu, ne kuMusumbisha ku binjànjà byà mfranga makumi àsàtù. Mùshindù mwine ùvwàbi bikolè bwà kucilama munda mwÈndè, eku wènda ne mulunda Wendè awu. KwambaYè mene ne: “Mulunda,” ùbìikila Yudààsà ne mmulunda Wendè, “mèmè ewu ncyèna neenù, dībà dyònsò edi anyi?” Mwikale mumanye munda mwà mwoyi Wèndè, kàdi kayi mwà kucyàmba to. Ùvwa mumanye, kacya ànu ku cibangidilu aku, ne nganyi mwine uvwa mwà kuMutungila awu.

¹⁹⁷ Ki mwena kwitabuuja wa budìngìbudìngì udi ànu mwindile awu. Yèyè neĩmbè aci, wàmba ne: “Kaa, ndi ngiitabuuja *cikampànda*, ne ndi ngiitabuuja *cikansanga*, ne ndi ngiitabuuja *cikankènga*. Kadi, kaa, nudi bamanye’s, mèmè kuumvwa muntu kampànda wàmba ne mmisangu búngì *kampànda*.” Kaa, nwamònu’s, mwikale ànu ne macì mabàwula.

¹⁹⁸ Mwena kwitabuuja mulelèlè katu ùmvwa cintu nànsha cimwè to ànu Dìyì. Kwajiki. Ùdi utabaleela Dìyì. Kèna ùkèba tutàmbà twà kwapuka naatù to. Kèna ùkèba mayele to. Yèyè ùdi witabuuja Nzambì, nènku aci cìdi cikosa bwalu, nènku ùdi utungunuka ànu ne kuya. Nwamònu anyi? S’ki mwena kwitabuuja nyèyè awu.

¹⁹⁹ Mwena bupidyà ùdi ùpàta mu kasunsa kàmwè, ne kènà mwà kushààla uteeleja Mukenji munda mwà tusuunsa dikumi to. Bikèngela ajuukè àpàtukè aye’s. Aci’s cìdi cibengangana ne twitabàayi wèndè, ne yèyè mwine kààkwikala ne cikwàbò kàbìdi cyà kwenza pa bwalu abu to, pa nànkù ùdi wela mulwà uya.

²⁰⁰ Dìbà adi, mwena kwitabuuja wa budìngìbudìngì awu ùdi ànu kacya wàlamata cyanàànà ne, Yudààsà awu. Nwamònu’s, ki mudìngyanganì nyèyè awu. Awu ke—awu ke mubule kaneemu awu, bu mèmè mwà kwamba dìyì bu nànkù. Yudààsà, ùdi wènda ùjembelela. Eci ke cikondo, misangu mikwabo, beena kwitabuuja bàà budìngìbudìngì aba bantu mbabànange bikolè. Ncyà bushùwà, beena kwitabuuja bàà budìngìbudìngì aba, nwamònu’s. Bàmwè bàà kùdìbo mbalùmè bàà bukolè, balonge tùlaasà, dipolome dyà docteur, difutu dinène, ne bikwàbò byònsò. Bàmwè bàà kùdìbo mbantu banène, bantu bàà luumvu lulenga lwà wòò, ànu mudi bàmà bàà Sàtaanà bafwànyine kwikala amu.

²⁰¹ Tàngilàayi mudì Sàtaanà mubànde kuntwaku ne mupetàngàne ne kantu ne kantu kwònsò kàà ku Dìyì adi; ùdi ànu mwindile bwà kupeta kaaba katekète mu Evà, pàdiye mwà kulejila bukolè bwèndè bwà kumuseeswiishila naabu, bwà kumutungila. Awu ùvwa—awu ùvwa Sàtaanà. Nènku’s ki Sàtaanà ewu, mu mmwenekelu wa Yudààsà, mu cikondo aci. Awu ùvwa n’Sàtaanà mu cikondo cyà kumpàla aci. Yèyè uvwa cinyi? Ùpetangana ne Dìyì too ne pàdi ànu kantu kakesè kàmwèpelè; ùdi ùteeta bwà kupeta kaaba kàà kupetelaye butekète kampànda.

202 Nènku ki cyôci aci menemene cidi Yudaàsà usangana mpindyewu mene. Neâlwe ànu ne mu disangisha, ne ukenzakana too ne padiye mwà kupeta kaaba kakesè aku, kàà yèye ne: “Kaa, s’ki bwalu mbwôbù abu! Ki cyôci eci!” Nwamònu anyi? “Kaa, s’ki mûshindù awu ùdibi byenjiibwe!” Nwamònu anyi? Ànu menemene’s.

203 Bààbûngì bàà kunùdi mbavùlùke kuntwaku dilòòlò adi pààkapàtukà muntu awu pa cibumbà cyà ku cyambilu apu. Úvwa wela meeji ne kùvwa lubùku lwà mu meeji lwà dibala dyà twarta twà disambila, ne muvwaye ùdyambidila ne wacijandùlù ànu pa dîbà adi mene. Mwanèètù, yèye—yèye’s ùvwa mutwishiiibwe ne mmucyènzè. Ki kulwayè mwaba awu. Úvwa wa mu èkèleeziyà utu kàyi witabuuja mu—mu—mu ebi, mu Èvànjeeliyò, Èvànjeeliyò mu kaabujima. Ke kubàndayè pa cibumbà cyà ku cyambilu apu. Mvwa mucyòke. Bàkaavwa badilongolola bwà kuya naanyi.

204 Kùvwa nku Windsor, mu Ontario. Mwômò amu, mufùmìne ku—ku Ètats-Unis kwàka, bapìcile ku Detroit, ku Windsor, dibàlaasà dinène adi.

205 Ki muntu ewu kubàndayè mulwàte nkoozi mufiikùlùke, ne cilàvwandà cikunze, umweka muntu wa meeji, wa meeji matwè ngwèng. Kulwayè pa cibumbà cyà ku cyambilu. Ki mèmè. . . Yèye kubànda. Ki mèmè ne: “Èè, anji lekèlà nkukwàtè ku cyanza cyèbè aci.” Mèmè ne: “Ndi mucyòke; nkaadi mumòne bikèènà-kumòna byàbûngì be. Lekèlè nkwate ànu ku cyanza cyèbè aci.” Nènku—nènku ncivwakù mutangila muntu awu to. Ki kutèekaye cyanza cyèndè pa cyànyì. Ki mèmè kwamba ne: “Mukalenge, kwena ne bwalu bubì to. Ndaaku kùyaayà.”

Yèye ne: “Kaa, pààkù’s, kùdi bwalu.”

206 Ki mèmè ne: “Èè, enzabi mmòne mwaba awu tũng.” Mèmè ne: “To, mukalenge, kakwèna cimanyinu nànsha cimwè to. To, mukalenge, wèwè udi muntu wa mubidi tumatuma.”

Yèye ne: “Ndà utangile karta kàànyì kàà disambila!”

207 Mèmè ne: “Cyùdi wèwè mufùndishe pa karta kèèbè kàà disambila nànsha ciikàle cinyi.” Mèmè ne: “Ncyèna bwalu ne karta kàà disambila to,” nciyi ngeela meeji to, nwamònu’s. Mvwa mucyòke ne muzengele. Nènku wanyi. . . Kadi ngàsà wa Nzambì, nudi numòna’s, ùcivwa ànu mwaba awu.

208 Vùlukaayi ne, Yèye mukutume, mMwenzèjiibwe bwà kukucyùka. Ki mmèmè to; n’Yèye. Yèye ngudi muCitume. Ndi ne cyà kwimanyina ànu pa cidi cilelèlà.

209 Pààkeelà Mòsà dikombo dyèndè panshi, kwandamukadi nyoka, ne beena majimbu kwenzabò cintu cimwècimwè aci, cìvwà Mòsà mwà kwenza ncinyi s’ànku kwimana mwaba awu ne kwindila ngàsà wa Nzambì’s? Kwajiki. Cintu cimwècimwè aci.

Wàkalonda mēyì matùma. Kadi's nudi bamanye cyàkenzekà, kî mmwômò anyi? Nwamònu anyi?

210 Muntu ewu kwambayè ne: "Mpindyewu," mwàkambaye, "kùdi cintu kampànda. Tàngilààyì karta kàànyì kàà disambila."

211 Mémè kwamba ne: "Èè, s'udi mufwànyine kwikala mupete diitabuuja dyàbùngì, ne ciine aci cifwànyine kwikala cicyènzè," kuyi wela meeji to, nwamònu's. Mémè kwenza. . . nciyi mukutume nànsha ntèmà to.

212 Dìbà adi kukangulayè mbòtà yà nkooci wendè e kutùntùmikayè cyádi cyèndè. Kwambayè ne: "Kì cyôci eci's!" wambila batèeleji.

Ki mémè kudyàmbidila ne: "Cidi munkaci mwà kwenzeka apa ncinyi?"

213 Kukenzakanaye. Yèyè ne: "Kadi's ki bwalu mbwòbù abu!" Yèyè ne: "Udi umòna budimu anyi?" Ki Yudààsà wenù nyèyè awu, mutèndeledi, muyiishi wa dīgumba dinène. Yèyè ne: "Kadi's ki bwalu mbwòbù abu! Mémè mvwa ne 'diitabuuja dyàbùngì be.' Mpindyewu, yèyè mmutekète menemene, mu mùshindù wà kayi mwà kubala lubùku to. Nwamònu's, kacjena kàbidì cimuvwila to." Ki yèyè awu ne: "Kì ndiitabuuja dyànyì divwà dinène menemene to." Yèyè kwamba ne: "Ndi mucifunde pa karta kàà disambila, kadi mpindyewu yèyè kèna mwà kucikwata to, wamònu's." Yèyè ne: "Kì budimù abu!"

214 Ki mémè kudyàmbidila ne: "Cidì munkaci mwà kwenzeka ncinyi?" Dìbà adi ngàsà wa Nzambì kupwekaye.

215 Mémè kwamba ne: "Mukalenge, mbwà cinyì bùdi dyabulu mutèeke munda mwà mwoyi wèbè bwà kuteeta kushima Nzambì?" Yudààsà wa cyena leelù! Mémè kwamba ne: "Udi wa mu église de Christ. . ." Umfwilaayikù luse. Èè, ngàmanyi kucyàmbà's. "Wèwè udi muyiishi wa mu église de Christ. Udi wa mu église de Christ, wa mu États-Unis mwàmwa. Ne muntu mulùme udi musòmbe mwaba awu muvwàle nkooci wa bleu wàwa, ne mukàjèèbè ne mukàjèndè bàdi basòmbe mwaba wàwa bàba, nuwva basòmbe ku mèèsà dilòòlò dishaale àvwà mabwikila cintu kampànda cyà mâyi à matàmbà pamutù, cya—cyadija mùshindù ewu, ne wèwè kudifwànyikijila ne eci civwa 'lubùku,' ne nùwva nùlwa dilòòlò edi."

216 Muntu awu kujuukaye kuulu. Kwambayè ne: "Aci mbulelèlè ànu pa bòbò. Nzambì, mfwileku luse!"

217 Mémè ne: "Mukalenge, wèwè's udi mufunde 'Disaamà dyà cyádi ne kansèrè' pa karta aku, nènku mpindyewu wabipeci. Bikaadi byèbè mpindyewu."

Ki kunkwataye ku mukòlò wà mupanu, kwambaye ne: "Mémè ncivwa. . ."

218 Mémè kwamba ne: "Mémè ncyèna ne cyà dyenza to. Tùngùnukà wèwè ànu ne kuya. Abu mbukutangile wèwè ne

Nzambì. Udi mufunde dipiila dyèbè ànu pa karta kèèbè apu.” Nènku aci kadi kumupyaci. Ki cyònsò cìvwàku ncyòci aci.

²¹⁹ Nwamònu’s, beena kwitabuuja bàà budingibudingi, baseeswiishanganyi, bateeta kupeta cilèma kampànda kùdi Nzambì ne ku Dìyi Dyèndè. Ki baa Yudààsà mbòbò abu. Ki bòbò abu. Nudi numòna mùvwà Yudààsà mupàtùke anyi? Nudi numòna mùvwà muntu awu mupàtùke anyi? Mùshindù awu ke udi beena kwitabuuja bàà budingibudingi bènza. Nwamònu’s, beena kwitabuuja bàà budingibudingi, kaa, biikale balonge tulaasà tutumbuke, ne misangu mikwàbò, diteetangana dinène dyà makànda didi dilwe pankaci pàà Dìyi ne twitabàayi yàbò. Nènku, pàdibi byenzeka nànkù, badi bàdisumbisha ku dingumba dyàbò ànu menemene mùvwà mudyanjididi wabò mwenzè amu, Yudààsà. Yudààsà wàkadisumbisha kùdi dingumba dyèndè; kusumbisha Yesù, Dìyi, kudi dingumba dyèndè, ne kutungilayè Yesù Kilistò paanyimà pàà yèyè mumane kwamba mùvwàye citùpà cyàDì.

²²⁰ Bambi misangu mikwàbò balaka mukana bàmba mudibo basadidi bàà Kilistò, ne pàdi Dìyi dimanyishiibe mu kaabujima bwà kushindikiiwa bwà ditùkù adi, bwà ne m’Mukenji wà dìbà adi, nènku nebàdìpàanyishe pambelu apu bwà dimanyika, kudi dingumba dyàbò; ànu menemene mùvwà Yudààsà mwenze, mutungile Yesù kudi Bàfaalesa ne Basadoka. Nyumà awu katu ùfwa to, pa nànkù awu ke yèyè awu munkaci mwà beena kwitabuuja, beena kwitabuuja bàà budingibudingi, ne beena bupidyà. Nwamònu’s, aci’s mmwòmò menemene, kupweka kadi kupànyisha Yesù ku binjànjà byà mfranga makumi asatu; ne bantu bààbùngi nebàcyenze leelù ewu bwà ticket wa byàkudyà, bwà lukàmà lwà ndola lwà nsàkidilù ku lumingu; ncyà bushùwà, bavila Nzambì udi mwimane munkaci mwàbò awu, wàkasumba mwoyi wàbò awu, ne mwikale ne Dìyi mu kaabujima.

²²¹ Nènku nebàmbè ne: “Kaa, matùkù à bishimà awu’s akaadi mamane kupita!” anyi ne: “Nzambì kèna dijinga ne cintu bu nànkù leelù ewu to.” Nwamònu anyi? “Kaa, mèmè’s ndi ngiitabuuja Yesù Kilistò, Mwànà wa Nzambì! ‘Mwoyo Mariyà, maamù wa Mvidi Mukulu, ùdi wa dyàkalenga munkaci mwà bakàji!’” Bintu bikwàbò byònsò bidibo bàmba ebi! Ki bàmwè bàà kùdibo kwambabo ne: “Mèmè ndi ngiitabuuja Twitabàayi wa Bàpostolò. Ndi ngiitabuuja Nzambì Taatù, wa Bukolè bwònsò, Mufùki wa maulu ne buloba. Mèmè ndi ngiitabuuja èkèleeziya wa cijila wa Kàtòlike kàà cyena Loomo, ne bintu byònsò ebi.”

²²² Ngambilaayi tûng dìbà dikaavwaku kacya mupostolo mupeteku twitabàayi wa mùshindù awu. Pìikalabi ne bapostolo bavwa ne twitabàayi umwèpele, kadi’s ngudi mufundiiibe mu Byenzedi 2.38 ne: “Nyingalalaayi nubatijiibe, muntu ne muntu wa kunùdi, mu Dìnà dyà Yesù Kilistò, bwà dilekelediibe dyà

mpèkaatù yènu, nènku nenùpetè kupà kwà Nyumà Mwímpè.” Piikalaku twitabàayi kàmpànda kùdìbo, s’ùvwa nyèyè awu. Kabavwa ne twitabàayi to. Civwa n’Dìyì. Aci ncilelèlè. Cidi cishàala ànu cintu cimwècimwè aci. Ki kabeji kàà bwanga nkòkò aku bwà dyondopiibwa dyà disaamà dyà mpèkaatù: “Nènku nenùpete kupà kwà Nyumà Mwímpè! Nyingalalaayi ne nubatiijìbwe bwà dilekelediibwa dyà mpèkaatù, nwamònu’s, nènku nenùpete kupà kwà Nyumà Mwímpè.”

223 Kadi bàdi bàdisùmbisha, bu Yudaàsà. Ki mwena kwitabuuja wa budingìbudingì nyèyè awu. Bàmwè bàà kùdìbo bàdi ne dimanya diyiila ne panshi. Kadi mwena kwitabuuja wa budingìbudingì ewu, tangilàayi mulumyàna awu. Ki muntu wa budimè nyèyè awu. Kalumyànà kadi maalu akatonda lukasa, ne katupika, kadyela kaya, ku cyambilu cikesè cyònsò cìdiku kakàyi kaswe to, kwèna uteya ntema kudiye to; yèyè ùdi ànu mwena bupidyà cyanàànà, twamb’eku twamb’eku. Kadi panùdi numòna mulumyànà ewu, mwena kwitabuuja wa budingìbudingì, kacya ànu watungunuka, nwamònu’s, s’ki Yudaàsà nyèyè awu. S’nyèyè awu.

224 Bu mamanya manène. Nèntèèle mèna mwab’ewu. Byòbi biine, ncyà bushùwà ne kabivwa bikèngela mèmè kucyenza to, kadi nembàtèèlè, nànsha byà munyi, bwà nwènu kucimanya. Byenze bu mùdi, Elvis Presley, Red Foley, Ernie Ford, Pat Boone. Elvis Presley, mwena Mpenta; Pat Boone, église de Christ; Red Foley, mulami mu église de Christ; ne ndi ngeela meeji ne Ernest Ford m’Méthodiste. Nènku bantu bònsò abu ne mamanya awu, bàà meeji matwè, ku telèviyò. Ne bantu bàdi bàmba ne: “Èè, kì mbatèndeledi anyi? Bàdi bimba misambu.” Aci kacyna cyùmviwa cintu nànsha cimwè to. Èyowà’s, mukalenge. Bàseeswisha bàà pa buloba!

225 Cidibo bàpètamu ncinyi? Yudaàsà ùvwa ne tucyelè twà binjànjà makumi àsàtù. Elvis, cisumbù cyà ma Cadillacs, ne lukama, anyi nkàmà yibidi, miliyò lukama ne makumi ataanu yà ndola, anyi ndola mùliyò mujimà pa mikàbà ya mèyi ne bintu byà mùshindù awu. Pat Boone ne bakwàbò abu. Nànsha bòbò biikale bàà mu èkèleeziyà kaayi, ne bikwabo byònsò, bìdi ànu lubombo. Ndiitabuuja dyà budingìbudingì. Ncibadi. Bwalu, nsòmbelu wàbò ùdi ujaadika ne, kabyena nànu to. Mmwòmò.

226 Pashiishe kùdi bângà bàdi ne mamanya biikale balongolodi banène, lungenyi lwà buloba ebu. Bàdi bayiisha Èvànjeeliyò, mudibo bàmba’s; bantu bàà meeji matwè, beena mamanya a mu mitù. Teelejàayi, muntu udi mwibidijìbwe mu cipaapu aci, kì mmuyiishi to. Mmwenji wa miyiiki. Ki lutàtu lùdiku leelù ndòlù alu, tudi ne benji bàà miyiiki.

227 Yesù kàakambaku ne: “Ndaayi nukayiile bwà kwenza cikampànda to.” Yèyè wàkamba ne: “Ndaayi nukayiishe

Èvànjeeliyò, ne bimanyinu ebi nebifile diyiiisha.” Nwamònu anyi? Nwamònu anyi?

228 Aci kî nkuyiila bwà kufumba mwenji wa miyiiki udi mwà kwimana ànu cyanààna, ekèlekèle, kubàpaya ne bintu byà bituuta ku mèsu abi, wenza ne udyúmvwè bu ne udi musòmbè mu bwikadi bwà Mwarkanjèlo. Ki mmwômò to. “Biikale ne cimwenekelu cyà difwàna dyà Nzambi,” nudi numòna’s, aci’s mmwenji wa miyiiki, kî n’Nyumà Mwimpè mu cyenzi to.

229 Muntu mukese kampànda wa kàyi mufwànyine kumanya nànsha ABC to, mmufwànyine kupweka ne Bukolè bwà diitabuuja pàmwè ne Dîyi; kadi kwenza ne Nyumà Mwimpè ènzè bintu bìdi muntu awu kàyiku mumanye kantu nànsha kàmwè pa byòbì to, ne ùbivila. Nwamònu anyi? S’ki bwalu mbwòbù abu.

230 Bantu banène! Èyowà’s, mukalenge. Dîbà adi, mbalongolodi. Bàdi bàtante, bàtuute dyàkalenga, bàà meeji matwè mu lungenyi lwà pa buloba.

231 Ànu menemene mwàkenzela Sàtaanà Evà, mukàji mukese, uvwa kàyi ne pàbwàsà awu. Wàkalwa buludì kudiye e kuteeta kumusumbishayè lungenyi lwà ne neyikale ne meeji matwè kupita mùvwàye, nènku ki cìvwàye ukeba ncyòci aci. Pamutù pàà kushààla ànu ne cìvwà Dîyi dyambe, yèyè—yèyè ùvwa muswè kumusumbisha lungenyi lwà ne yèyè mmufwànyine kwikala ne meeji matwè ngwèng, nènku mukàji kusumba cintu cyèndè aci. Nènku bòbò bacidi ànu bènza cintu cìmwècìmwè aci leelù ewu. “Lungenyi lwà pa buloba ebu ndukutakane bwà Nzambi.” Èyowà’s, mukalenge.

232 To, mukalenge! Kaa, ekèlekèle, cintu ànu cìmwècìmwè cìvwà Bàfaalèsà bapaane, ne benze aci, nwamònu’s, biikale ne lungenyi lùvwàbo bamanye alu. Kàdi—kàdi bàvila Dîyi dyònsò dyà Nzambi mu kaabujimà.

233 PàdiDi dishindikìibwe ànu menemene ne babajààdikileDì, bàcidi ànu bàteeta kupeta cintu kampànda, ne kwela meeji ne Ndijimbu. Kî mbashindàme mu meeji àbò to. Kabèèna mwà kuCìitabuuja to. Udi mwà kubàmbila cintu kanà cyònsò, kàdi bàlùkilaku kàbìdi; ùdi mwà kubàmbila cintu kanà cyònsò, bàdi ànu bàlùkila kàbìdi. Nènku bàdi ànu. . . Nènku kabèèna mwà kuCìtukija mu ndòndò to, nwamònu’s. Nènku batangilaayi; bàdi bakeba mpungà kampànda, katàmbà kàà kwapuka naaku. Ki cyònsò cidìbo bajinga aci.

234 Ki bwalu abu, bu ne kabivwa bwà ngàsà wa Nzambi, tutàmbà tònsò twà kwapuka naatu tùvwàbo mwà kupeta mu mèmè atu nùnkù twediibwe patòoke, bu mèmè mwà kwikala naatu. Nwamònu anyi? Nngàsà wa Nzambi, bwalu kakwèna tutàmbà twà kwapuka naatu mu Dîyi dyà Nzambi to; ànu Èvànjeeliyò mululame. Ntu ngàmbà pa ciibidilu ne, muntu kanà yònsò ewu, wèwè mummòne ndongesha anyi ngènza cintu kanà cyònsò cidì kaciyi cinwangana menemene ne Dîyi dyà Nzambi

to, lwâku ùngambìle. Ki cintu cìdì cijikija tutàmbà twà kwapuka naatu tunùdì nuteeta kupeta atu ncyôci eci. Tangijàayi ànu mèsu ènù pa Cyôci aci, ne kanwàkumòna tutàmbà twà kwapuka naatu atu to, bwalu kakwèna tutàmbà twà kwapuka naatu nànsha.

²³⁵ Mpindyewu vùlukàayi, Yudààsà wàkeela meeji ne ùvwà mupetè kàmwè. Mulumyànà awu ùvwà wela meeji ne ùvwà mukàpetè. Misangu yàbùngì, bàtu beela meeji ne bàdì bàkàpeta, kadi cìdì cijaadikiibwe ne kí ncyôci to. Ki beena kwitabuuja bàà budingìbudingì, beena lubombo mbòbò abu. Badi byà lukàmà makumi citèèmà ne bitaanu pa Dìyì, ànu mùvwà kàbìdì Evà, kadi, makumi citèèmà ne citèèmà ne byà dikumi citèèmà; kadi cìvwà cyà dikumi cimwè aci cìvwà cikèbà lufù ne tunyinyangyina twònsò atu.

²³⁶ Ki cintu cimwèpelè cìdì cipiisha bulongolodi ne bikwàbò ncyôci aci, bwalu kabèena bângata Dìyì dyà Nzambi mu kaabujimà to. Ki beena kwitabuuja bàà budingìbudingì abu's. Tudi tusangana ne ki mùtùbi misangu yònsò, kadi bavila Dìyì dilelèlè, dishindika. Bòbò aba bàtu misangu yònsò mu lukongo ne lukongo lwònsò. Tudi tubàsangana ànu padibo bènda baya apu, kàbìdì batèndeledi bà njànjàmà.

²³⁷ Mpindyewu, nkaadi ndilongolola bwà kujikija mpindyewu mene, bwalu ndi mwangate citùpà cikwàbò cyà dībà.

²³⁸ Yesù, tudi tujandula ne Yéyè mmutùdimwije bwà matùkù à ndekeelu aa ne bantu bàà mùshindù ewu, bwà ne nebìikale batàmbà kufwàngana ne cintu cilelèlè menemene, mu mùshindù wà ne nebìikale bafwànyine kakuyi mpatà to kuseeswisha ne Basungula mene. Ncinyi aci? Abu mba Yudààsà, ba—bantu bàdì baya ntàntà mule be. Tàngilàayi, bàdì—bàdì mene mwà kwela mbila, beela mbila mikolè, balaka mukana bàmba mudibo bìipata badémons, ne bikwàbò byònsò, kadi pashìshe kukudimuka kadi kuvila Dìyì. Menemene's. Bàdì ne cimwènèkelu cyà difwàna dyà Nzambi. Mbafwànyine—mbafwànyine—mbafwànyine pàmwè ne . . .

²³⁹ Tàngilàayi numòne kwàkafikà Yudààsà. Nyumà wa Yudààsà wàkadifinda mu Èvànjeeliyò, too ne ku mwaba wà Mpenta. Kadi pàakafika dībà dyà dibatiiza dyèndè mu Dìna dyà Yesù Kilistò, ne bintu bikwàbò bìdì byènda ne dibatiiza dyà Nyumà Mwìmpè ebi, e kupatukaye. Kuleejaye cìvwàye. Ne nyumà awu ùdì mwà kusòmbela mu mangumba awu amu too ne padiye ukafika ku Bulelèlè abu, dībà adi didi dyàlukila dyàkamwe cyànyimà, ànu mùdì nyumà udi pa bòbò awu, uvwa mudyànjdila dilwa dyàbò awu; ànu muvwa Yone mudyànjdile dilwa dyà Yesù amu.

“Mpindyewu wèwè udi wamba ne: ‘Yesù’s mmwambe ne nebìikalè batàmbe kutwàngana nkundù menemene.’”

²⁴⁰ Mpindyewu: “Basungula,” bàà mùshindù awu ke bàdì ne dìnà dyàbò mu Mukànda, kacya ku difukà, dyà Mwoyi, bàdì

biitabuuja, anyi difùkà dyà dyulu ne buloba, bàdi biitabuuja Diyì dyònsò dyà Mwoyi. Ki Basungula mbòbò abu.

²⁴¹ Mpindyewu tàngilààyaaku bantu aba. Mpindyewu, ndi ngàmba bwalu ebu ne kaneemu ne diciina dyònsò, ne dinanga dyà difwàna dyà Nzambi; mèmè nciyi naadi to, ndi—ndi—bidi binkèngela dibiikila dyà ku cyoshelu, mèmè mwine. Monaayi, Yesù wàkamba ne mbafwànyine kuseeswisha Basungula mene. Mpindyewu, aci kî ncifwànyine kwikala ba-Méthodistes to, aci kî ncifwànyine kwikala ba-Baptistes to; tudi bamanye ne mbeena bupidyà, ànu kwine kwònsò aku. Kadi, mbulongolodi bwà beena Mpenta buvwa bubweje mu dingumba adi, badyèlèlè mikàlù yàbò, kabàyi ne Diyì to; ne beele mukalu ne batèèke bulongolodi bwàbò bòbò biine, ne bakàngile Diyì pambelu pàà bimanu. Bòbò's mbafwànyine kuseeswisha ne Basungula mene, bafwànàngàne ànu menemene! Bàmba ne: “Bàdi badila myadi. Bàdi beela mbila. Bàdi batupika baya muulu bàalukila. Bàdi bàmba mùdìbo ne masangisha à dyondopa.” Ki mwàkenzà Yudààsà, ne ki mwàkenzà bakwàbò bònsò abu pààbò. Pààkapàtukàbo, bààkaalukila benda basànka ne bikwàbò byònsò, bàvwà mene ne mènà àbò mafùnda mu Mukàndà wà Mwoyi wà Mwànà wa mùkòòkò.

²⁴² Kadi, vùlukààyi ne, Mukàji-musela kèna—kèna—kèna ubwela mu kasùmbu aku to. Ûdi ùya mu Dyambwibwa.

²⁴³ Ku Cilumbulwidi, cilumbulwidi civwa citèèkùibwe ne: “Ne mikàndà yàkabuuludiibwa, beena lwonji; ne Mukàndà mukwàbò, ùdi Mukàndà wà Mwoyi, wàkabuuludiibwa,” nènku kùvwa Mukàji-musela mwaba awu bwà kulumbulwisha. Nwamònu anyi? Nwamònu anyi? “Mukàndà mukwàbò wàkabuuludiibwa, ùdi Mukàndà wà Mwoyi.” Ki mikòòkò ku lumwè luseke, ne mbuji ku luseke lukwàbò. Nwamònu's, bantu bavwa bafwè kale wàwa, bàvwà kabàyikù bapete mpunga to, bòbò ki bìikalà ne cyà kutàpùludiibwa.

²⁴⁴ Kadi mpindyewu monaayi, “kuseeswisha” Basungula mene, tàngilààyi kasùmbù aku. Ki kasùmbù kàdi ànu kènda kàlondà ànu menemene aku ne: “Èyowà's, mwanèètù. Àlèluuyah! Èyowà. Butùmbi kùdì Nzambi's wè!” Ne ànu munda mwà mwoyi wèbè menemene amu udi umòna cidìbo bàkwàcila neebe mudimu aci; mbwà kukubweja mu èkèleeziyà (bwà cinyi?) bwà kubwejamu musùmbà, bwà kubàngata dikùta dyònsò didìbo mwà kupatulamu adi. Nudi nwela meeji ne ncyèna mumanye aci anyi? Mbafwànyine kwela meeji ne ncyèna mucimanyè to, kàdi ndi mucimanyè.

²⁴⁵ Yesù ùvwa mumanye, kuumukila ku cibangidilu, ne museeswishanganyi awu uvwà nganyi. Nwamònu anyi? Nwamònu anyi? Kàdi cyàkenzaYe nciyi? Wàkindila ànu cyanààna too ne pa diine dībà adi. Ki citùdì ne cyà kwenza

misangu yônsò, kwindila too ne pa dîbà adi. Kwenji bwalu mu wèwè mwine to. Indila too ne pa kasunsa aku.

²⁴⁶ Biikale ne-...mmwenekelu, ne bàtùngùnuka, aku ke kasùmbù kaseeswiishi aku. Tàbaleelàayi museeswishanganyi awu, kasùmbu aku; kî mwena—kî mwena kwitabuuja to, kî mwena bupidyà to, kadi mwena kwitabuuja wa budingìbudingì awu. Kaa, ekèlekèle! Cìdìbo bènza ncinyi? Mbàtùngùnuka ànu ne kwenda kuya too ne pàdìbo beela meeji ne bàdi mwà kupetaku cintu kampànda, bàdyàpule cicyele cyônsò cyà mfranga cìdìbo mwà kupàtùla mu bantu, nwamònu's, ne pashìishe benda bàbyùngwijila mu mangumba manène aa; àdi kakuyi mpatà to abengangana, kàdi pààbò mbacimanyè. Nwamònu's, mbacimanyè.

²⁴⁷ Cyùdi wamba kaciyèna ne cìdìci cishintulula to. Bàtu misangu yônsò ànu bàdyànjila kudìmwija bantu bààbò kumpàla kwà wèwè kulwa ne: “KanùCìtèèlejiku to.”

²⁴⁸ Muntu kampànda, mwikàle ne dikima dyônsò bwà kwimana mu Ohio mwàmwa, ànu dîbà dîvwà Mwanèètù Kidd mwondopiibwe adi, kupatukaye pa cibùmbà cyà ku cyambilu apu, e kwambayè ne: “Mpindyewu, Mwanèètù Branham mmupròfetà, kakuyi mpatà nànsha yà kànà to, padiye mu dilaabiibwa. Kadi mpindyewu,” yèyè ne, “pàdi dilaabiibwa adi dimuumuka,” yèyè ne, “kanwitabuujiku Dilongesha dyèndè to, bwalu Ndibi.”

²⁴⁹ Kadi yèyè kàvwa mumanye ne, pàmvwà musòmbe mu cibambalu cyànyì, Mukalenge uvwa mucimbuulwilè. Ki mèmè kupweka buludi mwaba awu. Nènku bààbùngì bàà kunùdi bàvwàpu. Mèmè kwamba ne: “Mbwa cinyi bùdi muntu mufwànyine kwamba cintu bu nàнку, padi Dìyì...” Mpindyewu, nwamònu's, kacya mèmè ncitukù mwambe ne ndi mupròfetà to; yèyè gudi mwambe nàнку.

²⁵⁰ Nènku mupròfetà, mwaku awu *mupròfetà*, “mwena lùmòno,” Dipungila Dikulu-...Mpindyewu, ngumvwijilu wa Anglais wa *mupròfetà* ùdi uswa kwamba ne “muyiishi.” Kadi *mwena lùmònu* wa Dipungila Dikulukulu ùvwa muntu uvwa ne “Dyumvwija dyà Nzambì dyà Dìyì,” ne ùvwa mujaadikiibwe kùdi Dìyì divwa dilwa kudiye ne ùdyanjila kucimòna. Ki cìvwà...

²⁵¹ Kadi muntu udi mwà kwamba ne muntu kampànda mmupròfetà, kadi pashìishe kwamba ne Dilongesha dyèndè ndyà mafi? Pìikala aci kaciyi cilukabatà cyà mfranga, ncinyi aci? Dîbà dikaadi pabwìpi dyàkokiibwa cintu aci mu cyalu. Èyowà. Kàdi awu ke mùshindù ùdi, mwena kwitabuuja wa budingìbudingì awu, ukutuuta cyanza paanyimà, ùkubìikila “mwaneètù,” ànu bu Yudaàsà menemene. Kadi, vùlukàayi ne, Yèyè ùvwa mumanye kacya ku cibangidilu. Yèyè ùcidi ànu mumanye. Èyowà's, mukalenge.

252 Vùlukàayi ne, bônsò bàdi batèeleja mukàbà wà mèyi ewu abu, pààbò, ncyà bushùwà, nudi mu kàmwè kàà ku tusumbu atu. Ncyà bushùwà menemene. Mpindyewu tukàadi tujikija. Muntu yônsò udi kaaba aka, ùsanganyiibwa kaaba aka, muntu yônsò udi utèeleja mukàbà wa mèyi ewu; ne nànsha mùdibi ne ditùkù dikwàbò nebikengele bwà mèmè kuumuka pa buloba ebu, mikàbà yà mèyi eyi neyitungunuke ne kwikala ne mwoyi. Ncyà bushùwà. Nwamònu anyi? Nènku udi mu kàmwè kàà ku tusumbu etu. Bidi bikèngela bwà wèwè kwikala mu kàmwè kàà ku twòtò etu. Mmwômò menemene's. Kanwèna mwà kupàndùkakù to. Udi mu kàmwè kàà ku tusumbu etu.

253 Mpindyewu cinyi? Fwànàngana ne muntu wa mu Bible utu mwitabùuje, mwaba uwàkiitabuuja Diyì pàakashindikiiibwaDi, bu mungàDijaadiki dilòlò edi amu, bwà ne civwa n'Diyi dishindika misangu yônsò, misangu yônsò ànu bibengangane ne diitabuuja dyà bantu bônsò.

254 Bu ne uvwa ne mwoyi mu matùkù à Noa, mpindyewu ngànji ànu nkonke cyanààna, nduseke kaayi lúvwa mufwànyine kwikala, luseke lwà èkèleeziyà anyi luseke lwà Noa, mupròfetà awu? Nwamònu anyi?

255 Bu ne uvwa ne mwoyi mu matùkù à Mòsà, uvwa mwà kwikala mwitabuuje mukenji wa Mòsà paanyimà pàà Wòwò mumane kwikala mujaadikiibwe ne mushindikiiibwe kudi Nzambì anyi? Kàdi uvwakù mufwànyine kwikala muyè ne Koola ne Daatàna, ne bakwabo abu, ne kwamba ne: “Wèwè kwèna muntu wa cijila ànu nkaayebe to. Bantu bakwàbò bàdi mwà kwenza bintu byùdi wenza ebi, bôbò pààbò” anyi? Nwamònu anyi? Uvwa mfwànyine kwikalala umwe wa kudibo, ne ke cyùdi, dilòlò edi.

256 Anyi uvwa mufwànyine kwikala ne Danyèlè, anyi ne èkèleeziyà uvwa kwishì kwàka mu difesto dyà Nebùkandanèèsà divwàbò munkaci mwà kwenza adi? Nwamònu anyi? Uvwa mufwànyine kwikala pambelu, anyi uvwa mufwànyine kwikala ku difestò dyà mutooyi aku, mwà—mwandà wà mikùkuuku uvwabo munkaci mwà kucyònkomokela awu?

257 Ûvwa mufwànyine kwikala ne Eliyà, muntu uvwa mwimane nkàayendè awu, ubiikidiibwa ne: “muntu mukulakaji wa cimfiikàamunda, muntu mujimije lungenyi,” ne mwimane pa lusongo lwà kakùnà, ne mutù wèndè mwikale wèngelela mwaba awu ku dîbà, ne dikombo dikònyàngale mu cyanza, nyuunyi yimudiisha, uh-huh, muntu kampànda wa cimfiikàamunda? Anyi uvwa mufwànyine kwikala ne baakwidi ne bakwàbò bônsò abu kuntwaku ne Izàbèlà, ne bakàjì bavwa bavwale mvwadilu wa cyena leelù abu? Nènku Eliyà mwimane kuulu mwaba awu, munkaci mwà kubàtândisha, ne mwèndè mwònsò! Nduseke kaayi lúvwa mwà kwikala muye ne mukàjèèbè? Elangana ànu

meeji cyanàànà. Anji kudifwànyikijilabi ànu cyanàànà dilòòlò edi tûng.

258 Mu matùkù à Yesù, uvwa mufwànyine kwikala ne Mwàna wa balùme uvwa kàyi ne mikàndà yà dijaadikiibwa naayi ewu anyi? Kavwa ne mikàndà yà dingumba nànsha dimwè to. Bòbò kwamba ne: “Udi mufùmine ku cilongelu kaayi? Katwèna Neebè mu mikàndà yètù to. Munyì mùdi upeta elu lungenyi? Munyì mùdi mufwànyine kwikala mulonge twètù katùyì kacya baKulongeshe bintu ebi? Mmu cilongelu kaayi mùdi mupicile? Wèwè udi Méthodiste, Presbytérien, anyi Baptiste?” Yèyè kavwa nànsha wa ku cimwè cyà ku byòbì abi to. [Mwaneèètù wa balùme kampànda ùdi wàmba ne: “Ùvwa ne Dìyi.”—Muf.] Ncyà bushùwà. Yèyè ùvwa Dìyi. Ncyà bushùwà menemene, mwanèètù. Udi . . .

259 Anyi uvwa mufwànyine kwikala mwangate luseke lwà Bàfaalèsà bàà diitabuuja dyà cyena leelù dyà mwakwidi wa kale mudipwekeshe awu uvwa umwèka ànu bu wa kalolo ne maalu malenga à dikema, ne bulongolodi bwàkajuukà kacya ku Nsangilu wa ku Nicée abu, anyi kacya ànu Luther wàcìvwija bulongolodi? Anyi mmu kasumbù kaayi—kaayi kawùvwà mufwànyine kusanganyibwa? Uvwa mufwànyine kwikala usanganyibwa ku . . . Nkasumbu kaayi kawùvwà mufwànyine kwikala naaku? Uvwa mufwànyine kwikala mwimane ne Dìyi paùvwà muDimòne dishindikiiibwe ne dijaadikiibwe kumpàla kwèbè, Dìvwa m’Mukenji wa ditùkù, anyi uvwa mwà kwikala mutwà ku cyà èkèleeziyà? Mpindyewu anji ànu kudifwànyikijila nkààyèbè dilòòlò edi.

260 Ùvwa mufwànyine kwikala kwàka ne bàpostòlò, pààkamònàbo Yesù ne bintu byònsò bìdi kabiyi byùmvwika ebi, pààkasaminaYe bayiishi abu, wàmba ne: “Nudi diswa dyà nyoka”? Bayiishi bàà meeji matòòke, bàà kale abu bavwa balonge Dìyi adi. Yèyè kwamba ne: “Nwènu nudi ànu nyòngòlò wa bìvì, ne nudi—nudi bùle ntèntè ne mifùbà yà bantu bafwè. Nwènu nudi ànu cimanu cilaaba lupèmbà.” Nwamònu anyi? “Nwènu lukòngò lwà nyòkà yà ntòòkà nwé.” Nuvwàku bafwànyine kwimana ne Muntu wa ciiji cicolè wa mùshindù awu, wakiimana kuntwaku ne kutàndisha ne kushimbwila byònsò panshi awu anyi? Yèyè kwamba ne: “Nganyi wa kunùdi aku udi mwà kuMpiisha bwà mpèkaatù? Pangiiikala Nciyi mwenze cìdi Taatù mwambe to . . .”

261 Bòbò kwamba ne: “Kanutèèlejiku to. Muntu awu udi ne nyumà mubì pambidi Pèndè. Mmupàle. Mmutomboke. Ùdi—Ùdi ne nyumà wa dyabùlù pambidi Pèndè. Nwamònu anyi? Mpindyewu, kùdi . . . mùdiYe wènza aci, Yèyè, aci’s nnyumà wa lubùkù munda Mwèndè. Wèwè udi wamba . . . Yèyè ùdi cinyi? Mamwèndè muMulelè kumpàla kwà yèyè ne bàyèndè kusèlanganabò. Nwamònu anyi? Nwamònu anyi? Mmu cilongelu

kaayi mudiYe mupatukile? Katwèna nànsha ne bujaadiki bwà ne Yèyè mmuyèku mu kàlaasà kàà mbangilu nànsha.”

262 Kadi nànsha nàнку pàcìvwàYe ne bidimu dikùmi ne bìbìdì, Yèyè wàkakèmeshà ne wakafwìshà bakwidi bundu, ne Dìyì dyà Nzambì. Nwamònu anyi? M’Mupatukile mu cilongelu kaayi? Cilongelu cyà ku Dyulu. Nwamònu anyi? “Panwàmòna Mwànà wa muntu upweka ùfumina kudiYe mufùme.” Nwamònu’s, ki cìvwà cilongelu Cyèndè aci’s.

263 Kadi uvwakù mufwànyine kwikala mwimane ne bàpostòlò, kùdì Muntu wa mùshindù awu, pààkalwà diteetangana dyà makàndà anyi?

264 Anyi uvwa mufwànyine mu bushùwà bwà bwalu mwà kwikala muyè ne makùmi mwandamutekète abu, ne mwamba ne: “Èè, twètù netwàlukile ku èkèleeziyà wètù pìikalabi ne mùshindù awu ki uWàlongeshà, wamba ne, Wèwè, ‘Mwànà wa muntu’? Pààbi, twamb’eku twamb’eku, Wèwè udi nganyi? Wèwè udi cinyi? Muntu ànu bu mèmè ewu, tudya Neebè, kadi uteeta bwà kwamba ne Wèwè udi cintu kampànda. Ndi mukujòje Wèwè. Ngàmònu butekètè Bwèbè. Ndi muKumòna udila mwadi. Ndi muKumòne wenza *cikampànda*, *cikansanga*, anyi *cikankènga*. Ndi muKumòne Wèwè uya neetù mu cipèèlà, ne bikwàbò byònsò byà mùshindù awu mpindyewu, kadi’s Wèwè udi ànu muntu wètù ewu. Kadi wamba Mùdì mufùme mu Dyulu. Abi’s bìdì bimpìcila.” Wèwè uvwa mufwànyine kwikala mupàtuke muye naabu anyi? Anyi uvwa mwà kwikala mupàtuke ne makumi mwandamutekète abu? Anyi uvwa mufwànyine kwikala mwende ne bàpostòlò ne Kilistò?

265 Pààkateeta Martin Munsantu kulama dibàtiiza mu Dìnà dyà Yesù Kilistò, mu èkèleeziyà, pàvwàye uteeta bwà kulama bimanyinu ne maalu a kukèma ne bikwàbò apu, ne èkèleeziyà wa Kàtòlikè wakapiisha muntu awu ne kàyi nànsha mwà kumujiangulula to nànsha kakesè, ne kumwipatayè, uvwa mufwànyine kwikala mwangàte luseke lwà twitabàayi wa cyena Kàtòlikè, anyi uvwa mufwànyine kwikala mwimane ku luseke lwà Martin Munsantu? Pààkabèngàye kukùdika bimfwànyì byà mùshindù yònsò ebi byà—byà bantu bafwè, ne kubikuukwila, kukukwila byòyi bimfwànyì abi, ne bikwàbò, pààkabèngàye mèyi maswika àvwàbò basàkidile awu, wàkamba ne: “Dìyì dìikale Bulelèlà!” Ne Nzambì wàkamushindika ne bimanyinu binène ne maalu a kukèma, ne bìvwàye ùdyànjila kwamba bìvwà byènzeka. Ne byònsò byàkenzàye abi, wàkendela mu Nyumà wa Nzambì ne kucijaadikaye, nènku nànsha umwe wa ku bansaserdòsè abu anyi ni ncinyi cyònsò kacìvwà mwà kwenza bwalu nànsha bumwe pa cyòcì aci nànsha. Uvwa mufwànyine kwikala mwangate luseke lwèndè muye ne Martin Munsantu, anyi uvwa mwà kwikala muye ne twitabàayi wa cyena Kàtòlikè awu?

266 Mpindyewu Dìyì, mpindyewu Dìyì dyà Nzambi anyi mèyi maswikà à èkèleeziyà, bìdi kumpàla kwènù. Nudiku mwà kwangata, kwitaba cìdi mèyi maswikà à èkèleeziyà, anyi nudi nwangata cìdi Dìyì dyàmbà?

267 Vùlukàayi ne, mu bikondo byònsò bivwa ànu bu mudibi mpindyewu emu mene. Kudi misangu yònsò ànu diitabuuja dyà bantu bònsò munkaci mwà bantu, ne ciine aci citu misangu yònsò ànu cibengangane kakesè ndambù ne Dìyì dilelèlè. Vùlukàayi ne, kacya kabìtuku byanji kwikala byà kuCivila ku cyàbwàshì nànsha. Kaa, to. Mufwilàkanyì ne Kilistò katu uvila Dìyì to. Ncyà bushuwa's. Yèyè ùdi wamba ne mmuDiitabùùje, kadi kadiyì ànu dyònsò mùshindù ùdiDi Difùndùbwe apa ewu to. Nwamònu anyi? Nwamònu anyi?

268 Sàtaanà wàkambila Evà, Evà kuCìitabuujayè cyònsò, pa kuumusha ànu katùpà kakesè cyanàànà kàakamwambilàye aku. Bàdi baCyàngàta ànu cyònsò pa kuumusha ànu katùpà kakesè cyanàànà, nkafwànyine kwikala, “nda ku ciina cyà mâyi,” nkafwànyine kwikala cinga cintu; bikèngela nuDyàngàtè, katùpà ne katùpà kwònsò, ànu mùdiDi *Apa* emu, nwamònu's, ànu mùdiDi dyambùbwe *Apa* emu, ndifwànyine kukwenzulwija byenzedi byà dyàmbedi kàbìdi, kàdi cìdi ànu cìdi Dìyì dyambè. Edi ndiyelè dyà Sàtaanà kacya ànu wàkwata naadi mudimu dyàmbedi pa Evà, ànu bwà kubenga kwitabuuja kakesè cyanàànà Dìyì.

269 Nènku, misangu yònsò dítu ànu ditapulula bitùpà bisatu byà bantu ebi, Dìyì dìdi ditapulula bantu aba. Mu cikondo ne cikondo cyònsò bitu ànu mùshindù awu. Cikondo cyònsò cikàadiku eci, bitu ànu mùshindù awu, pààkatùmà Nzambi cintu kampànda mu cyalu ne kuCimanyisha bitòoke tòò, Dìyì Dyèndè.

270 Dìbà adi kùdi aba bàdi balonda, bàdi bàmba mùdìbo beena kwitabuuja, ne ncìdìbo. Kùdi bàdi kabàyi baswè kukudimuka to. Bàdi biitabuuja Dìyì. Paùdi ànu mushààle mu Dìyì, bàdi bàDiitabuuja.

271 Kadi pàdiDi ànu dibengangana kakesè, nànsha Nzambi muDijaadike mùshindù kaayi ne cìdìbo biitabuuja, bàdi bàmba ne: “Èè, mèmè—mèmè—mèmè ncyèna mumanye *Aci* to.” Ki mwena bupidyà nyèyè awu's.

272 Anyì udi ulonda ànu bwà kumòna too ne pawàpetà pà kulambakeena wamba ne: “Uh-huh, dyàleelù tudi panshi anyì tudi pa kazubu!” Yudààsà wa ùtwa muntu kampànda keelà paanyimà, mwàkenzàye amu. “Mvwa mumanyè ne cìvwa mwà kupàtukila patòoke, nànsha ku tootooto nànsha ku ndaandaanda. Dyàleelù ambàayi kàbìdi's!” Ki mwena kwitabuuja wa budìngìbudìngì nyèyè awu. Katùpà ne katùpà kààci kònsò, tudi tukamòna mu Bible.

273 Mwànà mukese wa balùme musangu kampànda, mu Kentucky emu, mukolèle ku mikùnà kwàka, yèyè—yèyè kàvwaku

mwânji kufika mwaba ùvwà lumwènú lwà kudimwenenamu nànsha. Bàvwa ne kapesè kakesè kalamika kuulu kwà mucì, kàdi kacya kàvwakù mwanji kudimònakù yêyè mwine to. Kulwayè muneemu mu Louisville emu, mwàkalondabu, kushààlayè kwà mamwèndè mwakùnyì. Nènku ùvwa musòmbèle mu umwe wa ku nzùbu milenga ya dikema, nzùbu wa cyena kale. Pààkabwelabò mu umwe wa ku—ku nzùbu yà bulààlu uvwa ne—ne ciibi cìvwà ne lumwènu kuulu kwàcì kwònsò aku, kuulu too ne kwinshì kwà ciibi aci. Nwamònu anyì?

274 Nènku pààkabanga kalùmyànà aku kwenda kunyemakana mu nzùbu amu, kwanji kwimanakù. Johnny mwànà mutekète awu kumònayè Johnny mwànà mutekète. Nwamònu anyì? Nènku kudikoonyaye mu mutù, ne Johnny mwànà mutekète wa mu lumwènu kudikoonyaye mu mutù. Kusekaye, ne Johnny mwànà mutekète wa mu lumwènu awu amu kusekayè. Kutùpikayè kuya muulu kupweka panshì, ne Johnny mwànà mutekète awu kutupikayè kuya muulu kupweka panshì mu lumwènu amu's. Nwamònu anyì? Kuseemenaye pabwìpì menemene. Kwelaye meeji ne ùvwa mmwànà mutekète wa balùme uvwayè mwà kunaya nèndè, ki kuseemenaye. Dyàkamwe, kutwaye munu mu lumwènu amu. Kukudimukaye, ne baledi bèndè bàvwa munkacì mwà kumutangila. Kwambaye ne: “Maman, wàwa s'mmèmè.”

275 Mpindyewu udi utangila mu *Eci*, kàdi wèwè udi nganyi? Uh-huh. Uh-huh. Nganyi wa ku tu-Johnnys twànà tutekète etu údi utentula? Nganyi udi wèwè, nudi numòna anyì? Udi umwe wabò.

276 Awu's ngumwe wabò, umwe udi mwà kukùdimuka, kalema kakesè kàà kumpàla kawùdi mupete, kawùdi mubikile ne nkalema aku. Nwamònu anyì?

277 Ukàteete ne Dìyì kàdi umòne ní ncyà bushùwà, pìikalabi ne Dìyì didi dìjaadika bintu byònsò. Nwamònu's, ùjaadika bintu byònsò ku Dìyì. Yesù ngwákamba ne enzàyi nànkù. Èyowà's, mukalenge. “Shààlaayi bakwàte bikolè ku cìdì cìmpè.” Ki cyàkambàYe menemene ncyòci aci.

278 Mpindyewu tàngilà mu lumwènu lwà Dìyì dyà Nzambì, mu bikondo bikwàbò, nènku tàngilà ne mmu kasumbu kaayi kàà ku tusumbu etu kawùdi mufwànyine kumanyikilamu. Mpindyewu anji elàbi ànu meeji, bu ne uvwa ne mwoyi mu matùkù à Noa, bu ne uvwa ne mwoyi mu matùkù à Mòsà, bu ne uvwa ne mwoyi mu matùkù à Yesù, anyì umwe wa kudìbo, nànsha ciikàle cinyì, anji elàbi ànu meeji bwà kasumbu kaayi kawùdi mufwànyine kufwanyikijibwa naaku aku. Elanganàayibi meeji pa bwalu abu dilòlò edi.

279 Dìbà adi, ngiikadilu webè wa mpindyewu. Mpindyewu, anji elabi meeji túng mpindyewu. Eci ncyà ndòndò mule mpindyewu. Kadi kùcìdyatakàjì tò. Ngiikadilu webè wa mpindyewu ke udi ukujaadikila ne mmu kasumbu kaayi múvwa mufwànyine

kusanganyibwa kale wàwa. Mpindyewu, nudi banzuji bàà cilumbù cyènù nwènù biine, ke cidi cijaadika cinùdi.

²⁸⁰ Révérend, mwambi, uvwa mufwànyine kusanganyibwa ne kasumbu kaayi pàkambà Yesù díyì dikolè boo bwà kudìtabuuja apu? Cinyi? Cinyi? Paanyimà pàà Yéyè mumane kumanyishiibwa mu byònsò ne Yéyè uvwa Díyì, nwamònu's, kadi pààbì, díyì adi, kacya kanùtukù banji kuumvwa cintu nànsha cimwè bu nànkù to, “Mwànà wa muntu, cinwenzà ncinyi bu Yéyè mwà kubànda mu Dyulu mudiYe mufùme?”

²⁸¹ Ki wèwè kwamba ne: “Èè, mèmè's ndi mumanye kùdìYe muledibwè. Ndi mumanyè papa Wendè, ndi mumanyè maman Wendè, kadi's ki Yéyè ewu wamba ne Neàbande kuulu kùdìYe mufùme.” Aci's ncifwànyine kunùpicila ndambu, kì mmwòmò anyi, mukalenge? Uh-huh. Eci civwa mwà kwikala cinùpicile ndambu; kanùvwa mwà kwikala baCìpwekeshe ne mala to. Mínga misangu ncintu cimwècimwè eci leelù ewu. Dìbà adi tàngilààyì mu lumwènù lwà Díyì dyà Nzambi kàdi numòne panùdi biimanyine. Kaa, museeswishi wa bantu, kwenji aci nànsha.

²⁸² Tàngilà, udi mu kàmwè kàà ku tusumbu etu. Mu ngiikadilu webè wa mpindyewu ànu pàtùdi twakula apa, ngiikadilu wa mpindyewu wa meeki, wa, wèwè udi kaaba aka mu batèeleji bàdi bamwèka ne mèsù aba, ne wèwè wíkala mu batèeleji bàdi kabàyi bamwènèka bàà mukàbà wà mèyì ewu, Ngiikadilu webè wa meeki mpindyewu paanyimà pàà wèwè mumanè kuteeleja mukàbà wà mèyì ewu, ke udi ukujaadikila kasumbu kaùdi usanganyibwamu. Ùdi ùkwambila ànu menemene mwaba wùdi, ní udi mwena kwitabuujà mu Díyì ne neùshaale naaDi, ní uvwa mufwànyine kupatuka kuya, anyi kukànga mukàbà wà mèyì awu. Hmm? Aci ncidi cyàmba byùdi mwenze. Kwèna muswe kuWùtèeleja to, kadi kuWùkanga, kwamba ne: “Ncyèna muswe kuteeleja Aci to,” awu, awu ke mwena bupidyà awu's. Nwamònu's, kùyi wimanyika bwà kuciteeta ne kumòna ní Cidi Bulelèlà anyi to. Nwamònu anyi? Anyi kushààla ànu kacya walamata uteeta ànu mwà kupeta cilema kampànda cidi ku Dyòdi, dìbà adi udi umanya kaaba kaùdi usanganyibwa, wèwè pèèbè. Cidi cikwambila.

²⁸³ Nzambi àtùkwacisheku bwà kuCìitabuujà ne kwimanyinaPù, ne kwikala ne lulamatu ku Dyòdi, ne kutumikila Díyì, bwalu Yéyè ùdi Díyì. Nudi nwiitabuujà aci anyi?

Twanjààyì, twanjààyì kusambila.

²⁸⁴ Taatù wa mu Dyulu munanga, mùshindù mene ùdibi bikolè's, misangu ne misangu, bwà kwamba maalu aa, ne mumanye ne pàmwàpa binunu makumi byà bantu nebàtèelejè cyòci eci pa mukàbà wà mèyì, pàdiyi yènda yitambakana mu ditùnga ne yènda yinyùnguluka pa buloba bujimà. Kadi, Mukalenge Munanga, ncilelèlà, ncilelèlà menemene. Ndi

ndomba, Mukalenge, dyàmbedi kezulaku mwoyi wanyì. Éyì Mukalenge, ùntetèku, ùmpimèku.

²⁸⁵ Inyikaku mèsù èbè panshi ùntàngìle, Mukalenge. Ndi ne butekètè. Ndi—ndi—ndi. . . Ndi—ndi mucyòke. Ndi—ndi muzengele. Muminu wànyì mmupate. Yànyì—yànyì—mishiku yànyì—mmi—mmi—mmi—mmingúme, kàbìdì. Ne, ne mubidi wànyì mmupòyòyonge, ndi ngènda nkulakaja. Nènku—nènku kacyàkwikalaku kàbìdì misangu mipitepite búngì to, Mukalenge, pàmwàpa, dinyùnguluka dyàbúngì dyà díbà, too—too ne mungìkàla—too ne mungìkàla ngènda nya.

²⁸⁶ Nènku mpindyewu nkenkètèku, mpindyewu, Taatù. Nènku kwòkò—kwòkò cintu kampànda cìndì ngenza cibi, kàdi nciyi mucimanye to, Wèwè—Wèwè ucimbuulwile ànu cyanààna, Mukalenge. Wèwè—Wèwè ùndèjè. Ndi—ndi mudilongolole mpindyewu bwà kucyènza bimpè.

²⁸⁷ Ndi nditangila mèmè mwine mwaba awu mu lumwènu lwà Díyì dyà Nzambì. Ndi mwimane penyì? Ndi mmòna cimfwànyì cyànyì cileeya Yesù Kilistò anyì? Kì muntu ùndì mmòna mu lumwènu awu anyì? Ndi mmòna umwe wa ku beena kwitabuuja bàà mu Dipungila Dikulukulu, anyì beena kwitabuuja bàà mu Dipungila Dipyadìpyà anyì? Ndi mmòna mwena kwitabuuja wa budìngìbudìngì anyì? Ndi ndimòna mèmè mwine bu mwena bupidyà udi kàyi mufwànyìne kwimana bwà kutèèleja Díyì to, ne mufwànyìne kwangata lungenyì lwà cyena dìngumba pamutù pààDì anyì? Ndiku mudimòne mèmè mwine ngenda njèmbèlela, nteeta bwà kupeta katàmbà kàà kwapuka naaku anyì?

²⁸⁸ Mukalenge, byòbì biikale nànkù, nkezule ànu—ànu's, Mukalenge. Enzaku bwà mwoyi wànyì wikaleku mukezuke ne mutòke. Bwalu, eci mmwoyi wànyì, Mukalenge, ndi. . . Cidi, ndi muswe bwà wikàle mujaalame. Kabyèna ne dikwacìsha bwà kucyènza ànu citùpà nànsha, kòkò mùshindù wa kucyènza kucyènzèlamu. Mèmè, ndi muswe bwà cyòci aci kulongolodiibwaci bimpè, Taatù. Kaciyi ànu aci nkààyaaci to, kàdi ndi mufwànyìne kwikala ndombola balùme mu ntùpàkànyì, ne bakàjì mu ntùpàkànyì, ne bantu bándì munange, ne bàdì bannange; díbà adi, ndi mufwànyìne kwikala mutùpàkane.

²⁸⁹ Nènku, Taatù, kwòkò kwikale cintu kampànda, bu mèmè mwà kwikala mwélè meeji dilòlò edi ne èkèleeziyà kampànda wa cyena mangumba ùvwa wa cyà bushùwà; anyi ne Nsangilu wa Maèkèleeziyà ùvwa wa cyà bushùwà, bu ne ciibúngì cyà bantu civwa cibìngè; Mukalenge Nzambì, ngambùlwishèku bwà ntambe kwikala muntu mukùmbàne, ne mwena Kilistò mukùmbàne, bwà kwitaba cilèmà cyànyì ne kutumà bantu aba mwaba ùndì ngeela meeji ne mmufwànyìne kwikala mujaalàme. Nsukuleku. Anyìshaku ntangile ne mmòne. Kàdi pakaadìbì bikafika ku bintu abi, Mukalenge, bwà ku dyànyì dimòna, biikàle ne mmwenekelu ayi kàdi bàvila Díyì; udi mwà

kubambilaCì, kàdi nànsha nànkù bàmba ne: “Èè, Kacyèna ne cìdici cishintulula to. Cìdi...Nzambì kèna ùCitekemena mpindyewu to.”

²⁹⁰ Mukalenge, ndi ngiitabuuja ne Wèwè udi Yesù umwèumwè awu. Wèwè udi Nzambì umweumwe Úvwà awu. Wèwè ucìdi ànu Nzambì, ne Kwèna ushintuluka to. Mèmè ndi ngiitabuuja ne Bible ewu n’Dìyì Dyèbè, ne ndi ngiitabuuja ne Wèwè ne Dìyì Dyèbè nudi cintu cìmwè.

²⁹¹ Nènku ndi ndomba, Nzambì, bwà Wèwè kutùpa Nyumà Mwímpè Webè, bwà kufùlùlula Dìyì, bwà kutùpeesha Bukolè bufùlùludi; bwà ne, dngà ditùkù pìikalà mwoyi mujike, ne Wèwè mujikije neetù, bwà twamòna mwà kufùlùludiibwa ne kubànda mu Dyulu mutùvwà, mu meeji à Nzambì, kumpàla kwà difùkà dyà dyulu ne buloba. Nzambì, enzaku nànkù.

²⁹² Fwaku mpèkaatù yètù luse, Taatù. Kwòkò balùme anyi bakàji kaaba aka, bàdi biimane mu kasumbu kakwàbò aku, kakàyi kàà beena kwitabuuja balelèlè mu Dìyì, Nzambì, sukulaku myoyi yàbò. Kòkò muntu kanà yònsò ewu munkaci mwà kùteeleja mukàbà wà mèyi ewu, anyi wawùtèeleja, Ndi ndomba bwà disukula dyà myoyi yàbò, bwà Wèwè kubasukula, Mukalenge. Ncyèna—ncyèna muswè kubàmòna bajimine to. Nzambì, ndi ndomba bwà Wèwè—Wèwè watùkwacishaku bwà twètù kuumvwa ne dipiila dimwè kadyèna—kadyèna mwà kwakaja dipiila dikwàbò nànsha. Kùdi ànu mùshindù umwèpelè wà kucyènzà, ngwà kuumusha bilemà byònsò bibìdi mu njila, ne kulengela. Nènku ndi ndomba, Taatù, bwà Wèwè kutwenzelaku cyòci aci, ku Yesù Kilistò Mukalenge wètù.

²⁹³ Ne mitù yètù miinyika, myoyi yètù miinyika, mpindyewu ndi muswè bwà nwènù kwanji kwimana ndambu wa tusunsa.

²⁹⁴ Panààkamòna cikèenà-kumòna cyà iferno, muciiikale—muciiikale mwànà mukese wa nsongàalùmè, mèmè e kumòna bwòwà bwàci. Dìbà adi, ndi mwà kwikala mutùpàkane mu cyòci eci. Aci ncifwànyine kwikala ànu bwalu bwà dyanjila kuumvwa. Ncifwanyine kwikala nànkù. Ncyèna mumanye to. Mbyenze ànu bu ne mvwa mwaba kampànda. Cìvwa cyà mu bùntù menemene.

Pashiishe, ànu àbìdi àdi panshi aa, pangààkamònà bipaapu byà babènèshiiibwe.

²⁹⁵ Pàmvwà nsanganyibwà mu bipaapu byà bajimine, mèmè kwela lubila lukolè ne: “Èyi Nzambì wa yààya, kulekediku muntu ulwa mwab’ewu to!” Wèwè kwèna mwà, kakwèna mwakulu ùdi mwà kukumvwija bintu bìdi byenza bwòwà bidiku to. Kakwèna mùshindù wà mèmè kunwàmabila to. Wèwè mwikale witaabuuja ne kudi iferno wa uteema mudilu, mùle ntèntè ne kapyà ne soufre, aci ncifwànyine kwikala lu—lutenda lutalale lubishi pa kucipàlakaja ne cìdi bintu bìdi bikwacisha bwòwà

byà mu ngiikadilu wa bajimine amu, ne dikenga dìdì—dìdì disanganyibwa mu mwine mwaba awu.

296 Kadi bu mémè muteete bwà kunwàmbila bintu bìdi bifwànyine kupita cyumvwilu cyà muntu, Ncivwaku ànu mwà kuumvwija mwaba wa babèneshiibwe awu to, wà ditalala dyà njàjàmà's wè! Kakuyi kufwà nànsha, kakuyi kukulakaja nànsha, kakuyi kusaama nànsha; kwikala misangu yònsò ànu nsongà, kwikala misangu yònsò ànu ne mubidi tumatuma, ne kakuyi kufwà nànsha; Mwoyi wà Cyendèlèlè, mu disànkà dyà bunsonga, ne kakuyikù mpèkaatù anyi nî ncinyi cikwàbò nànsha! Kaa, kakwèna ànu mùshindù mene wà kumvwi-... kumvwija, kucyùmvwija to.

297 Nànsha Pòlò Munsantu mwine, wàkamba ne: “Bìdi dîsù kadiyi dimòne, bìdi dicì kadiyi dyùmvwè, anyi bitu mene kabiyi byànji kubwela mu mwoyi wà muntu to,” kwèna nànsha mwà kucyùmvwà to; kakwèna mùshindù wa kucyùmvwija to, “cidi Nzambì naaci bwàbù bóbò, mu cibucilu, bàdi baMunange abu's.”

298 Nènku mpindyewu, bu mùdìbi ne eci ncilelèlà cyà menemene, bònsò bàdi kaaba aka ne batèèleji bàdi kabàyi bamwèka, tudi baleejiiibwe mu cimfwànyì mwaba ewu, dilòlòlò edi, mu kàmwè kàà ku tusumbu etu. Anyi tudi beena kwitabuuja bashùwashùwàle. . . Uciteete ne Dìyi. Piikalabi ne Dìyi ndyàmbe cintu kampànda, ne ekèleeziyà mwambe cintu kampànda cyà cishiilàngàne, cyùdi mufwànyine kwangata ncinyi? Tàngilà mu lumwènù lwà Dìyi dyà Nzambì bwà ùmonè ne mmu kasumbu kaayi mùdi mwimanyine. Nènku pawikala kuyi nànkù to, dilòlòlò edi, ne apa ne mu batèèleji bàdi kabàyi bamwèka, pawikala kuyi nànkù to, pawikala kuyi mu musumba wà diitabuuja awu to, ndiku mwà kukusambidilaku ne dîyi dimwè mpindyewu, bwà wabwelaku mu musumba wà bàdi biitabuuja awu anyi?

299 Nènku nudiku mwà kuleeja cintu cimwècimwè aci, kùdi Nzambì; ne mutù wènù mwinyika, myoyi yènù minyika, mèsù ènù mabwita, ne kumpàla kwà Nzambì? Misangu mikwàbò bantu batu ànu ne bwòwà ndambu, nudi bamanye's, bwà kwela ànu byanza byàbò muulu, bàciina mwena mutumba naabò. . . Pààbi, kabivwa bikèngela bwà kwikalabo mùshindù awu to, kàdi bivwa bikèngela bwà bóbò—bóbò kwikala ne budiswilè bwà kushààla biimane kuulu, kwamba ne: “Mémè, ndi mupiile. Ndi mupiile.”

300 “Ewu udi—ewu udi ubwikila mpèkaatù wendè kààkutantaku to, kàdi ewu wàtonda mpèkaatù wendè neàfwidiibwe luse.” Nwamònu anyi? *Mpèkaatù* ncinyi's? “Bupidyà,” bupidyà mu (cinyi?) Dìyi.

301 Mpindyewu, pawikala kuyi mu kasumbu aku to, ne kùdi bintu byùdì—byùdì umòna mu Bible ne udi ànu cyanàànà. . . mu—mu èbè. . . mu—mu èbè—mu meeji èbè à mu mutù awu,

kwêna—kwêna mwà kucimòna to. Udi ànu... Udi mumanye ne Bible ngudi mwambe nàнку, kàdi udi ànu... Kwêna mwà kucyùmvwà to, kàdi pèèbè muswe kucyùmvwà. Ambà ne: “Nzambì, enzaku bwà mèmè mpetè dyumvwà. NènKutùmìkilè.”

³⁰² Udiku mwà kwela cianza muulu anyì, kwamba ne: “Wamvùlukakù patùdì tusambila apa”? Nzambì àkubènèshè. Nzambì àkubènèshè. Abi's mbîmpè. Nwamònu anyì?

³⁰³ Mu bulelèlè menemene anji elààyibi ànu meeji pa bwalu abu: “Kudiku cintu kampànda mu Bible emu cîndi—cîndi ànu—ncîndi nciyì ànu nciyi mumanye anyì? Ndi—ndi—ndi—ndi nciina ne nkwèpi kùngààdipetà mèmè mwine mu ùmwè wà ku misumbà mikwàbò ayì. Pàmwàpa nènkadipeta ne bàà makumi mwandamutekète abu, bwà ne ndi... Kùdi ànu bintu kampànda bìndi... Mbinkolèlè mèmè bwà kuumvwà mùvwà—mùvwà Nzambì mwà kwenza bintu ebi, mùshindù ùvwàYe mwà kwikala, mùshindù ùvwà Yesù mwà kwikala uwèumwè awu, mùshindù—mùshindù ùdi bintu ebi's. Mèmè—mèmè ncyèna nCyùmvwà to. Ndi muswè kuCyùmvwà. Ndi—ndi muswe kuCìitabuuja. Nènku, Nzambì, nkwacishaaku bwà bupidyà bwànyì. Ndi—ndi muswè kwikala citùpà cyàDì. Ndi muswè kwikala mwabanyanganyi wa Dìyì. Ndi muDiswè munda mwànyì.”

³⁰⁴ “Nwènu bashààle munda Mwànyì, ne Dìyì Dyànyì dishààle munda mwènu, díbà adi nùlombè cinwàswà aci.” Yone Munsantu 15. Tudi bàmanyè ne aci ncilelèlè. Tàngilààyì ne: “Nwènu bashààle,” kanuyi nwàbwela nwàpàtuka, nwàbwela nwàpàtukau to, kadi, “nwènu bashààle munda Mwànyì,” ne Yèyè ùdi Dìyì, “ne Dyòdì dishààle munda mwènu, díbà adi lombaayi ànu cinùdi baswè ne necinùpèèbwe. Nenùcipetè.”

³⁰⁵ “Ewu udi wàkidila Méyì Àànyì, ne witabuuja Ewu wàkantùma Mèmè, ùkaadi muumuke ku lufù muyè ku Mwoyi.” Kadi udiku mwà kwakidila Dìyì, dyàmbedi anyì? Udiku mwà kwakidila Dìyì, Dìyì dyònsò, Kilistò yònsò anyì? Kilistò n'Dìyì dilaaba. Yèyè ùdi Dìyì, dilaaba.

³⁰⁶ *Kilistò* mbwena kwamba ne “Mulaaba maanyì,” Dìyì dilaaba bwà ditùkù adi, dimwènèshìibwe, Musùngidi, Mupikudi. Apu mpavwàYe ne cyà kulwa, ne Yèyè nguvwa Muntu mulaaba maanyì awu bwà kwangataye kaaba aku.

³⁰⁷ Mpindyewu n'Nyumà Mwîmpè mu matùkù à ndekeelu, bwà kukenkesha Makènkè à ibaamulòòlò, dyalujulula dyà Diitabuuja [Katùpà kàà mukàbà wà mèyì munda mutupù—Muf.] didì didiyatakaja ku makàsà, kupicila ku màngumba; upiisha màngumba ne walukila ku Diitabuuja dyà ku cibangidilu, mwikale ne Diitabuuja dyà ku cibangidilu dyà mu Bible; Bible wa ku cibangidilu, mwikale witabuuja Dìyì Dyèndè dyònsò, kàyi ùsakidilaku ne uMufikisha ku dyamba *cikampànda* ne kwamba

cikansanga to. ÛCyàmba ànu mùdici cyambiùbwè, ne bùdi naabu mbwà kuciitabuuja mùshindù awu.

³⁰⁸ Kudiku muntu udi kacya kayi mwele byanza byèndè muulu, udi muswè kwela byanza byèndè muulu, wàmba ne: “Nzambi ùmvùlukeku” anyi?

³⁰⁹ Nzambi àkubènèshè, inábànzà. Nzambi àkubènèshè, nsongààkàji. Nzambi àkubènèshè, wèwè. Bìmpè be. Nzambi àkubènèshè, wèwè mwànà mukese wa balùme. Nzambi àkubènèshè, mwanèètù wa bakàji. “Ndi Nèndè dijinga. Ndi . . .” Nzambi àkubènèshè, mwanèètù wa bakàji, lwà ku dyabalùmè dyànyì eku. Ne àkubènèshè, lwà mundekeelu mwàmwa. “Ndi muswè . . .” Nènkù Nzambi àkubènèshè, wèwè nsongàalùmè. Ne wèwè, mwanèètù wa bakàji, lwà mwaba ewu. Wèwè, mwanèètù wa balùme, lusekè lukwàbò elu, Mukalenge àkubènèshè. Nzambi àkubènèshè, lwà mundekeelu mwàmwa. “Umvùlukeku ànu cyanààna, Mukalenge.”

³¹⁰ Mpindiyewu vùlukàayi, cyanza cyèbè aci kí nyela kùndi mèmè to; nkùdiYe. Ànu lwà paanyimà pàànyì menemene apa, mpindiyewu, Mukalenge mmumòne cyanza cyèbè aci’s. Nànsha mèmè mupange kucimòna, Yèyè mmucimònè. Yèyè mmumanyè mwoyi wèbè. Yèyè mmumanyè cidi citùtukamù. Yèyè mmumanyè kiipacila kèèbè. Yèyè mmumanyè cidi cikusaka ku kiipacila aku. Nzambi àkubènèshè, mwanèètù wa balùme.

³¹¹ Muntu mukwàbò ne: “Ndi muswè kwitabuuja Dìyi dyònsò.” Nzambi àkubènèshè. Èyo. Nzambi àkubènèshè. “Ngambùlwishèku, Mukalenge, ngambùlwishèku.” Mukalenge mmumòne byanza byènù. Eyowà’s, mukalenge. Ki cyòci aci. “Kùdi bintu bìndi—bìndi nciyi mwà kuumvwa to. Ncyèna—ncyèna muswè kwikala mwena bupidyà to. Nànsha mèmè nciyi mbyùmvwà to, ndi muswè kuciitabuuja, nànsha byà munyi. Ndi mudilongolole bwà kwamba ne: ‘Mukalenge Nzambi, ki mèmè ewu. Ndi muswè kwitabuuja. Nkwacisheku bwà bupidyà bwànyì, Mukalenge.’” Nzambi ikalè neenù. Nzambi ànùbènèshè. Byanza byàbúngì, byàbúngì menemene mbyòbi ebi byela muulu, ne bicidi ànu bibanda muulu.

³¹² Wèwè udi wamba ne: “Mwanèètù Branham, aci cidi cikwacisha anyi?” Elàku cyanza cyèbè muulu musangu ùmwè, mwikale ne kiipacila kàà cyà bushùwà, kímpè, kàdi ujandule mùdi udyùmvwa.

³¹³ Wàmányì kufila bujaadiki ne kùdi kaacintu kampànda mu nsòmbelu webè amu, udi mumanyè’s. Kudi kantu kakesè kampànda, kawùdi kùyì muswè bwà kiikalemu to, kàdi kadimu, nànsha nanku. S’udi udikonka ne mmunyi muvwabi mwà kwenzeka. “Nènkù, Mukalenge, kwitabikù bwà mèmè kwikala Yudaàsà nànsha. Kwitabikù bwà mèmè kulonda ntàntà mu—mu Mukenji, ànu pàmwàpa nteeta bwà kwela meeji ne dikwàbò ditùkù kalèmà kampànda kàà kakesè nekàpatukile patòoke

nànsha. Éyì Nzambì wa yààya, byànyila kule. Swàku nshàlè ànu ne Díyì Dyèbè. Nwamònu anyi? Anyi pàmwápa ndi mufwànyine kwikala ànu mwena bupidyà udi wela ànu meeji ne: ‘Èè, pìikalabi—pìikalabi ne. . . èè, kàdi mbwà cinyi bakwàbò bònsò kabèèna bàmba nànkus’? Nwamònu anyi? Anyi, ncyèna—ncyèna muswè kwikala nànkus to. Ndi muswè kwikala mwena kwitabuujà. Ndi mucìswe. Ndi mmòna Díyì dyà Nzambì dyà díbà edi. Ndi mmòna Nzambì mu Dyòdi aci. Nènku, Mukalenge, mvwijeku citùpà cyà Díyì adi. Mvwjeku citùpà cyàDì. Ndi muswè kwikala citùpà cyàDì.” Mukalenge ànùbènèshè.

³¹⁴ Mpindyewu tusambilàayi. Nènku muntu yònsò, sambila bwà—bwèbè wèwè mwine, nènku mèmè nènñusambidilè. Nuvwaku bamanyè ne, dínghà ditùkù netwikalè mwà... katwàkwikala badisangishe kaaba aka to, pàmwápa, bwà katancì. Bàmwè bàà kutùdì nebiikalè bangàciibwe, ne katwàkwikala badisange pàmwè nànsha. Kudi bàábúngi bàà kutùdì kaaba aka, bàdi ne, bàmwè bàà kutùdì bàdi bènda bakulakaja. Bàmwè bàà kutùdì, katwèna bamanyè to. Nànsha mene bàna batekète bàdi bàfwa. Tudi tufwà ne bidimu búngi kanà bònsò. Bikèngela tutapuludiibwe, ne bikèngela bwà cintu eci kujikijiibwaci. Nènku kwèna ànu mwà kafikaku ku mpùùkàpùùkà to, bìdi bikèngela ulwe paùcìdì ne meeji èbè majaaname mu òwò apu.

³¹⁵ Wèwè udi wamba ne: “Èè, kumpàla menemene kwà mèmè kufwà, bu mèmè mwà kuCimòna.” To, kwenjiku nànkus to. Udi mufwànyine kwikala kuyi mene mu meeji èbè majaaname mu òwò pa díbà adi to. Udi mufwànyine kushipiibwa kumpàla kwà wèwè kwalukila kumbelu, mu njìwù. Udi mufwànyine kufwa ku disaamà dyà mwoyi wimana. Katwèna bamanyè ciikalà mwà kwenzeka to; ànu Nzambì ngudi mucilame. Ndi ntèkemena ne kwàkufwa nànkus to.

³¹⁶ Ndi mmòna bantu, nànsha too ne pambelu, babàndishe byanza byàbò mu dididiishi. Nwamònu anyi? Éyowà, Nzambì àbènèshè.

³¹⁷ “Ndi—ndi muswè—ndi muswè kwikala mujaalame. Ndi—ndi—ndi muswe kwikala mujaalame.” Nènku mpindyewu tucyènzàayi mu mùshindù mujaalame, mpindyewu, ànu mpindyewu mene. Ànu, udi mwà kukosa bwalu abu musangu ùmwè; bu ne kuumukila panshi pàà mwoyi wèbè, bu wèwè mwà kwamba ne meeji matòòke ònsò ne: “Mukalenge Yesù, cintu nànsha ciikàlè cinyi, anyi cidi ní nganyi mukwàbò wamba ciikàlè cinyi, Díyì Dyèbè nedìikale dyàkumpàla mu nsòmbelu wanyì. Ndi nDijinga mu nsòmbelu wanyì. Wèwè udi Díyì. Bible mwámbe nànkus, ne ndi ngiitabuujà ne Bible n’Diyì dyà Nzambì. Ne mèmè ndi mumanyè ne twitabàayi ne mēyì maswika, bìvwà bifunyikaMù abi, mbidyenze musumbà wà beena lubombo. Mukalenge, nsukùlaku ku bintu byà mùshindù awu, ne swàku ngiikaleku mèmè yònsò ànu Webè. Nyewu mbàdisha byanza

byànyì kuulu kúdi Wèwè. Nyewu mbàndisha mwoyi wànyì kúdi Wèwè, díyì dyànyì kúdi Wèwè, disambila dyànyì kúdi Wèwè. Nzambì, ikalaku naanyì luse.”

318 Ne byanza byànyì pààbì, mbyèbì byela muulu, Mukalenge. Nsukùlaku, Éyì Mukalenge, ku bupidyà bwònsò.

319 Nànsha bu Yèyè kayi mwà kumpà Bu—Bukolè bwà kwenda bu Ènoka ne kabiyi bikèngela bwà kufwà to, kàdi kwenda ànu lwendu lwà mu mapingaja ne kuya Nendè Kumbelu; kàdi, Nzambì, ndi ngiitabuuja ne necyènzekè, bwalu ndi mumanye ne kúdi ne cyà kwikala Dyambwibwa mu ditùkù dyà ndekeelu, ne mudimu gwà kukòsòloja.

320 Nènku, Taatù, ki mùdi kàbìdi kabala-matùkù kèètù kàmba, bidimu makumi asatu ne bisambòmbò bikwàbò ne mudimu newikalè mujikè, ne nebikengele bwà Wèwè kulwa musangu kampànda mu byòbì abi bwà cyanààna kakwàkwikalaku mubidi nànsha ùmwè musùngidiibwe to. Ne pashìishe mbatwambile, kúdi balondolodi bàà maalu à munda mwà bikondo ne—ne bantu bàdi bàkebululà bintu byà mùshindù awu, ne kakùyì mpatà to tukàadi badyànjidile bidimu byàbùngì, byàbùngì menemene kupita ku byòbì abi, bidimu byàbùngì bikaadi bipite; mbàtwambila, ku tubala-matùkù ne, tudi kule menemene ne cyòci aci; pàmwàpa nkushààle bidimu ànu dikumi ne bitaanu anyì makumi àbìdi cyanààna. Ncyèna mumanye to, Taatù. Kàdi ndi mumanyè ne, nànsha mene bilondeshile kabala-matùkù kèètù, tukaadi bafike pèpi ne kòkò aku.

321 Ndi mmòna mwaba udi ditekemena nànsha dimwe kadiyi mwà kwikala dishààle to, Mukalenge. Kulwalwa... Bòbò ànu badidinge babange kwelangana mabòmbes awu muntu ne mukwèndè, Mukalenge, kakwà—kakwà—kakwàkwikala mwalu wà mvità nànsha. Bòbò, nebàbutulangane muntu ne mukwèndè. Nènku, Mukalenge, mbilembèlèlè kuntwaku, kadi nànsha nànkù Bible udi wàmba ne maulu ònsò ne buloba nebikwate kapyà. Nzambì, ndi mmòna cikondo cyènda cimweneka.

322 Ndi ngeela meeji ku dishebeya dyà Mfùmù wa ditùngà, ne pashìishe mmòna muntu mukwàbò mubì awu uwela, kayì ulekela muntu awu ulumbulwishiibwa to, kàdi ùmwasa ùmutònkwela panshi, dishipa dyà ku bukole. Éyì Nzambì wa yààyà, ewu’s mmupìile ànu mùdi mukwàbò awu amu’s. Kabèèna ne bukenji bwà kwenza aci to. Bubì mu ditùngà dyètù twètù biine, pàadi ne nditùngà dyà beena Kilistò, cileejiilu cikiwàte ne byà luse kaayì citùdì eci, Mukalenge, cyà beena Kilistò. Utufwileku luse, Mukalenge, ku mpèkaatù yètù.

323 Tukwacisheku, Éyì Nzambì wa yààyà, nangananga Èkèleeziyà Wèbè, aba bàdi babàtìijìibwe mu Mubidi musokome wà Kilistò abu’s. Mwine awu, “Nyumà ngudi ufùlùlula,” muWàkàmba. Nènku ànu mùvwà Mwànà wa muntu mubànde amu, ki mwàbànda kàbìdi Mubidi Wèndè. Ne Yèyè ki Mutù;

Èkèleeziyà Wendè ki Mubidi. Éyi Nzambi wa yààya, Mutù ngùdi ulombola Mubidi. Anyishaku bwà Bulombodi bwà Dìyi bùlombole Mubidi wa Kilstò. Nènku swaku bwà mèmè kwikala citùpà cyà Mubidi awu's, Mukalenge.

³²⁴ Ndi ndomba bwà aba bàdi beele byanza byàbò muulu, ne bônso badipu ne biikala mwà kulondela pa mikàbà yà méyi. Mukalenge Nzambi, ndi ndomba ne meeji matòoke ónsò. Babwejaku, Mukalenge. Wèwè tàngila myoyi yàbò. Udi mumanye cidibo. Kadi, mèmè bu musadidi Webè, ndi—ndi ngakwila cisàmbà eci, Mukalenge. Ndi—ndi mubànange. Ndi mubànange.

³²⁵ Nènku ndi—ndi—ndi anu nteeta bwà kwenza cyòci eci bwalu ndi ndyumvwa ne mudimu Wèbè muntuma naawu udi ukengela bwà mèmè kucyènza. Pa nàнку, Taatù, ki mèmè ewu, ngenza mwànyi pàanyi mwónso mündi mwà kwenza ne... Mfwilèku luse ku bilèmà byànyi byà mu butekète, Mukalenge. Ndi ndomba bwà Wèwè—Wèwè kumpa dikàndà, bwà ngaamòna mwà kutamba kucitòokeshilaku bantu.

³²⁶ Mpindyewu ikalaku neetù mu tabernacle emu, dilòlò edi. Pwekèshaku mèsù pa aba, Mukalenge, bàdi beele byanza byàbò muulu mu tabernacle emu bàba. Nkenkètèku, Éyi Mukalenge, nènku unteeteku. Ne kwòkò bwalu bubì mu mèmè emu, nsukuleku, Taatù. Enzaku nàнку. Sukùlaku èkèleeziyà ewu.

³²⁷ Tùsùkulaku twètù bônso, Mukalenge, bwa Dìyi divwijibwe mubidi munkaci mwètù ne dimanyishibwe kudi bàà pa buloba mu ditùkù edi. Enzaku nàнку, Taatù. Bwalu, ndi ndambula cyòci eci, ne mèmè mwine, pàmwè ne cyena-bwalu eci, ne batèeleji aba, ne Dìyi Dyèbè ne mulayi Wèbè, bwà lupàndù lwà misùkà yètù, mu Dìna dyà Yesù Kilstò. Enzaku nàнку, Mukalenge.

³²⁸ Swaku bwà Bukolè bwà Nzambi bulwe pambidi pètù ne bùtùlaabe, kubangila ànu ku mpaasàtà too ne ku mulami wa ku ntempelu, ne muntu yónso udi kaaba aka awu. Swaku bwà Nyumà Mwimpè alwe kwangata kaaba Kèndè munda mwà mwoyi wètù, ne kwangata mulayi wónso wà Nzambi ne kutubuulwila ne Dìyi Dyèbè m'Bulelèlà. Mu Dìna dyà Yesù mmündi ndomba emu.

³²⁹ Nènku patùcidi ne mitù yètù miinyika apa. “Ndi mwà...” Ndi muswè ànu bwà mwimbi wa cisanji cyà orgue, bu yèyè mwà kuswà, bwà kutupèeshaku cyona cyà musambu ewu, “Ndi mwà kuumvwa Musungidi wànyi ubiikila. KwandombolaYe aku ke kùngààlonà.” *KwandombolaYe Aku Mèmè Nèndondè.*

... Musungidi wanyì ubiikila, (Yèyè ùdi cinyì?)
Dìyi.)

Ndi mwà kuumvwa Musungidi wanyì ubiikila,
Ndi mwà kuumvwa Musungidi wanyì. . .

Mpindyewu bènga méyi èbè maswika awu ne bikwàbò.

Angata nkuruse webè ulonde . . .

330 “Ewu wâbenga kwambula nkuruse wendè ne kuNdonda Mêmè, Dîyi, kî mmukumbanyine kwikala muyiidi Wanyî to.”

KwalombolaYe . . . (Alukilaayi ku Bible, ki kwâkulombolaYe.) . . . nêndondè,
KwandombolaYe aku mêmè nêndondè,
KwandombolaYe aku mêmè nêndondè,
Nêngiikalè . . . (Byôbi ne nku ciinà cyâ mâyi,
mu Dînâ Dyëndè, byôbi ne nku cyoshelu,
bwâ kutùkakana ne bundu bwànyî!) . . .
njila mujimà.

331 [Mwanèètù Branham udi wimbila mu matama *Kwandombolà Ye Aku Mêmè Nêndondè*—Muf.]

. . . Yêyè ku dilumbulwishiibwa, (Ki cyôci aci,
mpindyewu mene.)
Nêngiikalè . . .

332 Udi ku luseke kaayi wêwè? Ncinyi cyûdi umòna mu cimfwànyî cyèbè mu Bible, mu lumwènù lwâ Nzambi lwâ kuditangidila, piikalabi ne ndi munkaci mwâ kulumbulwishiibwa mpindyewu kùdi Dîyi?

Nênye ne . . .

333 “Nênye ne Dîyi, nànsha bindòmbe cinyî. Ndi mpicila mu dilumbulwishibwa dyâ Nzambi. Byôbi bikèngela bwâ mêmè kwangata ùmwè wâ ku myaba ayi, mvwijeku mwena kwitabuuja, ànu mu Dîyi dyônsò.”

. . . Nendè, Nendè njila mujimà.

Bwalu kwandombolaYe aku mêmè . . .

334 Mpindyewu elànganaayi meeji pa bwalu abu, ne ntema yônsò mpindyewu.

. . . kwandombolàYè . . .



MISHINDÛ YÍSÀTÛ YÀ BEENA KWITABUUJA LUA63-1124E

(Three Kinds Of Believers)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyàlumingu dilòòlò, mu matùkù 24 à ngondo wa Kaswàbàngà, cidimu cyà 1963, ku Branham Tabernacle mu Jeffersonville, Indiana, U.S.A. Ndyumusha pa mukaba wa mêyi ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org